

Tí xrā kjuích'e tí sín kjueyá ch'ín Jesús

Itsi Nchakuen Dios

¹ Tjuahā jaha Teófilo na tí libro saoxín mé kjian̄ kaín nkehe kjuako ch'ín Jesús la ko tí xrā kjuích'e ch'án tí xrankíxixín

² hasta tí yaon̄ sákjuī ch'án nkaya nkajní. Ā ntā ti naxā sákjuīhya ch'án nkajní la kjueyá ch'an̄ tí sín sich'ehe ch'án xrā la ntá tí Nchakuen Dios mé kjuínkítsa ch'án ntá nixjehē ch'án sín la k'uetuēnhen ch'án sín kíxin̄ tsonohē sín nkehe tí xrā chrókjuich'e sín.

³ Tió kjuixin̄ k'uén ch'án ntá kónoxín kíxin̄ tjechón ch'án, k'uíkon̄ tí jehē sín la ko cuarenta yaon̄ mé k'uíkon̄ sín ch'án jnkoyaxón. Itsjé nkehē kjuakoxín ch'án kíxin̄ tsonoexín sín kíxin̄ chaxín tjechón ch'án la ko kjuako ch'án nkexrí tí kjuachaxin̄ kuēnte Dios.

⁴ Ti naxā kójnkotséko ch'án tí sín k'uájiko ch'án la jehē ch'án mé k'uetuēnhen ch'án sín kíxin̄ naxā sátsjixinhyā sín tí chjasin̄ Jerusalén. Chrónka ch'án kíxin̄:

—Chróchonhénrá nti hó chrók'uayéherá tí nkehē tsjanjon̄ T'aná, me tí nkehē kuinhínrá xrjankā janhan̄.

⁵ Ā ntá chaxín ch'ín Juan̄ ìntā ó kuíkítexín ch'án chojni. Ā ntá ijie kánhyó itsjé yaon̄ ntá jahará la Nchakuen Dios la tsikitiaxínrá.

Sákjuī ch'ín Jesús nkaya nkajní

⁶ Ntá ti naxa kójnkotséko sín ch'ín Jesús, kjuanchankíhi sín ch'án kixin:

—Jaha Ìnchéni, ¿á tsjánjonhya kjuachaxin jái ts'etoanni chjasénni Israel ínaá? —ichro sín.

⁷ Ntá kjuátehe ch'ín Jesús kixin:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etoan tíha.

⁸ Ntá itsi tí Nchakuen Dios ntá ts'ayéherá kjuachaxin sátsjichronkará nkehe tí xra kjuít'a, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuenté chjasintajni.

⁹ Ntá kjuixin nixja ch'ín Jesús ntá xrínahya tinkák'it'ótjen ch'án sákjuí ch'án la tjejótsjehe sín. Sákjuí ch'án hasta kjuák'enkákjan ch'án ijnko tjuí. Ntá í t'ikonhya sín nkerí kjuíji ch'án.

¹⁰ Ntá naxa tjejókonta sín tí sákjuí ch'ín Jesús nkajní, a ntá xrínahya titàya k'uíkuèn sín yaá chojni ntoa tjejóyá sín ka tjóá tjejó sín chjinaxón tí tjejó tí jehe sín.

¹¹ Ntá tí sín a mé ntáchro sín kixin:

—Jahará chojni kjuíxinrá estado Galilea, ¿nkehe tsonhen naxa kontará nkajní? Xíkaha tjejokontará sákjuí Jesús la ko mé xíkaha xiki ch'án ínaá —ichro sín.

Xreyá ch'ín Matías tsjiqtéhe lùké ch'ín Judas

¹² Na ntá kjanxin sín tí jna it'in Olivo na ikjan sín chjasin Jerusalén. Tíha a mé kínhyó tjen kixin ó xikahó k'uetōan tí ley sátsji sín tí yaon t'ok'éhe sín.

¹³ Na ntá kjuíji sín tí chjasin ntiha ntá k'uit'ótjen sín tí yóxin piso tí nchia tsíkjen sín k'uék'ejó sín.

Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuente tí partido cananista, la ko kjaxin ch'ín Judas, savé ch'án mé it'in Jacobo.

¹⁴ Kaín sín kójnkotsé sín ntiha tsonixjehe sín Dios la ko k'uéjoko sín tí kíchó tí ch'ín Jesús la ko tí tjan María, ìné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé ijnko ciento ikán chojni mé tsíkójnkotsé ntiha. Ntá ntáchro ch'án kixin:

¹⁶ —Kíchóni, t'ichjánxin tsoxiteyá éxí nixja xroon itén Dios éxí tsínixja ch'ín David tsíchrónka Nchakuen Dios nkehe sich'e ch'ín Judas. Tí ch'ín Judas mé kjuikao ch'án tí sín tsotsé ch'ín Jesús.

¹⁷ Jehe ch'án mé kjaxin k'uék'ajikoni la jnkokón xra k'uáyèkoni ch'án.

¹⁸ A ntá jehe ch'án mé sákjuík'enaxín ch'án ijnko nonte tí chichaon kjuacha ch'án kixin tí jje kjuasin ch'án. Ntá k'uánótjen ch'án la ikja ch'án k'uitja nonte la xitjehe tsee ch'án k'uaxrje kaín sintanóé ch'án.

¹⁹ Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrjexín kixin ijnko nonte síin ijni.

²⁰ Tí xroon Salmo mé nixja xikihí:

Tsitohe ntoé ch'án a,
la kohya nkexro ts'ejó ntiha.
La ko kjaxin ntáchro kixin:

Í jnko nkexro ts'áyéhe tí xra kuènte ch'án.*
Mé xikaha tsíkjin ch'ín David.

²¹ Tí tjejóni ntihi la síin chojni ó k'uájikoni xráxín tí k'uék'ajikoni Ìnchéni Jesús

²² desde k'uíkonní nkexrí kuíkíte ch'ín Juan tí jehe ch'án la ko hasta k'uíkonní sákjuí ch'án nkaya nkajní. Ntá ijie t'ichjánxín tsoxreyá jnkojín tí sín a tsojnkotsékoni sín kíxín kjaxín tsochrónka sín kíxín chaxín xechón Ìnchéni Jesús —mé xikaha chrónka ch'ín Pedro.

²³ Ntá kjuenkayáxín sín tsonoxín yaá chojni mé tí ch'ín José, t'ikõn ch'án Barsabás la ko Justo, la ko kjaxín í jnko ch'án it'in Matías.

²⁴ Ntá nixjehe sín Dios la ntáchro sín kíxín:

—Ìnchéni jaha mé choxian asén kaín chojni. Tjákohéni nkexro tsonhen tocar xra tí yaá tí nkexro í kónoxín

²⁵ tsjiatehe xra apóstol kuènte ch'ín Judas. A ntá tí ch'ín Judas mé kuítóhe ch'án tí xra kíxín kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuích'e sín suerte ntá xrínghya kónhen tocar tí ch'ín Matías, ntá tuénxín tí hora a kuákja ch'án xra k'uéjóko ch'án tí tejnko tí sín kjueyá Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín.

* **1:20** Salmos 69.25; 109.8

² Xrínahya kuínhin sín ijnko tóvéntó kuixín nkajní. Tí tóvéntó mé éxí ijnko xrinto fuerte chjéhe. Kuenté tí nchia tjejóxehen sín mé kóvéntó kjaxin.

³ Ntá xrínahya k'uíkon sín nkehe éxí xrohi nene tsjehe. Ntá tíha xíkayéhe la k'uéjókjen jnkojnko kja tí jehe sín.

⁴ Na ntá kaín sín k'uáyéhe sín tí Nchakuen Dios ntá kjuankíxin sín nixja sín í jnko nkíva kíxin Nchakuen Dios kjuínkítsa sín nixja sín.

⁵ A nta tí yaon a la tí chjasin Jerusalén k'uéjóchoni judío tjinkaon sín sinchexiteyéhe sín tí nkehe tinkáchónki sín, mé tsíkjixín sín nkuíxín chjasintajni.

⁶ A ntá jehe sín mé tsíkinhin sín tí tóvéntó ntá tsíkóchjina nchónhya chojni. Ntá í noehya sín nkehe chrókjuenkayáxin sín kíxin jnkojnko tí jehe sín mé kuínhin sín kíxin nixja tí sín a jnkojnko nkívee sín.

⁷ Ntá síxrànká sín, chrakon sín ntá jehe sín mé tjo sín kíchó sín kíxin:

—¿Á jehya kaín tí sín tjejónixja mé tsíkjixín sín estado Galilea?

⁸ La ¿nkekuènté tjejótinhinni kíxin nixja sín jnkojnko nkíveeni?

⁹ Kíxin ntihi mé siín chojni tsíkjixín chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia,

¹⁰ la ko Frigia, la ko Panfilia, la ko Egipto la ko nkuíxín Africa antsí nó ntaha Cirene. La ko kjaxin chojni romano tjejó ntihi. Iso tí sín a mé chaxín tsíkókjíexín judío, la í so la tinkáchónki sín Dios éxí tí sín judío xíkaha.

11 La kɣaxin siín chojni tsíkɣixín Creta, la ko Arabia. Mé xíkaha kaín ni tsíkɣixinni tí chjasin a mé tsíkinhinni tjejónixja tí sín a tí kjuaxroan kuènte Dios jnkojnko nkíveeni —mé xíkaha ichro sín.

12 Ntá tóxakonhen kaín sín la chrakon sín ntá kjuanchankíhi kíchó sín kixin:

—¿Nkehe t'axrjexín kaín tíha? —ichro sín.

13 A ntá iso sín kjuanoá sín ntáchro sín kixin:

—Tsékoan tí sín a —ichro sín.

A ntá ch'ín Pedro chénka tí sín siín

14 Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kixin:

—Jahará chojni judío la ko jahará tjejorá chjasin Jerusalén. Kaínrá tjejorá tinhínrá tí nkehe tsoxrjanka.

15 Tí sín tjejó ntihi la jehya tsékoan sín éxí ntáchrorá, kixin na ntá las nueve nchítjen la kohya nkexro tsékoan.

16 Tíhi mé tsíchrónka ch'ín profeta Joel:

17 Ntáchro Dios kixin: Itsi ijnko yaon tsjixixín

ntá tsochr'an Nchakuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuéntana.

La ko tí sín ntasoá mé titàya ts'íkuèn sín tí nkehe tsjákoha sín.

La ko tí sín ó táda la kotáchrién sín ts'ikonxín sín kixin nkexrí tjinkaon Dios.

18 Tí yaon tsonhen kaín tíha la tsochr'an tí Nchakuenná ts'áyéhe kaín tí sínntoa ch'ena xra la ko tí síchjin kɣaxin

la tsochrónka sín tanná.

19 Ntá janhan mé tsjáko_xia_n ijnko kjuachrakon nkajní.

A ntá chjasintajni tsjáko_xia_n kjuaxroan: mé ts'ixin ijn_i la ko xrohi la ko itju_i tsík'óna ihnchi.

20 Mé tí yaon la ts'inkaséyanxínhya, ts'óna ts'ixin tie. A ntá tí nitjó mé ts'óna ijn_i.

Xíkaha senó tsonhen ntá itsi Ìnchéni.

Tíhi mé ijnko yaon imá jié la imá náxrjón.

21 A ntá kaín tí nkexro tsjanchehe ihn_ié Ìnchéni kíxin tsjink_itsa sín mé tsaá sín.*

Mé xíkaha tsíchrónka ch'ín Joel.

22 'Jahará chojni israelita tinhínrá tí nkehe tsoxrjanka. Tí ch'ín Jesús tsík_jix_in chjasin Nazaret mé Dios kjuak_ox_in ch'án kíxin tsíchr'án ch'án kíxin kjuasin ch'án itsjé kjuaxroan jié k'uíkonrá la ko kjuako ch'án kíxin Dios tsíchjéhe ch'án kjuachaxin kíxin tjinkaon ch'án chrók'uikonrá. Jahará ó jína nohará kaín tíha.

23 Kjonté xíkaha k'uíkonrá la jahará itserá ch'án éxí tsíkjenkayáxin Dios ósé. A ntá jahará kjuínchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuak'enkani sín ch'án ijnko ntacruz.

24 Kjánchó Dios la kjuínchexechón ch'án inaá la kjuatsen ch'án tí kjuatjoté kuènte kjuach'én kíxin ntá tí kjuach'én xitjahya ts'etu_enhen tí jehe ch'án.

25 A ntá ósé tí ch'ín rey David tsíchrónka ch'án kuènte Jesús ntáchro ch'án kíxin:

Jaha Ìnchéni t'íkuan kíxin jnkochríxín tjétaón ntia tí xritjak'é janhan.

* 2:21 2.17-21 Joel 2.28-32

Jaha mé itjen tjaná chjina kixin chrókohya jie chrókuásian.

²⁶ Méxra imá chéhe asenná. Ir'va tsjexian tí nkehe náxrjón.

Ó nòna kixin kohya nkehe ts'atsínka kjónté its'én.

²⁷ Ó nòna kixin tí jaha tsjtoéhya asenná chríkjan tí siín chojni tsík'en.

Tsjánjonhya kjuachaxin kixin tsoxíka ntóna kixin janhan mé ijnko nkexro t'aha xra jína tjuèhe.

²⁸ Jaha mé kjuákona tí ntja tsjanjon kjuachón. Jaha mé nchechàna kixin t'ayakonna.†

Mé xikaha tsíkjin ch'ín David.

²⁹ Kíchóni tjtóhéra tsontáxrjan kixin ch'ín David, tí nkexro k'uaxrjeníxinni mé tsík'én ch'án la ko tsíkjixravá ch'án. Ntá naxa noheni nketí tsíxravá ch'án.

³⁰ A ntá ch'ín David mé ijnko nkexro tsíchrónka itén Dios la ó nohe ch'án kixin chaxín Dios chrónka kixin ijnko nkexro ts'axrjeníxin ch'án mé ts'óna rey mé ts'etoan éxí jehe ch'án k'uetōan ch'án.

³¹ Mé xikaha ch'ín David la ósé ó nohe ch'án nkehe tsonhen la mé chrónka ch'án kixin tsoxechón Cristo la ko ntáchro ch'án kixin tí asén ch'án tsjtoehya tí siín tí sín tsík'en la ts'itjāyanhya tí cuerpo kuènte ch'án.

³² Méxra Dios kjuínchexechón tí ch'ín Jesús, mé k'uikōnni kaín ni la mé chrónkani kixin chaxín tíha.

³³ Ntá ijie Jesús mé sákjuiko ch'án Dios la nàno itja chjina Dios mé tjen ch'án. Ntá tsíntáchro It'é ch'án Dios kixin tsochr'án ch'án tí Nchakuen ch'án.

† 2:28 2.25-28 Salmo 16.8-11

Ntá jie ó kui la ó k'uíkonrá la ko kuínhínrá nkehe kónhen.

³⁴ Tí ch'ín David la jehya jehe ch'án sákjui nkaya nkajní, kíxin jehe David ntáchro ch'án kíxin:

Ìnchéni Dios mé ntáche tí Ìnchéni kíxin:

“Tjak'e tjaná chjina nti hó tsétóan,

³⁵ tsjixinjian kaín xín tí sín nínkakonhan la ts-jachahya sín ts'etóan sín kíxin jahvá mé tsétóan.”‡

Mé xíkaha tsíkjin ch'ín David.

³⁶ 'Ntá kaín rá chojni israelita chrókónohará chaxín kíxin jehe tí ch'ín Jesús ó kjuakénkanirá tí ntacruz la Dios mé kjuích'éna Ìnchárá ijie, mé tí Cristo —mé xíkaha chrónka ch'ín Pedro.

³⁷ Ntá ti kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntáchro sín kíxin:

—Kíchóni, a ntá jie la ¿nkexrí chrókjuich'eni?

³⁸ Ntá kjuátéhe ch'ín Pedro ntáchro ch'án kíxin:

—Chrókuitóhérá tí ijíará la chróxráxinkáonrá Dios. Ntá chrókuikitiáxínrá ihnié Jesucristo ntá Dios mé tsjakjìnhanrá tí ijíará ntá jehe ch'án tsjanjon ch'án Nchakuen ch'án ts'ayéhérá.

³⁹ Dios mé sinchekitónhanrá ch'án tí Nchakuen ch'án ts'ayéhérá jahará la ko xjaanrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkoinko tí nkexro tsjeyá ch'án.

⁴⁰ Mé xíkaha ntáchro ch'ín Pedro la ko í so nkehe ntáchro ch'án. Nta nixjehé ch'án sín inaá, ntáchro ch'án kíxin:

‡ 2:35 2.34–35 Salmo 110.1

—Chrókuĩtoherá tí jínahya tjenkayáxin tí chojni sín chjasintajni kixin jahará me jína chrókuaárá.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina ini míl chojni kjuankíxin tinkáchónki Ìnchéni Jesús la k'uító tí sín ó xráxín síin.

⁴² Ntá kaín sín mé jína k'uék'ejó sín mé kuítekaon sín tí nkehe kjuako tí sín kjueyá Jesús la kjuínkĩtsa sín kjuanjon sín tí nkehe chrókjone tí í so sín la ko chjéhe sín Dios kjuasáya la ko kójnkotsé sín kixin sine sín niotja xraxinkakonxín sín kixin ik'uén Ìnchéni.

Mé xikaha k'uéjéó tí sín xrankíxixín tinkáchónki Ìnchéni

⁴³ La ntá kaín tí í so sín mé chrakon sín kixin tí sín tsíkjejá Jesús kjuasin sín itsjé kjuaxroan.

⁴⁴ La kaín tí sín tinkáchónki Jesús mé jnkokóá k'uéjéó sín la jnkokóá chóna sín tí nkehe sine sín.

⁴⁵ Kjuínchekji sín tí nkehe chóna sín ntá k'óxikayéhe sín tí chichaon la chjéhe sín tí sín chóntahya.

⁴⁶ Jnkojnko yaon kójnkotsé sín tí nínko la ntá jnkojnko ntøe sín kjóneko kichó sín. La ko kjóne sín niotja kixin xraxinkakonxín sín kixin ik'uén Ìnchéni la ko kjuaxróxin k'uéjéó sín la kohya nkexro kjuínchehnke.

⁴⁷ Kjuanchehe sín kjuasáyé Dios. Ntá kaín chojni k'uéchónthehe sín kjuasáya. A ntá jnkojnko yaon Ìnchéni mé kjueyá iso chojni kixin tsotsjé tí sín tsaá.

3

Kuítóhe jína ijnko nkexro xitjahya tji

¹ Ijnko yaon tí ch'ín Pedro la ko ch'ín Juan mé chrìn sín sákjuí sín tí tjen tí nínko. Mé kjuíji sín las tres kónjín, tí hora mé nixjehe sín Dios.

² Kaín yaon kjuák'e ntiha injnko ch'ín tsíkokjíexín xitjahya tji. Sátsíkjiko sín ch'án tí nínko la tsíkjak'etjaxín sín ch'án tí ntója puerta mé it'in Ntója Náxrjón. Ntaha tjetjanchak'éhe ch'án chichaon tí sín sít'ixenhen ntiha.

³ Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín nínko, a ntá kjuanchak'éhe ch'án sín chichaon.

⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kixin:

—Tsjehe ntihi.

⁵ A ntá tí ch'ín a tjetsjehe ch'án jína kixin ách'e ichrén nkehe tsjanjon tí sín a, ichro ch'án.

⁶ A ntá ch'ín Pedro ntáchro kixin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihnié Jesucristo, tí nkexro tsíkjixín chjasin Nazaret, la t'inkatjen itjia —mé xíkaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrínahya ó kósóji tí nta ntoá toté ch'án.

⁸ Ntá tí ch'ín xitjahya tji la chrika ch'án la kjuák'exín toté ch'án ntá kjuankixin ch'án itji ch'án. Ntá k'uixenko sín ch'án nkaxenhen nínko. Tjetji ch'án la ko chrika ch'án la chjehe ch'án kjuasáya Dios.

⁹ Na ntá kaín tí chojni siín tí chjasin ntiha la k'uíkon sín kixin ó tji ch'án la ko chjehe ch'án kjuasáya Dios.

10 Ntá chrakon sín kixin xikaha tsíkónhen kixin tsíkjatsōan sín kixin jehe tí nkexro kjuák'etjaxin kjuanchak'á ch'án chichaon ntója ninko it'in Ntója Náxrjón.

Nixjehe ch'ín Pedro tí chojni siín tí ntasin Salomón

11 Na tí ch'ín xitjahya tji la mé títoehya ch'án tí ch'ín Pedro la ko ch'ín Juan. Ntá kaín xín tí sín siín ntiha chrakon sín kuinká sín sákjuítsjehe sín tí ntasin kuènte ninko it'in ntasin Salomón kixin ntaha tjejó tí sín a.

12 Ntá tí k'uíkon ch'ín Pedro xikaha la ntáche ch'án sín kixin:

—Jahará chojni israelita, ¿nkekuènte chrakonrá jahará la ko nkekuènte komaráni? ¿Á tjenkayáxinrá kixin jehóni kjuínchekitoheni jina tí ch'ín i kixin jehóni chóntani kjuachaxin la ko kixin imá tinkáchónkini Dios?

13 Náhí. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesús. Kjánchó jahará tsíkjikenhenrá ch'án tí sín t'etōan. Ntá tí ch'ín Pilato mé tjinkaon ch'án chrók'uátjánta ch'án tí ch'ín Jesús kjánchó jahará la tjinkákonhyará xikaha.

14 A ntá jahará chrókjuanchiará chrókuítóhe sáchrókjui tí nkexro tjóá jina asén. A ntá náhí. A ntá jahará mé tjinkáonrá sátsji ijnko chojni chóna nchónhya jie.

15 A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé xikaha k'uíkonni la chrónkani.

16 Tí kjuachaxién ihnié Jesús mé tinkáchónkini la ntá tíha mé kuítóexín jina tí nkexro k'uíkonrá la ko

choxinrá. Tí ch'ín a mé kuítekaon ch'án ntá kuítóhe ch'án jína. Mé xíkaha ó k'uíkonrá kaín rá.

¹⁷ 'Kíchóni ó nòna kixin tió jahará la ko tí sín t'etòan k'oyánrá Jesús la ni kónoahyará nkehe kjuich'erá.

¹⁸ Ntá ó xiteyá tí nkehe tsíntáchro Dios tsínixjaxin tí sín tsíchronka itén ch'án kixin tí Cristo t'ichjánxin tsjasóte ch'án.

¹⁹ Méxra tsítóhérá ijiará ntá xráxinkáonrá Dios ntá jehe ch'án mé ts'óxíka ijiará ntá Ìnchéni mé sinchekitohará ch'án jína.

²⁰ Ntá jehe ch'án mé tsochr'án Jesucristo ínaá la xra ó tsi kixin tsaáxinrá.

²¹ Na ntá ijie la Jesucristo la nkaya nkajni ntahó tsítóhe ch'án hasta tsjasiyóxinjian Dios kaín nkehe éxí tsíntáchro ch'án tsínixjaxin ch'án tí sín tsíchronka itén ch'án ósé.

²² A ntá senó tí ch'ín Moisés tsíchénka tí sín tsík'axrjeníxinni kixin: “Ìnchéni Dios mé tsochr'án ijnko nkexro ts'axrjeníxinrá tsochrónka itén ch'án éxí tsíchr'án ch'án tí janhan. T'ichjánxin tinhínrá kaín tí nkehe tsontáchro ch'án.

²³ A ntá tí chojni titekakonhya tí nixja tí nkexro a la ts'itjáyan sín la tsítóhe sín tí nación Israel,”* mé xíkaha tsíchronka ch'ín Moisés.

²⁴ Kaínxín tí sín tsíchronka itén Dios kjuankíxixín ch'ín Samuel la ko kaín tí sín kui chr'éxin mé chrónka sín kixin kaín tíha tsonhen xíkaha tí yaon i.

²⁵ Mé tí nkehe tsíntáchro Dios tsínixjaxin ch'án tí sín tsíchronka itén ch'án kixin xíkaha chrók'uayéhérá jahará tí nkehe chrókjuanjon ch'án

* 3:23 3.22-23 Deuteronomio 18.15,19

kíxin chrók'uejorá jína. Dios tsíkjich'éna ch'án ijnko pacto mé nixjehe ch'án tí sín tsík'axjeníxinrá mé tsíntáche ch'án tí ch'ín Abraham kíxin: “Kaínxín chojni chjasintajni mé tsoyaonxín sín kíxin ijnko nkexro ts'axrjeníxin tí jaha.”†

²⁶ Dios kjuínchexechón ch'án tí Xjeen ch'án la saoxín ichr'án ch'án tí tjejorá jahará israelitará kíxin chrókjuintayaonrá ch'án kíxin jnkojnko tí jahará chrókujtóherá tí nkehe jínahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'etōan

¹ Ch'ín Pedro la ko ch'ín Juan la naxa tjejónixjehe sín tí sín tsíkójnkotsé ntá xrínahya ikui tí sín nchāt'á la ko tí ch'ín t'etuenhen tí sín soldado kuènte tí nínko la ko tí sín saduceo.

² Imá kónínkaon sín kíxin ch'ín Pedro la ko ch'ín Juan kjuakōhe sín tí sín tsíkójnkotsé nkexrí tsoxechón chojni tsík'en kíxin xíkaha xechón ch'ín Jesús.

³ Ntá kuínhin sín xíkaha ntá itsé sín tí sín a ntá sákjuíko sín, chr'áxenhén sín ntōechiso. Ntahó k'uejó sín hasta kóyaon kíxin ó ntá kóntó.

⁴ A ntá nchónhaya tí sín tsíkinhin tí tan a la kuítekaon sín. Ntá kjuixraká tí número tí chojni ntoa mé in'ó mil chojni ntoa ó.

⁵ A ntá tí yaon chr'éxin kójnkotsé tí chjasin Jerusalén tí sín t'etōan kuènte tí sín judío la ko tí sín tjako tí ley.

† 3:25 Génesis 22.18

⁶ Mé kjaxin ntaha tjen ch'ín Anás, mé jehe ch'an mé tí nchať'á imá t'etoan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchať'á t'etoan.

⁷ Ntá k'ueťoan sín kixin síxrakoa ch'ín Pedro la ko ch'ín Juan. Ntá k'uejó sín jnkosiné la ntá kjuanchankíhi sín ntáchro sín kixin:

—¿Nkexro kjuanjon kjuachaxin o nkexro kjuachaxin ihnié kixin xikaha ich'erá tí nkehe?

⁸ Ntá ch'ín Pedro imá chónťa ch'án kjuachaxin kuente Nchaťkuen Dios ntá kjuátehe ch'án ntáchro ch'án kixin:

—Jahará chojni t'etoan kuente chjasin la ko jahará sín táda kuente chjasin Israel,

⁹ jahará mé tjanchankirá kixin nkexrí kuítóhe ijnko chojni níhi jína kixin tjinkáonrá tsonohará.

¹⁰ Ntá tinhínrá jína tí nkehe tsochrónkaxínni kixin kaín rá chojni chjasin Israel tsonohará kixin tí ch'ín i itjen ntihi mé kuítóhe ch'án jína kjuachaxién ihnié Jesucristo, tí nkexro tsíkjixin chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án inaá.

¹¹ Tí ch'ín Jesús i mé tí xro náxrjónhya kuítóéntará tió kjuich'énará tjať'o ntá mé jie k'óna tí xro tje-toan.*

¹² Kohya í jnko nkexro chónťa kjuachaxin chrókuaáxinni kixin kohya í jnko ihnié chojni ntihi chjasintajni chrókuinkáchónkini chrókuaáni —mé xikaha ichro ch'ín Pedro.

¹³ Tí síxreé mé k'uíkon sín kixin ch'ín Pedro la ko ch'ín Juan mé nixja sín kaín asén sín la ntá kónohe

* 4:11 Salmo 118.22

sín kixin tí sín a mé noehya sín xroon la tjetuanhya sín. Ntá chrakon tí sín t'etōan ntá kjuátsoan sín kixin tí sín a mé tsík'ajiko ch'ín Jesús.

14 A ntá tí ch'ín tsíkitohe jína mé ntiha tjejóko sín ch'án. Méxra xitjahya tsjanchia sín jiē tsjasóte tí sín a.

15 Ntá tí síxreé a mé k'uetōan sín kixin tí sín a ts'axrje sín ntója ntá jehó sín k'uéjōxenhen sín nchia ikjo sín kichó sín.

16 Ntá ntáchro sín kixin:

—¿Nkehe chrókjuich'eheni tí sín a? Kaínxín tí chojni ntihi chjasin Jerusalén mé ó k'uíkon sín kixin kjuínkítsa Dios tí sín a ntá kjuasin sín ijnko kjuaxroan jié ntá xitjahya tsontáchroni kixin chaxínhya tíha.

17 Í tjinkakonhyani kixin naxa tsochrónka sín tíha kixin naxa tsinhin chojni. Méxra ts'etōanni kixin í tsochénkahya sín ninkexró tí ihnié Jesús.

18 Na ntá k'uíyēhe sín tí sín a ínaá ntá k'uetuēhen sín kixin ninkehó chrónixja sín la ko chrókjuako sín ihnié Jesús, ichro sín.

19 A ntá ch'ín Pedro la ko ch'ín Juan kjuátehe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará o chrókjuinchexiteyéheni tí jehe ch'an?

20 A ntá jeheni la xitjahya tsítóheni tsochrónkani tí nkehe ó k'uíkonni la ko tí nkehe kuínhinni —ichro sín.

21 A ntá kjónté xíkaha kuínhin tí síxreé la jiehe k'uetōan sín ntá kjuanjōn sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntiha

chjéhe sín Dios kjuasáya kixin tí kjuaxroan kjuich'e sín.

²² Na mé tí ch'ín kuítóhe jína kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín kixin tsochraconhya sín

²³ Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uetóan tí sín nchat'á t'etóan la ko tí sín táda.

²⁴ Ntá kjuixin kuínhin tí sín tsíkójnkotsé na ntá kaín sín nixjéhe sín Dios la ntáchro sín kixin:

— Ìnchéni, jaha mé kjuich'éna nkajní la ko chjasintajni la ko tí ntayaon la ko kaín xín tí nkehe sín.

²⁵ Jaha mé kjuachaxién Nchakuan nixjaxian ch'ín David tí nkexro kjuít'aha xra. Ntáchro ch'án kixin:

¿Nkekuènte kixin kónínkaon kaín tí chojni nación ókjé?

A ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey siín chjasintajni la ko kaín tí sín tí chjasin kójnkotsé sín

nínkakohen sín Ìnchéni la ko Cristo.†

Mé xíkaha tsíkjin ch'ín David ósé.

²⁷ 'Mé xíkaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjin ókjé, la ko tí sín israelita mé tsíkójnkotsé sín tí chjasin ntihi kixin kónínkakohen sín tí Xjaan Jesús chóntahya jie, mé tí nkexro tsíkjéyá jaha sit'aha xra.

† 4:26 4.25-26 Salmo 2.1-2

28 Mé xikaha kjuínchexiteyá sín tí nkehe ósé tsíkjenkayáxian kixin t'ichjánxín xikaha tsonhen.

29 A ntá Ìnchéni, tsjehé kixin imá jiehe k'uetōan tí sín a. La ntá jaha tsjínkítsa tí sín sit'aha xra tsochrakonhya sín tsochrónka sín itán.

30 La ko tí kjuachaxián sìnchekitoexín jína tí chojni níhi la ko tsjákoxian kjuaxroan kjuachaxián ihñié tí nkexro Jesús t'aha xra —mé xikaha nixjehe sín Dios nkaya nkajní.

31 A ntá tí kjuixin nixjehe sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankíxín sín chrónka sín itén Dios.

Tí kaín nkehe síin la kaín sín mé kuènte sín

32 La kaín tí sín kuinkáchónki sín Jesús mé jnkokoá kjuenkayáxín sín. Kohya nkexro ntáchro kixin jehó kuènte tí nkehe síin. Náhí. Kaín sín mé kuènte sín.

33 Tí sín tsíkjeýá Jesús mé kaín asén sín chrónkaxín sín kixin nkexrí xechón Ìnchéni Jesús. Ntá Dios antsí kjuíncheyaon kaín sín.

34 Kohya ninkexró nóaxinhya tjejó ntiha kixin kaín tí sín chóna nontee sín o ntōe sín kjuínchekji sín. Na ntá tsíkjkāo sín tí chichaon

35 chjéhe sín tí sín kjueyá Jesús. A ntá tí sín k'óxikayehe sín tí chichaon, kuákja tí sín nòa.

36 Mé xikaha kjuích'e ijnko ch'ín levita it'in José. Jehé ch'án la tsíkjixín ch'án nonte Chipre jnkosiné ntayaon. Tí sín kjueyá Jesús mé kjuínchek'in sín ch'án Bernabé, mé t'axrjexín kixin tí ch'ín nchechéhe asén chojni.

³⁷ Jehe ch'án a mé kjuínchekji ch'án ijnko nontee ch'án ntá kjuíkəo ch'án tí chichaon kjuínchek'áyéhe ch'án tí sín kjueyá Jesús.

5

Ijje kjuasin ch'ín Ananías la ko tjan Safira

¹ A ntá íjnko ch'án mé it'in Ananías, a ntá ichjién ch'án mé it'in Safira, mé jehe sín mé kjuínchekji sín ijnko nontee sín.

² A ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuíko ch'án la chjéhe ch'án tí sín kjueyá Jesús la kjuanjon ch'án éxí kaín.

³ Ntá ntáchro ch'ín Pedro kixin:
—Ananías, ¿kuénté chjéhe kjuachaxin tí Tsochren kixin k'uetuənen asán? Ntá kjuich'iyehé tí Nchakuen Dios kixin kjuínchemá iso chichaon kjuínchekjixián nontaa.

⁴ ¿Á jehya nontaa tíha? Ntá tió kjuínchekjia la, tí chichaon la, ¿á jehya kuéntá? ¿Kuənte kjuenkayáxian s'ich'e tíha? Kjuich'iyehé Dios, jehya chojni kjuich'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín.

⁶ Na ntá ikjui iso sín ntasoá la ntá kjuínchek'ísímá sín ika tí cuerpo kuənte ch'án la ntá sákjuíko sín, sákjuíkjavá sín.

⁷ Ntá k'uátsínka iní hora ntá kjuíji ichjién ch'ín Ananías k'uixenhen tjan tí nchia ntaha a. La noehya tjan nkehe tsíkónhen tí ntiha.

⁸ Ntá ch'ín Pedro mé kjuanchankíhi tí tjan a, ntáchro ch'án kixin:

—Chronka, ¿á chaxín xikahó kóxixín tí nonte ó kjuinchekjirá? —ichro ch'án.

Ntá kjuátēhe tjan kixin:

—Chaxín xikahó kóxixín.

⁹ Ntá ntáchro ch'ín Pedro kixin:

—¿Nkekuènte jnkokoá kjuenkayáxinrá kjuich'iyehérá Nchakuen Ìnchéni? Kjá ntáchrorá kohya nkehe chrókónhanrá. Ntihi ó kui tí sín ntasoá sákjuíkjává sín xìa na ntá jaí sátsjiko sín tí jaha —mé xikaha ichro ch'ín Pedro.

¹⁰ Ntá tuénxín kjuítsínka tjan Safira toté tí itjen ch'ín Pedro ntá ik'uén tjan. Ntá k'uíxēhen tí sín ntasoá tí nchia a ntá k'uikon sín kixin tsíkjixin tsík'en tjan. La ntá sákjuíko sín tí cuerpo kuènte tjan la kjuavá sín tjan tí chjinaxón tsíxrává tí xìi tjan.

¹¹ Na kaín tí sín kuènte nínko la ko tí í so sín kuínhin tí xikaha tsíkónhen, mé imá chrakon sín.

Itsjé kjuaxroan kjuakoxin sín

¹² A ntá tí sín kjueyá Jesús mé kjuakoxin sín nchónhya kjuaxroan tí sín chojni ntiha la ko kaín sín mé kójnkotsé sín tí ntasin it'in Salomón.

¹³ Chrakon iso sín k'uítohya tí jehe sín la kjónté la kaín chojni tjikosáyehe tí jehe sín.

¹⁴ La ntá xrínahya nchónhya chojni ntoa la ko chojni chjin kjuankíxin tinkáchónki sín Ìnchéni.

¹⁵ Ntá itsjé chojni mé kuakitsje sín tí chojni níhi k'uejo sín ntja. Tjejóták'á sín chrítaón cama la ko kania kixin ts'atsínka ch'ín Pedro ntá kjónté its'ueen ch'án ó ts'atsínka tí tjejó sín mé chrókuítōexín sín jína.

16 Kjaxin tí chjasin chjino mé kjuixin nchónhya chojni ikjui sín chjasin Jerusalén la kjuikao sín tí chojni níhi la ko tí chojni chóna nchakuen tí jínahya. La kaín sín a mé kuitohe sín jína.

Ch'ín Pedro la ko ch'ín Juan mé chónkíhi sín

17 Na ntá tí sín nchat'á t'etoan la ko tí sín kuènte tí sín saduceo mé imá kóchjinoxínhin sín.

18 Na ntá itsé sín tí sín kjueyá Jesús la chr'áxenhén sín ntøechiso.

19 A ntá ijnko ángel kuènte Ìnchéni ikui tí tie a kuakitjehē ch'án ntója ntøechiso ntá kuakitsje ch'án tí sín a. La ntá k'uetuēnhén ch'án sín kixin:

20 —Sátjirá n̄inko la tsjákohérá kaín tí sín ntiha tí tan n̄ixin tsjanjon kjuachón.

21 Kjuixin kuínhin sín ntá sákjuí sín ntá tí k'uínkaséyan k'uixenhén sín tí n̄inko kjuako sín.

A ntá tí nchat'á t'etoan la ko tí sín k'uéjoko ch'án mé k'uíyehē sín tsojnkotsé kaín tí síxreé, mé tí sín t'etoan kuènte Israel. Na ntá k'uetuēn sín kixin tsoxrakoa tí sín tjejóchjina tsíkjeýá Ìnchéni.

22 A ntá kjuíji tí sín policía tí ntøechiso a ntá k'uitjahya sín tí sín a. La ntá ikjan sín la

23 ntáchro sín kixin:

—Kjuíjini ntiha la k'uíkonni tsíkjehe jína ntøechiso a la k'uéjó tí sín soldado a ntója. Ntá kuakitjehēni ntøechiso la k'uitjahyani ninkexró tí nkaxenhén —ichro sín.

24 Ntá kaín tí nchat'á t'etoan la ko tí ch'ín k'uetuēnhén tí policía kuènte n̄inko la ko i so tí sín nchat'á t'etoan mé kuínhin sín ntá ntáchro sín kixin xá nkexrí chrókónhén chrók'uitjáyan tí xra kuènte tí sín a.

25 Na ntá tuénxín kjuíji ijnko nkexro ntáχρο kixin:

—Tí sín k'uejochjinará jahará mé ó nkaxenhen nínko ntaha tjejó sín tjejójtjakohe sín chojni —ichro ch'án.

26 La ntá tí ch'ín k'uetuenhen tí sín policia mé sákjuíko ch'án tí sín policia la kjuíkakjín tí sín tjako. Ninkehó kjuích'ehya tí sín policia tí sín tjako kixin chrakon sín kixin ách'e tí sín síin ntiha mé tsjak'e sín xro, ichro sín.

27 Na ntá tió kjuíkao sín tí sín a la k'uejó sín nkayakon tí sín t'etoan ntá tí nchat'á t'etoan ntáχρο ch'án kixin:

28 —Jeheni kjuanjonhyani kjuachaxin kixin tsjákorá ihnié tí nkexro a. ¿A ntá nkehe kjuích'erá jahará? Kuenté chjasin Jerusalén tsíkjákorá. La tjinkáonrá tsékaráni jie kixin jeheni tsík'óyánni tí ch'ín a —ichro ch'án.

29 A ntá ch'ín Pedro la ko tí iso sín kjueyá Jesús ntáχρο sín kixin:

—A ntá jeheni t'ichjánxin sinchexiteyéheni Dios senó. A ntá chr'éxin sinchexiteyéheni chojni.

30 Tí Dios tsíkinkáchónki tí sín tsík'axjeníxinni ósé mé kjuínchexechón Jesús, ti nkexro a mé kjuakénkanirá tí ntacruz tsík'oyánrá.

31 Ntá ijie tjeko ch'án Dios nkaya nkajní la nánko itja chjina Dios mé tjen ch'án la Dios kjuích'éna ch'án ijnko nkexro t'etoan kixin sinchekaá ch'án chojni kixin tí nación Israel chrókjan chrókuinkáchónki sín Dios ntá chrók'uitjayan tí jie chóna sín.

32 La ko kjaxin jeheni chrónkani kaín tí nkehe k'uíkonní kjuachaxién Nchakuen Dios. Tí

Nchakuen ch'án mé chjéhe Dios kaín tí nkexro chaxín sinchexiteyéhe tí jehe ch'án.

³³ La ntá tí sín t'etoan a mé kuínhin sín tíha ntá kónínkaon sín la ko tjínkaon sín chrók'óyán sín tí sín a.

³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthehe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uetōan ch'án kixin tí sín tsíkjejá Ìnchéni mé ts'axrje sín ntója intsí, ichro ch'án.

³⁵ Na ntá nixjehe ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin koha nkehe chrókjuich'eherá tí sín a.

³⁶ Xráxinkáonrá kixin senó kjuák'e ijnko ch'ín it'in Teudas la tónhen asén ch'án kixin imá t'etoan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'ín a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuèxín tí xrā k'uékjich'e sín.

³⁷ Ntá chr'éxin tió xrenájín kaín ihnié chojni k'uéjó na ntá ikjui í jnko ch'ín mé it'in ch'án Judas la kjuixin ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín xín tí sín kjuíchréhe ch'án xíka sín sákjuí sín inaá.

³⁸ Méxrā tītōherá tjiatéhyará tí jehe sín a. A ntá tí tjejóch'e sín xrā kuènte chojni ó la kjaxin ts'itjáyán.

³⁹ A ntá tí chaxín tjako sín kjuachaxién Dios ntá tsjachahyará sinchek'itjáyánrá tíha. Méxrā tītōherá sín kixin tsjánjonkohyará Dios.

⁴⁰ Na ntá kaín tí síxreé mé kuítekaon sín la ntá k'uíyehē sín tí sín kjueyá Jesús. La ntá kjuate sín la xík'etueñhen sín kixin í tsonixjahya sín ihnié Jesús la ntá kjuanjon sín kjuachaxin kixin sátsji sín.

⁴¹ Ntá tí sín kjueyá Jesús mé k'uaxrjexín sín tí tjejó tí sín t'etoan kjónté xíkaha kónhen sín la chéhe sín kixin Dios kjuanjon kjuachaxin kjuasóte sín kixin tí kjuako sín ihnié Jesús.

⁴² Kuítóehya sín tsjako sín kuènte Jesucristo kaín yaon tí nkaxenhen n̄inko la ko tí jnkojnko ntoe chojni.

6

Kjueyá sín yato chojni tsjinkitsa

¹ Na ntá tí yaon a tjoka sitinkákótsjé tí sín tinkáchónki Ìnchéni. A ntá tí sín nixja nkiva griego mé kónínkakonhen sín tí sín nixja nkiva hebreo. Ntáchro sín kixin tí sín chjin k'án kuènte sín la kánhyó jína k'uáyéhe tí nkehe síxikayehe sine sín jnkojnko yaon, ichro sín.

² Na ntá tí teyó tí sín tsíkjejá Jesús mé k'uíyehē sín kaín tí sín tinkáchónki Ìnchéni. Ntá nixjehē sín, ntáchro sín kixin:

—Jeheni la jehya jína tsítóheni tí xrā tjakoni itén Dios, kixin ntá sit'aharáni xrā ts'óxikayeheni tí nkehe sine tí sín k'án.

³ Méxrā jahará kichó ni tsjéyará yato chojni ntoa tí tjejorá, tí chojni jína choxinrá la ko nohe sín la ko antsí chóna sín Nchakuen Dios mé tí sín a sinchek'áyeheni tí xrā a.

⁴ A ntá jeheni la tsonixjeheni Dios la ko tsinkákjakoni itén ch'án —mé xíkaha ichro sín.

⁵ La ntá kaín sín mé kuínhin sín xikaha ntá jnkokoá kjuenkayáxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko antsí chóna ch'án tí Nchakuen Dios. La kjaxin kjueyá sín ch'ín Felipe, la kō ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehe ch'án mé tsíkjixin ch'án chjasin Antioquía la ósé mé tsíkinkáchónki ch'án ti nkehe tinkáchónki tí sín judío.

⁶ Ntá kjuixin kjueyá sín tí sín a ntá kjuikao sín ti tjejó tí sín tsíkjejá Ìnchéni. La ntá tí sín a mé nixjehe sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nch'á judío kjuankíxin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kixin Dios tsíkjincheyaon ch'án la nchónhya kjuaxroan kjuakoxin ch'án tí siín chojni.

⁹ A ntá iso sín tsíkjixin tí nínko judío kuènte tí sín senó k'uejó esclavo sín tsíkjixin sín chjasin Cirene, la ko Alejandría, la ko Cilicia, la ko estado Asia, mé kjuankíxin sín ikjo sín ch'ín Esteban.

¹⁰ Kjonté xikaha la kjuachahya sín kixin Nchakuen Dios mé kjuínkítsa tí ch'ín Esteban nixja ch'án.

¹¹ Na ntá jehe sín mé kjuenkehe sín ókjé chojni kixin tsochrónka sín kixin kuínhin sín k'uántaxínhin ch'án ch'ín Moisés la ko Dios, ichro sín.

12 Mé xikaha k'uixité kaín chojni la ko tí sín t'et̄oan kuènte n̄inko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí siín tí síxreé a.

13 Kjaxin kjueyá sín chojni tsochrónka kixin ntoáhya kjuako ch'ín Esteban la ntáchro tí sín a kixin:

—Tí ch'ín a mé títoehya ch'án t'ántaxínhin ch'án tí n̄inko kuénténi la ko tí ley.

14 Ó kuínhinni kixin chrónka ch'án kixin tí ch'ín Jesús, tí ch'ín tsíkjixin chjasin Nazaret, mé sinchek'itjáyan ch'án tí n̄inkoeni ntihi la ko tsjitóxinhin ch'án tí nkehe tinkáchónkini mé tí nkehe tsík'et̄oan ch'ín Moisés —mé xikaha ichro sín.

15 Ntá tí síxreé la ko kaín tí sín sítjaxin ntiha la komá sín tí ch'ín Esteban la mé k'uikon sín kixin tí kàré ch'án mé éxí ijnko ángel mé xikaha tsjehe tí jehe ch'án.

7

Tí nkehe kjuátehe ch'ín Esteban

1 A ntá tí sín nchat'á t'et̄oan kjuanchankíhi sín tí ch'ín Esteban kixin:

—¿Á chaxín kaín tíhi tsintáchrua?

2 Na ntá jehe ch'án kjuátehe ch'án ntáchro ch'án kixin:

—Kaínrá kichó ni Israel la ko sín táda tinhínrá tí nkehe tsontáxrjan. Dios kuénteni chóna kjuachaxin mé kjuakohe ch'ín Abraham tí nkexro k'uaxrjeníxinni tió kjuák'e ch'án nación Mesopotamia tí naxa sátiyhya ch'án tsjak'e ch'án nonte Harán.

³ Dios tsíntáchro ḱixin: “Títóhé chjasán la ko kaín tí nkexro kjéhya. Na ntá sátjia tí nonte tsjákohá jaha.”*

⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehe ch'án tí nonte tjeorá ijie.

⁵ Kjánchó ch'ín Abraham la kuákjahya ch'án nít'ó nonte hasta ni tí tsjak'e toté ch'án la chóntahya ch'án. A ntá chrónka Dios ḱixin chaxín chr'éxin tió tsjixin ts'en ch'ín Abraham la tí sín ts'axrjeníxin ch'án mé ts'áyéhe sín tíha. Kjónté naxa kohya nijnko xjeen ch'án la mé xikaha ntáchro Ínchéni.

⁶ Kjaxin tsíntáchro Dios ḱixin tí sín ts'axrjeníxin ch'ín Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó.

⁷ La kjaxin xíntáchro Dios ínaá ḱixin: “Ntá chr'éxin janhan sintakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xikaha ichro Dios.

⁸ Na ntá Dios mé tsíkjo ch'ín Abraham ḱixin kaín tí chojni ntoa ts'axrjeníxin ch'án mé itsa sín xroye. Na ntá xikaha tió kokjíhi xjeen ch'an Isaac ntá ch'ín Abraham mé chjéhe ch'án xjan xroye tió xétjehe xjan ijní yaon. Ntá kjaxin xikaha kjuích'e ch'ín Isaac tió chóna ch'án xjeen ch'án Jacob, la ntá ch'ín Jacob la xikaha kjuích'e ch'án ínaá. Ntá tí sín a mé k'óna it'é tí teyó tribu tsík'axrjeníxin tí sín Israel.

⁹ Tí xjeen ch'ín Jacob mé tí sín k'uaxrjeníxinni

* 7:3 Génesis 12.1

ósé la jehe sín k'uéchjin_{oxín}hin sín tí kíchó sín José ntá kjuínchekji sín ch'án la tí sín k'uena la sákjuíko sín ch'án nó nación Egipto, kjánchó Dios mé kjuínkítsa tí jehe ch'án.

¹⁰ Dios mé kjuínchekaá ch'án tí náxrjónhya k'uékjak'e ch'án. La ko Dios kjuanjon kjuachaxin kixin imá tsonohe ch'án. Na ntá k'uíkon ch'ín Faraón tí rey kuènte nación Egipto a xíkaha tí xra jína kjuích'e ch'ín José ntá kjuanjon ch'án kjuachaxin kixin ts'et_{oan} ch'ín José tí nación Egipto la ko tí nt_oe ch'án.

¹¹ 'Na ntá kókjinta xrin_{ahya} la náxrjónhya k'uejó tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín.

¹² A ntá tsíkinhin ch'ín Jacob kixin tí nación Egipto mé sítóxi noa trigo ntá k'uetu_{enhen} ch'án tí sín xje_{en} ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín.

¹³ Ntá tí yóxin sákjuí sín ntiha ntá ch'ín José kjuínchenohe ch'án sín kixin tí sín a la savé ch'án. La ntá kjuak_{ohe} ch'án tí ch'ín Faraón tí sín naxa kjéhya ch'án.

¹⁴ La ntá k'uet_{oan} tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án.

¹⁵ Mé xíkaha kónhen la tí ch'ín Jacob mé sákjuí ch'án la kjuák'e ch'án nación Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha.

¹⁶ Ntá chr'éxin kuakitsjexín sín t_{oye} tí hués_{oé} tí ch'ín Jacob la sákjuíko sín tí nonte Siquem, la ntá ntiha mé kjuavá sín tí nonte tsík'ena ch'ín

Abraham mé tsík'enehe ch'án tí xjeen ch'ín Hamor chjasin Siquem.

17 'La ntá ó kuichjina tsoxiteyá tí nkehe tsíntáchro Dios tsíkjo ch'ín Abraham ntá tí sín Israel imá kótsjé sín nación Egipto.

18 A ntá xrínahya í jnko ch'ín rey kjuankíxin k'uetōan nación Egipto la k'uéchónhya ch'án tí ch'ín José.

19 La ntá tí ch'ín rey kjuích'iyehé ch'án tí sín naxa kjéhyani la ko kjuínchekjasóte ch'án sín. La tsík'etoan ch'án kíxin tí xjan ntoa na ntá kokjíhi mé tsjik'itjí sín xjan kíxin its'en xjan.

20 Na ntá tí yaon a tsíkokjíhi ch'ín Moisés ntá imá kóxrjínhin Dios tí xjan a. It'é la ko iné xjan mé k'uéchónta sín xjan iní nitjó koá ntoe sín.

21 Ntá chrokjuahya tsjak'emā sín xjan la ntá kjuíkjáka sín xjan. La ntá xjeen tí ch'ín rey kuènte Egipto mé kjuíkakja tjan xjan la sákjuíko tjan ntoe tjan la kjuínchek'ánkí tjan xjan éxí xjeen tjan xikaha.

22 La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetoan tí nkehe k'uéntáchro ch'án la kó tí nkehe k'uékjich'e ch'án.

23 'La ntá tió chóna tí ch'ín Moisés cuarenta nánó ntá tjínkaon ch'án tsjitsjehe ch'án tí sín israelita naxa kjéhya ch'án.

24 Ntaha mé k'uíkon ch'án kíxin ijnko chojni Egipto kjuate ijnko chojni naxa kjéhya tí jehe ch'án. Ntá chrókuinkítsa ch'án tí sín naxa kjéhya ch'án ntá k'óyán ch'án tí ch'ín Egipto a.

25 Kjuenkayáxin ch'án kíxin tí sín naxa kjéhya ch'án, mé tí sín israelita, mé tsonoexín sín kíxin

Dios mé tsíchr'án tí jehe ch'án sinchekaá sín ch'án. Kjánchó tí sín a kjuátsəanhya sín.

²⁶ La ntá í jnko yaon tí ch'ín Moisés k'uíkon ch'án kixin yaá sín israelita tjanjonko kichó sín. La ntá tjinkaon ch'án chrókjuít'oxin ch'án kixin chrokjuanjənhya sín. La ntáchro ch'án kixin: “Jahará jnkokoá kichuára la, ¿nkekuènté tjanjonrá?”

²⁷ A ntá tí nkexro chóna tí jie mé kónínkaon ch'án la kótéka ch'án tí ch'ín Moisés. Ntá ntáchro ch'án kixin: “¿Nkexro kjuanjon kjuachaxin kixin jaha k'óna juez kuènténi?”

²⁸ ¿Á tjinkávan ts'oyánni kjaxinni éxí k'oyán tí ch'ín Egipto ijna ní?”

²⁹ A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxí ijnko chojni tsíkjixin ókjé. Ntá ntaha tsíkótehe ch'án la ko kjuích'éna ch'án yaá xjan ntoa.

³⁰ Na ntá k'uaátsínka cuarenta nánó ntá tí nteje chjino jna it'in Sinaí mé xrínahya k'uíkon ch'án ijnko ángel tjenkákjan tí xrohi chríkjan tí ntayoa tjeche.

³¹ Ntá tí ch'ín Moisés la chrakon ch'án kixin xikaha k'uíkon ch'án la ntá kóchjinehe ch'án kixin chrótsjehe ch'án la ntá kuínhin ch'án itén Ìnchéni ntáchro kixin:

³² “Janhan mé Dios tinkáchónki tí sín tsík'axrjeníxian mé Abraham, la ko Isaac, la ko Jacob,” mé xikaha ichro Dios. Ntá tí ch'ín Moisés la kjuankixin chrakon ch'án la síxrànka ch'án ntá í tjinkakonhya ch'án tsotsjehe ch'án.

³³ Na ntá ntáchro Ìnchéni kixin: “Takítsje tokatá

kíxin tí nonte tinkatja la nonte tjóá chóntahya jje.

³⁴ Ó k'uíkuañ kíxin tí sín kuèntana mé imá tjejt-jasóte sín naciòn Egipto. La ó kuinhan kíxin t'èya sín. La ntá ijie ó k'uinka kíxin tsjínkítsa sín. Méxra xrakíá jaha tsétuañhan jaha sátsjia naciòn Egipto,"† ichro Dios.

³⁵ "Tí sín israelita mé kjuanoá sín tí ch'ín Moisés. Tsíntáchro sín kíxin: "¿Nkexro kjuanjon kjuachaxin kíxin jaha k'óna juez?" ichro sín. Kjánchó Dios ichr'án ch'án tí ch'ín Moisés kíxin ts'etoan ch'án la ko sinchekaá ch'án tí sín israelita kjuachaxin tí ángel k'uíkon ch'án chríkjan tí nta.

³⁶ Ntá tí ch'ín Moisés kuakitsjexín ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakoxin ch'án tí naciòn Egipto, la ko tí Ntayaon Kjátse, la ko tí nteje k'uáji sín cuarenta nánó.

³⁷ Jehé tí ch'ín Moisés a mé chénka tí sín israelita kíxin: "Dios mé tsochr'án ijnko chojni tsoníjja itén Dios ts'axrjeníxin tí sín kíchuará éxí ichr'án ch'án tí janhan. Títekákónhénrá tí jehe ch'án."‡

³⁸ Tí ch'ín Moisés mé kjuák'eko ch'án tí chojni tí k'uéjé sín tí nteje. Nta ijnko ángel mé nixjehe ch'án tí jnā Sinaí la ko tí sín k'uaxrjeníxinni mé k'uáyéhe sín tí tan tjanjon kjuachón, ntá tí tan mé k'uátsínka tí jeheni ijie.

³⁹ 'A ntá tí sín k'uaxrjeníxinni ósé mé tjinkakon-hya sín kíxin chrókuitekaon sín la kjuanoá sín tí ch'ín Moisés la ko tjinkaon ínaá chrókjan sín naciòn Egipto.

† 7:34 7.30-34 Éxodo 3.1-10 ‡ 7:37 Deuteronomio 18.15,18

⁴⁰ A ntá ntáche sín ch'ín Aarón kixin: “Tjinkaonni sich'éna ijnko dios kixin tsinkáchónkini kixin í noehyani nkehe kónhen tí ch'ín Moisés, tí nkexro kjuínkítsa k'uaxrjexínni naci^ón Egipto.”[§]

⁴¹ Ntá kjuínchekjanoya sín ijnko koxintáxjan la ntá k'óyán sín iko kjokehē tí nkehe tsíkjanoya a la imá kóchéhē sín k'uíkon sín tí nkehe tsík'ónaxín tja chojni.

⁴² A ntá Dios mé kuítóhe tí jehe sín kixin tsinkáchónki sín tí konotsé siín nkajní. Tíhi mé tsíkjin ijnko nkexro k'uéchrónka itén Dios ntáchro xíkíhi:

Jahará chojni Israel, ¿á k'oyánrá tí iko kjókanará tí janhan

tí cuarenta nánó k'uejorá nteje ní?

⁴³ Kja náhí, jehó tí nkehe kjuích'énará mé kjókehérá tí ko a. Kjuíkoará tí nínkoe tí dios Moloc la ko kjaxin kjuíkoará tí konotsé kuènte dios Renfán.

A ntá tí nkehe tsíkjich'énará jahará mé xráxinkákonxínrá éxí Dios kuèntará.

Méxra janhan tsakítsjexínrá tí tjejorá la tsétuānhánrá sátsjirá chjasin Babilonia.*

Mé xíkaha ntáchro Dios ósé.

⁴⁴ 'Naxa k'uéjó tí sín k'uaxrjeníxinni tí nteje la chón^ta sín ijnko nínko kamantá chón^ta tí ley tsík'etoan Dios. Tíhi kjuích'éna sín éxí tsík'etuenhen Dios tí ch'ín Moisés kixin sich'éna ch'án kaín nkehe k'uíkon ch'án.

⁴⁵ Ntá tí sín tsík'axrjeníxinni mé k'uáyéhe sín tí nínko kuítōnhen sín. Ntá tí sín kjuíkao ch'ín Josué

§ 7:40 Éxodo 32.1 * 7:43 7.42–43 Amós 5.25–27

mé kjuíkao sín tí n̄nko tió kjuacha sín k'uáyéhe sín í jnko nonte kuènte í so chojni kuakitsje Dios, kixin ts'áyéhe tí jehe sín. Mé xikaha kónhen hasta tí yaon kjuankíxin k'uətoan ch'ín David.

⁴⁶ Imá kjuíncheyaon Dios tí ch'ín rey David la ntá tí ch'ín David mé tjinkaon ch'án sich'éna ch'án ijnko n̄nko kuènte Dios mé tí Dios k'uékinkáchónki ch'ín Jacob.

⁴⁷ Kjánchó jehe ch'án kjuích'énahya ch'án tí n̄nko a. Tí ch'ín Salomón mé kjuích'éna.

⁴⁸ Kjánchó Dios nkaya nkajni chrohya tsjak'exenhen ijnko nchia tsíkjich'énaxín chojni itja. Ntáchro ijnko ch'ín nixja itén Dios kixin:

⁴⁹ Janhan Dios nkaya nkajní itjén tétəanxián ntá chjasintajni tjekjen totená.

¿Xá nkexéhe tí nchia chrókjuich'énará?

¿Xá nketí chrókjuak'é chrók'ok'ánaxián?

⁵⁰ ¿Xá jehya tjaná kjuít'ánaxián kaín tí nkehe ní?†
Mé xikaha ichro Dios.

⁵¹ 'A ntá jahará la icha asánrá xráxín títekákonhyará. Jahará tinhínrá kjánchó ich'erá éxí chojni chónhya Dios. Xráxín tjánjonkoará Nchakuen Dios. Jahará mé tóyóhará tí sín tsík'axrjeníxinrá ósé.

⁵² Tí sín tsík'axrjeníxinrá kjuínchekjasóte kaín tí sín tsíchrónka itén Dios. K'óyán sín tí sín k'uéchrónka kixin itsi tí nkexro chóntahya jje. A ntá ó kui tí nkexro a ntá jahará kjuínchekjirá ch'án ntá k'óyán sín ch'án.

† **7:50** 7.49–50 Isaías 66.1–2

⁵³ Jahará k'uayéherá tí nkehe k'uetōan Dios senó, mé tí nkehe chrónka tí ángel, la kjónté xikaha kuítekákonhyará —ichro ch'ín Esteban.

Ik'uén ch'ín Esteban

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kixin nínkakonhen sín ch'án.

⁵⁵ A ntá ch'ín Esteban antsí chóna ch'án Nchakuen Dios la konta ch'án nkajní k'uíkon ch'án kjuachaxién Dios la ko k'uíkon ch'án kixin ch'ín Jesús tjexín toté ch'án nánko tja chjina Dios.

⁵⁶ Ntá ntáchro ch'ín Esteban kixin:

—Tsjeherá kixin k'uíquān kixin xitjehe nkajní la ntaha itjen tí Xjeen Dios K'óna Chojni nánko tja chjina Dios.

⁵⁷ A ntá jehe sín la k'uikjehe sín ntatsjon sín la itsen k'uixité sín ntá sákjuí sín k'uixitja sín ch'án

⁵⁸ sákjuiko sín ch'án ikon chjasin ntá ixro chjehe sín ch'án. La tí sín tjanchia jie mé kuakitsje sín iké sín la k'uejo sín toté ijnko ch'ín ntasoá it'in Saulo kixin ts'ayakonhen ch'án tí ka a.

⁵⁹ La it'e sín xro ntá ch'ín Esteban mé chrónóehe ch'án Ìnchéni la ntáchro ch'án kixin:

—Ìnchéni Jesús takjá nchakuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kixin:

—Ìnchéni jaha mé tahya kuentá tí jie kjuasin sín. Mé xikaha ichro ch'án ntá ik'uén ch'án.

8

Ch'ín Saulo chrók'óyán ch'án tí sín tinkáchónki Jesús

¹ La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

A ntá tí yaon a na mé kjuankíxin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxin tinkáchónki Cristo mé xíkayehé sín sákjuí sín nkuíxín estado Judea la ko estado Samaria. A ntá jehó tí sín tsíkjoyá Jesús mé kuítóhe sín ntiha.

² Na iso sín imá tinkáchónki Dios mé kjuavá sín ch'ín Esteban la ko tsjánkàma sín ch'án la ko t'avéhe sín ch'án.

³ A ntá tí ch'ín Saulo la kjuankíxin kónínkakohen ch'án tí sín tinkáchónki Cristo. K'uíxehen ch'án jnkojnko jnkojnko ntøe sín la itsé ch'án tí sín ntoa la ko tí chojni chjin. La ntá kuinkánkákjen ch'án sín sákjuiko ch'án sín kíxin ts'ejóchjina sín.

Kjuako sín itan jína tí estado Samaria

⁴ A ntá tí sín sákjuíxin chjasin Jerusalén mé xritjako sín nkexrí tí tan tsaáxinni nkuíxín tí sákjuí sín.

⁵ La ijnko ch'ín it'in Felipe mé sákjuí ch'án ijnko chjasin estado Samaria la kjuankíxin ch'án chrónka ch'án itan kuènte Cristo.

⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'ín Felipe kíxin ó k'uíkon sín tí kjuaxroan kjuakoxin ch'án.

⁷ Itsjé chojni chóna nchakuen tí jínahya mé kuítóhe sín jína la tí nchakuen tí jínahya k'óyako k'uaxrjexín tí jehe sín. La nchónhya tí sín chóna chin xitjahya itji la ko tí sín síxénká toté mé kuítóhe sín jína.

⁸ A ntá imá kóchéhe kaín tí sín síin chjasin ntiha.

⁹ Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékinchexroan ch'án.

K'uékjich'iyehé ch'án tí sín estado Samaria ntáchro ch'án kixin ijnko chojni imá tjetóan tí jehe ch'án.

¹⁰ La kaín tí sín ntiha k'uejó sín kuínhin sín jína, mé tí chánjan ntsíntsi hasta tí chojni imá táda la k'uéntáchro sín kixin:

—Tí ch'ín i imá chóna ch'án tí kjuachaxin kuènte Dios —ichro sín.

¹¹ K'uékitekakonhen sín ch'án kixin k'uékjinchexroan ch'án k'uékjich'iyexin ch'án sín itsjé nánó.

¹² Ntá tió kuítekaon sín tí tan jína kjuako ch'ín Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuíkite sín.

¹³ A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankixin k'uájiko ch'án tí ch'ín Felipe la imá chrakon ch'án kixin k'uíkon ch'án tí kjuaxroan jié kjuasin tí ch'ín Felipe.

¹⁴ A ntá tí sín apóstol, mé tí sín tsíkitohe chjasin Jerusalén, kuínhin sín kixin itsjé tí sín estado Samaria ó kuítekaon sín itén Dios. Ntá k'uetuènen sín ch'ín Pedro la ko ch'ín Juan sátsji sín ntiha.

¹⁵ Ntá tió kjuíji sín ntá kjuanchehe sín Dios kixin tí sín ntiha tinkáchónki Cristo chrók'uáyéhe sín Nchakuen Dios

¹⁶ kixin nijnko tí jehe sín ntiha naxa tsík'áyèhya sín Nchakuen Dios. Jehó tsíkikitexín sín ihnié Ìnchéni Jesús.

¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

18 Na ntá tí ch'ín Simón mé k'uíkón ch'án kixin tí sín apóstol k'uejotja itja sín chrítaón kja tí sín a ntá k'uáyéhe tí sín a Nchakuen Dios. La ntá xróxin ch'án chichaon

19 la ntáchro ch'án kixin:

—Chjehéni jeheni tí kjuachaxin kixin kjaxin jeheni chrókjuak'etja itjani chrítaón ikja jnkojín chojni ntá chrók'uáyéhe sín Nchakuen Dios —ichro ch'án.

20 Ntá ntáchro ch'ín Pedro kixin:

—Jaha la ko tí chichakóán ts'itjáyankoa kixin tjenkayáxian kixin chrók'uèna tí kjuachaxin kuènte Dios.

21 Jaha chontahya kjuachaxin ts'ixenhén tí xra a kixin ó nohe Dios kixin jaha la tjuáhya asán.

22 Méxra tsitohé tí ijá la chrónóhé Dios kixin ách'e tsjakjínhan ch'án tí jie tjenkayáxian.

23 Ó t'íkuān kixin imá chjinoxínhin asán la ko nchónhya jie chonta —ichro ch'ín Pedro.

24 La ntá ch'ín Simón kjuátehe ch'án ntáchro ch'án kixin:

—Nixjehérá Ìnchéni kixin tí janhan kixin chrókónnahya tí janhan éxí tí ntáchrórá —ichro ch'án.

25 Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya ti chjasin ntsíntí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkixin nación Etiopía

26 A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kixin:

—T'ínkatjen sátjia nó sur tsoxeta tí ntia t'inkajinxin chjasin Jerusalén hasta chjasin Gaza —ichro tí ch'ín ángel.

Na ntá tí ntia a mé ijnko ntia t'atsínka nó nteje.

²⁷ Na ntá tí ch'ín Felipe k'uínkatjen sákjuí tí ntia. La ntiha xrínahya xeta ch'án ijnko chojni tsíkjiixin nó nación Etiopía. Jehe ch'án mé ijnko chojni eunuco mé tja ch'án siín chichakoen tí tjan reina Candace t'etuenhen tí nación Etiopía. Jehe ch'án sátsíkji ch'án chjasin Jerusalén xraxinkakonxín ch'án Dios.

²⁸ A ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka itén Dios.

²⁹ La ntá tí Nchakuen Dios mé k'uétuenhen tí ch'ín Felipe ntáchro kixin:

—Sátjia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin tí ch'ín a tí xroon tsíkjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntáchro ch'án kixin:

—¿Nkexrí chrókuiánxian kixin kohya nkexro tsjinkitsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjixin chjinaxón tí tjen ch'án.

³² Na tí xroon itén Dios tjenchekuáxin ch'án mé tíhi:

Jehe ch'án mé sákjuíko sín éxí ijnko kolélo kjuíko sín ts'óyán sín.

La éxí ijnko kolélo tsjánkahya tió kjínhin sín kaxree
 va
 mé xíkaha jehe ch'án ninkehó xítjeehya ir'va
 ch'án,

³³ K'uíkon sín ch'án éxí ijnko chojni chóna jje la
 ntoáhya kjuínchekjasóte sín ch'án.

Kohya nkexro tsjacha tsochrónka kuènte tí sín
 chrók'uaxrjeníxin ch'án

kíxin jehe ch'án la k'uenxín ch'án chjasintajni.*

Mé xíkaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án
 tí ch'ín Felipe ntáchro ch'án kíxin:

—Tsotsenkávan chrónka nkexro tsonhen tíha.
 ¿Á jehe ch'án tsonhen tíha o á ókjé nkexro ní? —mé
 xíkaha kjuanchankí ch'án.

³⁵ La ntá tí ch'ín Felipe kjuankíxin chrónka ch'án
 kuènte tí nkehe tjenchekuáxin tí ch'ín a la chrónka
 ch'án tí tan jína kuènte Jesús.

³⁶ A ntá xrínahya kjuíji sín tí tjiá ntá, ntá ntáchro
 tí ch'ín eunuco kíxin:

—Tsjuhé tjiá ntá. ¿Á xitjahya chrókuíkítina?
 —ichro ch'án.

³⁷ Na ntá ntáchro tí ch'ín Felipe kíxin:

—Ti kuítekávan kaín asán la kjá jína tsikitia.

La ntá kjuátehe tí ch'ín a, ntáchro ch'án kíxin:

—Títekavan kíxin tí Jesucristo la Xjeen Dios
 —ichro ch'án.

³⁸ La ntá tí ch'ín tsíkjixin Etiopía a k'ueŋoan ch'án
 tsochónhen tí carro a la ntá yóí sín mé tí ch'ín Felipe
 la ko tí ch'ín tsíkjixin Etiopía mé k'uínkajin sín ntá
 kjuiánkí sín ntá la tí ch'ín Felipe kuíkíte ch'án tí
 ch'ín a.

* **8:33** 8.32–33 Isaías 53.7–8

³⁹ La ntá kjuixin k'uaxrjenkí sín ntá la ntá tí Nchakuen Ìnchéni sátsíkjiko tí ch'ín Felipe ókjé. A ntá k'uíkonhya kíchó sín inaá. Ntá kjónté xíkaha la tí ch'ín eunuco sákjuí ch'án la antsí chéhe asén ch'án.

⁴⁰ A ntá tí ch'ín Felipe xrínahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Ìnchéni kixin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'ín Saulo (Hch. 22.6-16; 26.12-18)

¹ A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Ìnchéni Jesús. Méxra sákjuítsjehe ch'án tí ch'ín nchat'á t'etoan.

² Ntá kjuanchia ch'án ijnko xroon kixin ts'áyéhe ch'án kjuachaxin kixin sátsji ch'án tí njnko chjasin Damasco tsjeyá ch'án tí sín kuákja ntja nixin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén.

³ La ntá kjuíji ch'án chjinaxón chjasin Damasco, a ntá xrínahya titàya ikui ijnko xrohi t'inkaséyan kuixin nkaya nkajní k'uantatjen ch'án a.

⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kixin:

—Saulo, Saulo, ¿nkekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kixin:

—¿Xá nkexro jaha?

Ntá tí tan mé kjuátéhe, ntáchro kixin:

—Janhan mé Jesús, mé tí nkexro xritjéyá jaha.

⁶ T'àya sàtjia. T'ixenhén tí chjasin Damasco, ntá ntiha mé tsinhín nkehe s̄ich'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uikonhya sín ninkexró.

⁸ La ntá tuénxín k'uàya ch'ín Saulo ntá kuak-itjenk̄i ch'án ikon ch'án kjánchó t'ikonhya ch'án. A ntá tí sín xriko ch'án tinkátséhe sín itja ch'án sákjuíko sín ch'án chjasin Damasco.

⁹ A ntá ntiha kjuák'e ch'án la iní yaon k'uikonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ A ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uíkuèn ch'án Ìnchéni ntáchro kixin:

—Ananías.

A ntá ch'ín Ananías mé kjuátēhe ch'án kixin:

—Ntihi tjenni, Ìnchéni.

¹¹ Ntá ntáchro Ìnchéni kixin:

—T'inkatjen sàtjia tí ntja it'in Ntja Ntoí. Ntá tió tsjasán ntoe ch'ín Judas tjanchankíhí sín á ntahya itjen ijnko ch'ín tsík̄jix̄in chjasin Tarso me it'in ch'án Saulo. Jehe ch'án mé tjechrónóana ch'án.

¹² A ntá titàya k'uíkuèn ch'án kixin tsjiji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehe ch'án kixin xik'ikon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

—Ìnchéni náhí, tsjihyani kixin ó kuínhinni chrónka nchónhya chojni kixin nkexrí xéhe tí ch'ín

a. Imá tsjé nkehe jehya jína kjuích'ehe ch'án tí sín kuítekaon tí jaha chjasin Jerusalén.

¹⁴ A ntá jie la ó kjui ch'án ntihi kixin tsík'áyéhe ch'án kjuachaxin kuènte nchat'á t'etōan kixin tsotsé ch'án kaín tí sín tinkáchónki ihnjá.

¹⁵ Kjánchó Ìnchéni ntáchro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakōhe ch'án tí sín ókjé naciōn la ko tí sín rey la ko kjaxin tí sín israelita.

¹⁶ Janhan tsjākōhā ch'án kixin nchónhya tsjasóte ch'án kixin tsinkáchónkina ch'án.

¹⁷ A ntá ch'ín Ananías sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíchóni Saulo, Ìnchéni Jesús, tí nkexro k'uíkuan tí ntja k'uinkaxian, mé k'uetuanna kjuiha kixin sintak'ikuan inaá la ko ts'ayéhé Nchākuen ch'án —ichro tí ch'ín Ananías a.

¹⁸ Ntá tuénxín k'uanotjēnxin ikon ch'ín Saulo ijnko nkehe éxí kjoe koche xikaha. Ntá xík'ikon ch'án inaá. La ntá k'uínkatjen ch'án la ko kuíkite ch'án.

¹⁹ La ntá chr'éxin ntá kjóne ch'án la ntá ikjan asén ch'án inaá. Ntá kuítóhe ch'án iso yaon k'uéjóko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

²⁰ Na ntá kjuankixin ch'ín Saulo kjuakōxin ch'án iso ninko Israel kixin Jesús mé Xjeen Dios.

²¹ La kaín tí sín tjejótinhin imá chrakon sín la ntáchro sín kixin:

—¿Á jehya tí ch'ín i tjinkaon sinchek'itjáyan ch'án kaín tí chojni tinkáchónki Jesús chjasin Jerusalén? ¿Á jehya tí xra a kjuixin ch'án ntihi kixin tsotsé ch'án sín la sátsjiko ch'án sín tí tjejó tí sín nchat'á t'etoan? —ichro sín.

²² Kjánchó antsí má fuerte kjuako ch'ín Saulo kixin chaxín tí ch'ín Jesús mé tí Cristo. La tí sín judío k'uéjé chjasin Damasco kjuachahya kjuachaxin sín ch'án.

Kjuachahya tí sín judio chrótsé sín tí ch'ín Saulo

²³ Na ntá ó k'uátsínka nchónhya yaon ntá tí sín judío kjuenkayáxin sín nkexrí chrók'óyán sín tí ch'ín Saulo.

²⁴ A ntá ó kuínhin ch'án nkehe kjuenkayáxin sín. A ntá nchakotjin la ko tie tjejóchónhen tí sín chrók'óyán tí jehe ch'án tí ntója ts'axrjexín ch'án chjasin.

²⁵ A ntá tí sín tinkáchónki Ìnchéni mé kjuak'enkaya sín tí ch'ín Saulo ijnkontaxra jié ijnko tie. Ntá kjuinkajinxin sín tíntaxra tjenkaya tí ch'ín Saulo nóton tí tjat'o tsík'antatjen tí chjasin a. Ntá kuaá ch'án.

Ch'ín Saulo sákjuj chjasin Jerusalén

²⁶ Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kixin kuítekakonhya sín kixin á chrókóchaxín kjaxin ch'án tinkáchónki ch'án Ìnchéni.

²⁷ A ntá ch'ín Bernabé mé sákjuíko ch'án tí ch'ín Saulo ti tjejó tí sín apóstol la ntá chrónka ch'án kixin ch'ín Saulo mé tsík'ikon ch'án Ìnchéni tí ntia

sákjuí ch'án ntá Ìnchéni mé nixjehe ch'án. Méxra chjasin Damasco k'uékjako ch'án ihnié Ìnchéni la chrakonhya ch'án.

²⁸ Méxra ch'ín Saulo kuítóhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxién ihnié Ìnchéni Jesús.

²⁹ La ikjo ch'án tí sín judío nixja nkiva griego. A ntá jehe sín la tjinkaon sín chrók'óyán sín tí jehe ch'án.

³⁰ A ntá tí sín kichó ni tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uetuēnhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjó sín la antsí má tinkáchónki sín Ìnchéni. K'uéchónta sín kjuasáyé Ìnchéni la ko tí Nchakuen Dios kjuínkítsa sín la ntá antsí má sítinkákótsjé sín.

Ch'ín Eneas kuítóhe ch'án jína

³² Na ntá tí ch'ín Pedro xritsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kichó ni tjejó chjasin Lida.

³³ Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kíxin tsík'en toté ch'án.

³⁴ Na ntá ntáchro ch'ín Pedro kíxin:

—Eneas, Jesucristo mé sintakitoha jína ijie. T'inkatjen tjatsiyan camá —ichro ch'án.

Na ntá ch'ín Eneas tuénxín k'uínkatjen ch'án.

³⁵ La kaín tí sín siín chjasin Lida la ko chjasin Sarón k'uíkon sín kixin kuítóhe ch'án jína la ntá kjaxin sín kuinkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkiva griego la mé t'axrjexín kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkítsa tjan tí chojni nòà.

³⁷ Ntá ijnko yaon imá kóníhi tjan ntá ik'uén tjan. La ntá kjuínchek'ónti sín cuérpóé tjan la ntá tí yóxin piso noi kjuak'e sín tjan.

³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kixin ntiha tjen ch'án. Ntá ichr'án sín iyó chojni tsontáche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjen tí cuérpóé tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan.

⁴⁰ A ntá k'uetoan ch'ín Pedro kixin kaín sín ts'axrje sín ntója. Na ntá kjuák'exín toch'in ch'án nixjehe ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'àya.

Ntá kuakitjenki tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjaxin tjan.

41 **A** ntá itsé ch'án itja tjan la k'uínkatjen tjan. La ntá k'uíyehé ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'ikon sín kixin ó xíxechón tjan.

42 Na ntá kaín sín siín chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni.

43 **A** ntá ch'ín Pedro kuitóhe ch'án itsjé yaon tí chjasin a la kjuák'e ch'án ntoe ch'ín Simón, ijnko ch'ín nchentá tjoé iko.

10

Ch'ín Pedro la ko ch'ín Cornelio

1 Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'uetuēnhen tí sín soldado italiano.

2 Tí ch'ín a la imá jína ch'án la kaín tí sín kjéhya ch'án mé imá xraxinkaon sín Dios. Kjaxin kjuanjon ch'án nchónhya chichaon kixin tjinkaon ch'án tsjinkĩtsa tí sín judío la ko xráxín nixjehé ch'án Dios.

3 La ntá ijnko yaon las tres kónjín titàya k'uíkuèn ch'án ijnko ángel kuente Dios k'uixenhen tí tjen ch'án ntáchro kixin:

—Cornelio.

4 **A** ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjínhìn kixin tí nixjehé ch'án la ko tí jína ch'e tjínkĩtsa tí sín nòa.

⁵ Ntá jaha tétuēnhén jnkojín chojni sátsji chjasin Jope ḱixin tsjikakjín sín ch'ín Simón kjaxin it'in ch'án Pedro.

⁶ Itjen ch'án ntōe ijnko ch'ín kjaxin it'in Simón. Tí ch'ín a mé nchentá tjoé iko. Mé tjen ntōe ch'án chjinaxón tí ntāyaon a.

⁷ Ntá tió sákjuí tí ángel nixjehe ch'ín Cornelio la ntá jehe ch'an k'uíyēhe ch'án yaá sín ch'ehe ch'án xra la ko ijnko ch'ín soldado kjaxin xraxinkaon Dios, la chóntehe sín kjuasáya kíchó sín.

⁸ Ntá kjuixin chénka ch'án kaín sín tí nkehe k'uíkon ch'án ntá k'uetuēnhen ch'án sín sátsji sín chjasin Jope.

⁹ Í jnko yaon chr'éxín chjina chonḱixin tjejóyá sín ntía chjino chjasin Jope ntá ch'ín Pedro mé k'uit'ótjen ch'án chrítaón nchia ḱixin ntaha nixjeexín ch'án Dios.

¹⁰ Ntá imá k'uén ch'án kjinta la tjinkaon ch'án chrókjóne ch'án. Nachrohe tsochján tí nkehe sine ch'án la ntá titàya k'uíkuèn ch'án nkehe

¹¹ mé k'uíkon ch'án ḱixin xitjehe nkaya nkajní ntá ntiha k'uínkajinxin ijnko ka jíé. Kanoé punté tí ka tjejóte.

¹² Tí nkaxenhen tí ka a tjinká ko noó toté la ko konche la ko kaín ko xritjaká.

¹³ Ntá kuínhin ch'án nixja ijnko nkexro ntáchro ch'án ḱixin:

—Pedro, t'àya, t'oyán tí ko a ntá inte.

¹⁴ Ntá ch'ín Pedro kjuátehe ch'án ḱixin:

—Náhí, Inchéni. Nunca nehyani tí nkehe tjuáhya.

¹⁵ Ntá kjuátehe tí tan ínaá ntáchro ḱixin:

—Tí nkehe ó kjuínchetjóá Dios. La ntáchrohya kixin tjuáhya —ichro ch'án.

16 Xikaha kónhen iní veces ntá tuénxín sákjuí tí ka nkaya nkajní.

17 Ntá ch'ín Pedro naxa tjenkayáxin ch'án nkehe t'axrjexín tí k'uíkon ch'án la xrínahya ó kui tí sín ichr'án ch'ín Cornelio ntója nchia. Ó tsíkjanckhíkí sín nketí tjen ntøe ch'ín Simón.

18 Ntá kjuanchankí sín itsen kixin:

—¿Á ntihi tjen ch'ín Simón kjaxin it'in ch'án Pedro?

19 Naxa tjenkayáxin tí ch'ín Pedro tí nkehe k'uíkon ch'án ntá Nchakuen Dios chrónka kixin:

—Tsjehe ó kui iní sín xritjeyá tí jaha.

20 T'aya t'inkajían sátjikoá tí sín a. Tóxakuanhya jaha, janhan mé kuétuanhan sín ikui sín —ichro Nchakuen Dios.

21 Ntá k'uínkajin tí ch'ín Pedro tí tjejó tí sín a ntá ntáchro ch'án kixin:

—Janhan tí nkexro xritjeyará. ¿Nkehe tí tsonhen tjinkáonrá?

22 Ntá kjuátehe sín ntáchro sín kixin:

—K'uetøan tí ch'ín capitán Cornelio ikuini ntihi. Jehe ch'án me ijnko chojni imá jína la ko xraxinkaon ch'án Dios. Káin tí sín judío tjikosáyehe ch'án la ko tjuèhe sín ch'án. Ijnko ángel kuente Dios mé nixjehe ch'án chénka ch'án kixin chrók'uíyehé ch'án tí jaha kixin chrókjuia ntøe ch'án la ntá chrókuinhiñ ch'án tí nkehe tsontáchrúa —mé xikaha chrónka sín.

23 Na ntá tí ch'ín Pedro kjuanjon kjuachaxin kixin ntahó chrók'øk'éhe sín ti tie a. Ntá kóyaon

ntá sákjuiko ch'án sín. Kjaxin iso sín tinkáchónki Ìnchéni tjejó chjasin Jope mé sákjuikotoxin sín.

²⁴ Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kaín sín kjéhya ch'án la ko tí sín chóxin ch'án. K'uíyehé ch'án tí jehe sín kixin tsinhin sín.

²⁵ Ntá tió kjuíji tí ch'ín Pedro ntøe tí ch'ín Cornelio ntá k'uaxrjexín ch'án nchia nixjehé kichó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án.

²⁶ A ntá tí ch'ín Pedro kjuínchek'inkatjen ch'án tí ch'ín a la ntáchro ch'án kixin:

—T'inkatjen. Tjak'exián totá. Janhan mé ijnko chojni éxí tí jaha.

²⁷ A ntá kjuixin ikjo sín la ntá k'uixenhen sín ntøe ch'án la ntá k'uikon tí ch'ín Pedro kixin nchónhya chojni tsíkójnksé ntiha.

²⁸ Ntá ntáchro ch'án kixin:

—Jahará nohará kixin tí jeheni judíoni chóntahyani kjuachaxin tsojnkotsékoni chojni ókjé la ko chóntahyani kjuachaxin ts'ixenhenni ntøe chojni ókjé. Kjánchó Dios kjuakona kixin xitjahya tsontáxrjan kixin tjuáhya nijnko chojni.

²⁹ Méxra tió k'uíyanará la tjoka k'uinka. Tjínkavan chrókónona kixin nkekuènte k'uíyanará.

³⁰ Ntá kjuátehe ch'ín Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntøeni kjónehanyi la nixjeheni Dios. Ntá xrínahya k'uikonni ijnko chojni chóna iké tjákini.

³¹ La ntáchro ch'án kixin: “Cornelio, ó kuínhin Dios tí nkehe nixjehé ch'án la ó nohe ch'án kixin imá tjinkitsa jaha tí chojni nòa.

³² Méxra tétuēnhén chojni sátsji chjasin Jope kixin tsjikakjín sín tí ch'ín Simón mé kjaxin it'in ch'án Pedro. Itjen ch'án ntoe ijnko ch'ín mé kjaxin it'in Simón nchentá ch'án tjoé iko. Chjino tí ntayaon a itjen ntoe ch'án,” ichro tí ángel.

³³ Méxra xikaha tjoka ichr'ánni sín tsíkjeyá sín tí jaha. Jína k'uinka ntoeni. Ntá ijie ó nohe Dios kixin kaín ni tjinkaonni tsinhinni nkehe tí k'uētuanhan Ìnchéni tsochronka tsinhinni.

Ch'ín Pedro kjuakohe ch'ín Cornelio ntoe ch'án

³⁴ Ntá ntáchro ch'ín Pedro kixin:

—Ijie ó t'íkuān kixin jnkokón t'íkon Dios kaín xín chojni.

³⁵ Tí nkexro kaín nación titekaon la chónthe kjuasáyé Dios la mé tóxrjínhin ch'án.

³⁶ Dios mé nixjehe ch'án tí sín k'uaxrjeníxin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehe ch'án mé Ìnché ch'án kaín nkehe.

³⁷ Jahará ó nohará jína kaín tí nkehe tsíkónhen nkuíxín tí tjejó tí sín judío mé kjuankíxin estado Galilea tió kjuixin kjuako ch'ín Juan kixin t'ichjánxin tsikite chojni.

³⁸ Jahará ó nohará kixin Dios kjuanjon kjuachaxién ch'án la ko Nchakuen ch'án k'uáyéhe tí ch'ín Jesús tí nkexro tsíkjiín chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jína kjuích'e ch'án kixin kjuínchekitohe ch'án jína kaín chojni tjasótexín kaín tí kjuachaxién tí jínahya. Mé xikaha jína kjuích'e ch'án kixin Dios tjeko tí jehe ch'án.

39 A ntá jeheni mé chaxín k'uíkonní kaín tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'éxin kjuak'enkani sín ch'án ijnko ntacruz la k'óyán sín ch'án.

40 A ntá Dios kjuínchexechón ch'án tí nixin yaon la kjuanjon ch'án kjuachaxin kixin k'uíkonní ch'án inaá.

41 Jehya kixin kaín chojni chrók'uikon sín ch'án. Náhi. Jehó tí sín tsíkjejá Dios kixin ts'ikon chaxín xechón ch'án. Jeheni kjónekoni ch'án la ko k'uíkəoni ch'án tió xíxechón ch'án inaá.

42 K'ueətoan ch'án kixin jeheni tsjakəhəni chojni la tsochrónkani kixin jehe ch'án mé tí nkexro juez sinchekitoəxín ijié tí sín tjejóchón la ko tí sín ó tsík'en.

43 Kaín tí sín k'uechrónka itén Dios mé chrónka sín kixin jnkojnko tí sín tinkáchónki Jesús mé ts'óxika ch'án ijié sín —ichro ch'ín Pedro.

Tí sín jehya judío k'uáyéhe sín Nchəkuen Dios

44 Naxə tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchəkuen Dios.

45 Ntá tí sín judío kjuikotoxin ch'ín Pedro la chrakon sín kixin Dios mé kjuanjon Nchəkuen ch'án, kjaxin k'uáyéhe tí sín jehya judío.

46 Méxra kuínhin sín nixja sín jnkojnko nkiva ókjé la ko kuínhin sín tjanchehe sín Dios kjuasáya.

47 Ntá ntáchro ch'ín Pedro kixin:
—Jehe sín ó k'uáyéhe sín tí Nchəkuen Dios xikaha jeheni. Ntá chrókjuanjonni kjuachaxin kixin tsikite sín —ichro ch'án.

48 La ntá k'ueətoan ch'ín Pedro kixin tsikite kaín sín kjuachaxién ihnié Jesucristo. Ntá tí sín kuíkite

mé kjuanchia sín kixin chrókuitohe tí ch'ín Pedro ntiha iso yaon.

11

Nixjehe ch'ín Pedro tí sín tinkáchónki Cristo chjasin Jerusalén

¹ Na ntá tí sín tsíkjejá Ìnchéni la ko kaín tí sín tinkáchónki Ìnchéni k'uejój estado Judea mé kuínhin sín kixin tí sín jehya judío ó tinkáchónki sín itén Dios.

² Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án.

³ Kjuanchankíhi sín ch'án ntáchro sín kixin:

—¿Nkekuènté kjuítsjehé tí sín jehya judío, la ko kjóntekoa tí jehe sín? —mé xikaha kjuanchankí sín.

⁴ Ntá tí ch'ín Pedro kjuankíxin ch'án chrónka ch'án desde tí xrankixíxin kaín nkehe tsíkónhen ch'án. Ntáchro ch'án kixin:

⁵ —Janhan mé kjuak'é chjasin Jope kjuak'énixjahā Dios. La ntá titàya k'uíkuèn ijnko ka jié k'uínkajinxin nkaya nkajní. Kanoé punté tí ka tjejóte la kjuák'e chjino tí tjén.

⁶ Ntá tsjahā jína tí nkehe la k'uíkuən kixin tí nkaxenhen tí ka tjinká ko noó toté la ko iko nteje la ko konche la ko iko xritjaká.

⁷ La kjaxin kuínhan itén ijnko nkexro nixjana ntáchro ch'án kixin: “Pedro, t'aya t'oyán tí ko a ntá inte.”

⁸ A ntá kjuátahā kixin: “Náhí, Ìnchéni. Nunca nehvani tí nkehe tjuáhya.”

⁹ A ntá kjuátehe tí tan kuixin nkaya nkajní a inaá chrónka kixin: “Tí nkehe a mé ó kjuínchetjóá Dios. La ntáchrohya kixin tjuáhya,” ichro ch'án.

¹⁰ Xikaha kónhen iní veces. Ntá sákjuí kaín tí nkehe a nkaya nkajní inaá.

¹¹ Ntá xrínahya tuénxín kjuíji iní chojni ntoá tí nchia tjejóni. Tsíkjixín sín chjasin Cesarea xritjeyá sín tí janhan.

¹² Tí Nchakuen Dios mé k'uetōan kixin sáchrókjuikian sín la chrókóxonahya. Kjaxin sákjuikian injon tí sín kichó ni tjejó i. Kaínni k'uixenhenni ntōe tí ch'ín a.

¹³ A ntá tí ch'ín ntōe ntiha mé chrónka ch'án kixin k'uikon ch'án ijnko ángel tjejín toté la nixja ntáchro kixin: “Tétuenhén chojni sátsji chjasin Jope kixin tsjikakjín sín ijnko ch'ín it'in Simón la kō kjaxin it'in ch'án Pedro.

¹⁴ Jehé ch'án mé tsonixjaha ch'án tsochrónka ch'án nkexrí tsaá jaha la kō kaín tí sín kjéhya.”

¹⁵ Ntá kjuankíxian nixjaha sín na ntá ó kui tí Nchakuen Dios k'uáyéhe sín éxí k'uáyéheni tí senó a.

¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'án kixin: “A ntá chaxín ch'ín Juan ìntá ó kujkitexín ch'án chojni, a ntá ijie jahará tsikitiaxínrá tí Nchakuen Dios.”

¹⁷ Éxí xikaha jeheni tió kjuankíxian kuinkáchónkini Ìnchéni Jesucristo ntá kjuanjon Dios Nchakuen ch'án k'uáyéheni mé xikaha ijie la kjuanjon Dios tí Nchakuen ch'án k'uáyéhe tí jehé sín kjaxin. ¿Xá nkexro tí janhan kixin chrókjuánjonkian Dios? —ichro ch'ín Pedro.

¹⁸ A ntá tí sín kichó ni tjejó chjasin Jerusalén

kuínhin tí nkehe tsíkónhen ntá tání sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochrín —mé xikaha ichro sín.

Tí ninko chjasin Antioquía

¹⁹ Ti kjuixin k'uen ch'ín Esteban ntá kjuankíxin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakohe sín tí sín judío nkexrí tjen tí tan jína. A ntá tí sín jehya judío la náhi.

²⁰ A ntá í so sín tinkáchónki Ìnchéni tsíkjixin chjasin Chipre la ko tsíkjixin sín Cirene sákjuí sín chjasin Antioquía. Tió kjuíji sín ntiha mé kjuakohe sín tí sín jehya judío nkexrí tjen tí tan jína kuènte Ìnchéni Jesucristo.

²¹ Tí kjuachaxin kuènte Ìnchéni mé chóna tí jehe sín; méxra nchónhya tí sín ntiha mé kuítóhe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'án sín ch'ín Bernabé sákjuí ch'án ntiha.

²³ Ntá tió kjuíji ch'án ntiha ntá k'uíkon ch'án kixin Dios imá kjuínkítsa tí sín ntiha kjaxin. Ntá imá kóchéhe asén ch'án. Ntá nixjehe ch'án sín kixin kaín asén sín ts'ejó sín tsinkáchónki sín Ìnchéni.

²⁴ Ch'ín Bernabé la ijnko chojni imá jína asén la antsí chóna ch'án Nchakuen Dios la jína

tinkáchónki ch'án; méxra kóchjina nchónhya sín kuinkáchónki sín Ìnchéni.

²⁵ Kjuixin tíha a ntá ch'ín Bernabé sákjuí ch'án chjasin Tarso sákjuíkjeyá ch'an tí ch'ín Saulo.

²⁶ Ntá tió k'uitja ch'án ntá sákjuiko ch'án chjasin Antioquía. Ntá k'uejóko sín tí sín tinkáchónki Ìnchéni ntiha kuenté ijnko nánó la kjuakohé sín itsjé chojni. Ntiha chjasin Antioquía kjuankíxin sín kuikítexín sín tí sín tinkáchónki Cristo mé ihnié cristiano.

²⁷ A ntá iso sín chrónka itén Dios sákjuíxin sín chjasin Jerusalén la kjuíji sín chjasin Antioquía.

²⁸ Ijnko ch'ín it'in Agabo k'uínkatjen ch'án kjuák'exín toté ch'an tí tsíkójnkotsé tí sín tinkáchónki Jesús la kjuachaxién Nchakuen Dios chrónka ch'án kíxin tsokjinta nkuíxin ntiha. Tí nkehe chrónka ch'án mé chaxín kónhen tió kjuák'e ch'ín Claudio k'uetōan ch'án.

²⁹ A ntá tí sín tinkáchónki Ìnchéni chjasin Antioquía kjuenkayáxin sín kíxin jehe sín tsjinkítsa sín tí sín kichó sín tinkáchónki Ìnchéni estado Judea. La jnkójnko sín kjuanjon sín tí nkehe chóna sín.

³⁰ Mé xíkaha kjuenájín sín chichaon sákjuiko ch'ín Bernabé la ko ch'ín Saulo chjéhe sín tí sín t'ayakonhen njnko estado Judea.

12

Ik'uén ch'ín Jacobo la ko kjuák'echjina ch'ín Pedro

¹ A ntá tí yaon a tí ch'ín rey Herodes mé ntá kjuankíxin ch'án kónínkakonhen ch'án tí sín tinkáchónki Jesús.

² La k'uetoan ch'án kixin tí ch'ín Jacobo ts'enxín ijnko chica espada tjate. Jehe ch'án mé kichó ch'án tí ch'ín Juan a.

³ Ntá k'uíkon ch'ín Herodes kixin imá kóchéhe tí sín judío kixin xikaha kónhen la ntá kjaxin itsé ch'án tí ch'ín Pedro. Tíha mé kónhen tí yaon kia pascua tió kjóne sín niotja chóntahya tí xroan nchek'ánkí niotja.

⁴ Kjuixin itsé ch'ín Herodes tí ch'ín Pedro ntá chr'áxenhen ch'án ntóechiso. Ntá ntiha mé tjejónta noó grupo soldado la mé noó soldado jnkojnko grupo. Kjuenkayáxin ch'ín Herodes kixin tsjixin ts'átsínka tí kia pascua ntá sátsjiko ch'án tí ch'ín Pedro tí siín tí sín israelita kixin ts'ikon kuenté chjasin ntiha kixin nkexrí its'en ch'án.

⁵ Méxra ch'ín Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehe sín Dios kaín asén sín kixin tsjinkitsa Dios tí ch'ín Pedro.

Dios kjuínkitsa ch'ín Pedro k'uaxrjexín ch'án ntóechiso

⁶ Tí tie a mé kjuenkayáxin ch'ín Herodes kixin tsoyaon ntá tsakitsje ch'án ch'ín Pedro sátsjiko ch'án tí siín tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntóechiso.

⁷ A ntá xrínahya tuénxín ikui ijnko ángel kuènte Ìnchéni, a ntá tí nkaxenhen ntóechiso imá k'uínkaséyan ijnkòyé ntiha. Kjuak'etja itja tí ángel tí chjia ch'ín Pedro kjuínchekjayehe ch'án. Ntá k'uetoan tí ángel ntáchro kixin:

—Tjoka t'àya.

La ntá tí chica cadena tjejóchróntetoxín itja ch'ín Pedro mé k'uánótjen.

⁸ Ntá xík'etōan tí ángel ntáchro kixin:

—T'inkaya iká la tjanka tōkatá.

Ntá kuítekaon ch'ín Pedro la k̄jateē xík'etōan tí ángel ntáchro kixin:

—T'ítsate iká ntá chréhé sátsjini —ichro ch'án.

⁹ Ntá ch'ín Pedro chréhē ch'án iton tí ángel a ntá noehya ch'án á chaxín xikaha kónhen tí nkehe kjuích'e tí ángel o náhí. Ntáchro ch'án kixin ách'e ijnko nkehe k'uíkonxón ch'án.

¹⁰ Ntá kjuixin k'uátsínka sín tí tjejó tí soldado saoxín la kjuixin xík'atsínka sín tí tjejó tí soldado a yóxin. La ntá kjuíji sín ijnko puerta chica ijíé chjinaxón nt̄ia. La ntá tí puerta chica la jehó xitjehē. Ntá k'uaxrje sín tjejótji sín ijnko nt̄ia la ntá xrínahya tí ángel ó sákjuí la ntá jehó ch'ín Pedro kuítóhe ch'án.

¹¹ A ntá tí ch'ín Pedro kónohe ch'án kixin chaxín kónhen tíha. Ntá ntáchro ch'án kixin:

—Ntá ó noheni kixin chaxín Ìnchéni tsíchr'án tí ángel kuènte ch'án kixin sinchekaáni kixin ts'óyánhyani ch'ín Herodes la ko tsoenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntōe ijnko tjan María, ìné ch'ín Juan k̄jaxin tik̄itexín sín Marcos. Ntaha tsíkójnkotsé itsjé sín tinkáchónki Ìnchéni tjejónixjehē sín Dios.

¹³ La ntá t'ínka ch'án tí puerta chjinaxón nt̄ia la nixja ch'án. La ntá ijnko tjan it'in Rode k'uaxrje tjan kjuitsjehe tjan kixin nkexro tíha.

14 **A** ntá tió kjuátsoan tjan itén ch'ín Pedro ntá k'uitjáyenhen tjan kuakitjēehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntiha itjen ch'ín Pedro.

15 Ntá ntáchro sín kixin:

—Lontia.

La naxa chrónka tjan kixin chaxín jehe ch'án ntá xintáchro sín kixin:

—Jehya jehe ch'án. Kjá tí xrintoe ch'án.

16 **A** ntá ch'ín Pedro naxa t'ínka ch'án tí ntója puerta la ntá tió kuakitjēhe sín la k'uíkon sín ch'án ntá chrakon sín.

17 **A** ntá kjuakoxin ch'ín Pedro itja ch'án kixin tsotání sín ntá chrónka ch'án kixin Ìnchéni mé kuakitsjexín ch'án ntoechiso. Ntá k'ueṭoan ch'án ntáchro ch'án kixin:

—Chenkará ch'ín Jacobo la ko kaín kichó ni nkehe k'uátsínka janhan —ichro ch'án ntá sákjuí ch'án ókjé.

18 Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro.

19 La ntá k'ueṭoan ch'ín Herodes kixin sátsjikjeyá sín ch'án, kjánchó k'uitjahya sín ch'án. **A** ntá tí sín soldado kuamá sín tíha ntá k'ueṭoan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrjexín ch'án estado Judea ntá sákjuí ch'án chjasin Cesarea la ntiha kjuák'e ch'án.

Ik'uén ch'ín Herodes

20 **A** ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uàyakonhen ch'án ntōe ch'ín Herodes ntá

kjuanchehe sín ch'án kixin tsonixjayákonhen sín ch'án tí ch'ín t'et̄oan. Kjuanchia sín kixin chrókónínkakuenhya sín ch'ín Herodes kixin nax̄a tsochr'án ch'án tí nkehe sine sín kixin chjasén ch'án sít̄ixin tí nkehe ine sín.

²¹ Ntá ch'ín Herodes k'uíyeh̄e ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrjón kuente chojni t'et̄oan la kjuák'enkáya ch'án ijnko silla kuente chojni t'et̄oan. La ntá kjuankíxin ch'án nixjeh̄e ch'án tí sín tsíkójnkotsé.

²² A ntá tí sín a kjuankíxin k'uèya sín, ntáchro sín kixin:

—Jehya chojni tjenixja. Dios tjenixja —ichro sín.

²³ A ntá tuénxín ijnko ángel kuente Ìnchéni kjuíncheníhi ch'ín Herodes kixin kjuíncheyóh̄e ch'án asén ch'án Dios. La ntá kos̄int̄o kjóne nkaya tsee ch'án ntá k'uén ch'án.

²⁴ La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixr̄a kuente sín chjasin Jerusalén la ntá sákíjki sín chjasin Antioquía la sákjuíko sín ch'ín Juan mé kjaxin t̄ik̄itexín sín ch'án Marcos.

13

Ch'ín Saulo la ko ch'ín Bernabé sákjuík̄jako sín

¹ A ntá tí n̄inko chjasin Antioquía la síin iso sín nixja sín itén Dios la kjuakoh̄e sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín

tsík'ánkíko ch'ín Herodes tí ch'ín t'et̄oan estado Galilea, la ko ch'ín Saulo.

² Ijnko yaon la tjejótojnkotsé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xra sich'e sín.

³ Ntá nixjehe sín Dios la kjónehya sín la ntá kjuixin ntá k'uejotja tja sín chrítaón ikja tí sín a la nixja sín jnkojnko sín kixin ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uixenhen sín ijnko ntabarco sákjuí sín ijnko nonte it'in Chipre.

⁵ Ntá kjuíji sín ijnko puerto it'in Salamina. Ntaha kjuakoxin sín itén Dios tí nínko kuènte tí sín judío. Kjaxin kjuíjiko sín ch'ín Juan kixin tsjinkitsa ch'án.

⁶ La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuích'ia ch'án ntáchro ch'án kixin kjaxin ch'án nixja ch'án itén Dios.

⁷ A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jina kjuenkayáxin ch'án. K'uíyehē ch'án tí ch'ín Bernabé la ko tí ch'ín Saulo kixin jehe ch'án tjinkaon ch'án tsinhin ch'án itén Dios.

⁸ A ntá tí ch'ín nchexroan, nkiva griego mé tikitexín sín ch'án Elimas, mé nínkakonhen ch'án tí

sín tjako a kixin tjinkakonhya ch'án kixin tí ch'ín t'etoan chrókuitekaon ch'án Ìnchéni.

⁹ A ntá tí ch'ín Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan.

¹⁰ Ntáchro ch'án kixin:

—Jaha mé chojni ch'ia, jínahya, xjeen Diablo la nínkakhén kaín nkehe jína. ¿Nkeuènte kixin ch'éna jínahya tí ntia ntoá kuènte Ìnchéni?

¹¹ A ntá ijie la Ìnchéni sintakjasótia. Tsitoha ntakótán iso yaon la ts'ikonhya tí xrohi kuènte yaon —ichro ch'ín Pablo.

Ntá tuénxín tí ch'ín Elimas la k'uixitie tjen ch'án. La ntá kjueyá ch'án ijnko nkexro tsinkátséhe tja ch'án sátsjiko ch'án kixin t'ikonhya ch'án.

¹² A ntá xikaha mé k'uikon tí ch'ín gobernador nkehe kónhen la ntá kjuankixin tinkáchónki ch'án Ìnchéni kixin k'uikon ch'án tí kjuachaxin kuènte Ìnchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuixin sín chjasin Pafos. K'uixenhen sín ntabarco sákjuí sín kjuíji sín chjasin Perge estado Panfilia. Ntá ntaha ch'ín Juan* kuítóhe tí jehe sín ntá kjan ch'án chjasin Jerusalén.

¹⁴ Ntá sákjuixin ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxon Pisidia. A ntá tí yaon t'ok'éhe sín ntá k'uixenhen sín tí nínko Israel na ntaha k'uéjótjaxin sín.

* 13:13 Hechos 12.25

15 Ntá kjuixin kjuínchekuáxin sín tí xroon kuènte ley la ko tí nkehe tsíkjin tí sín k'uéchrónka itén Dios ntá tí sín t'etoan kuènte n̄inko mé k'uíyeh̄e sín tí sín a ntá ntáchro sín kixin:

—Kíchóni tí chonta nkehe tsochronka kixin antsí má tsochéheni la chronka jie tsinhinni —ichro sín.

16 Ntá ch'ín Pablo k'uínkatjen ntá kjuakoxin itja ch'án kixin tsotání sín. Ntá ntáchro ch'án kixin:

—Chrókuinhínrá jahará chojni israelita la ko kjaxin chrókuinhínrá jahará tsíkjixinrá chjasin ókjé tí chaxín tjinkáonrá nchexiteyéhérá Dios.

17 Tí Dios tinkáchónki tí sín chjasin Israel mé kjueyá ch'án tí sín tsík'axrjeníxinni. Ntá chr'éxin Dios kjuanjon kjuachaxin kixin chrókótsjé tí jehe sín tí naxá k'uéjó sín chjasin Egipto. Éxí chojni tsíkjixin ókjé k'uéjó sín a ntá chr'éxin ntá kjuachaxién Dios kjuínkítsa sín k'uaxrjexín sín tí nonte ntiha ínaá.

18 Dios kjuínkítsa sín tí cuarenta nánó k'uéjó sín tí nteje.

19 Ntá chr'éxin kjuínchek'itjáyan ch'án yato nación k'uék'ejó nonte Canaán, kixin tí sín tsík'axrjeníxinni chrók'uáyeh̄e tí nonte a.

20 Ntá kaín sín k'uéjó sín ntiha ijnko cuatrocientos cincuenta nánó. K'uék'etoan tí sín juez hasta ikjui tí ch'ín Samuel ijnko ch'ín k'uéchrónka itén Dios.

21 Ntá kjuanchia tí sín israelita ijnko ch'ín rey ts'etuenhen sín. Ntá kjueyá Dios tí ch'ín Saúl la k'uetōan ch'án cuarenta nánó. Jehe ch'án it'é ch'án mé ch'ín Cis la k'uaxrjeníxin ch'án ch'ín Benjamín.

22 Ntá chr'éxin Dios kuakitsjehe ch'ín Saul tí xra kjuák'e ch'án ntá k'uáyeh̄e ch'ín David tí xra

rey. Ntá ntáchro Dios kixin: “Ó k'uitjá ch'ín David, it'é ch'án mé Isaí. Jehe ch'án mé ijnko chojni nchechàna mé sinchexiteyàna ch'án kaín nkehe tjínkavan”.

²³ Ijnko tí chojni k'uaxrjeníxin tí ch'ín David mé Jesús. Tíha la Dios tsíchr'án ch'án kixin sinchekaá tí sín israelita. Mé xíkaha tsíntáchro ch'án.

²⁴ Naxa tjakohya ch'ín Jesús ntá ch'ín Juan kjuako ch'án tí tan kuínhin tí sín israelita la ntáchro ch'án kixin chrókjan sín chrórxaxinkaon sín Dios ntá chrokuikite sín.

²⁵ Ntá chjina its'en ch'ín Juan ntá ntáchro ch'án kixin: “Janhan na jehya tí nkexro tjenkayáxinrá. Náhi. Chr'éxin na itsi íjnko nkexro la chrókósuàna chrókjuasintanka tí correa tokaté ch'án kixin antsí mé t'etōan tí jehe ch'án la kánhyó t'etōan tí janhan,” mé xíkaha tsíntáchro ch'ín Juan.

²⁶ 'Jahará kichó ni tsík'axrjeníxinrá ch'ín Abraham tinhínrá la ko kaín rá chojni tsíkjinín ikjín nchexiteyéherá Dios, tinhínrá tí tán tsaáxinrá.

²⁷ Méxra tí sín k'uék'ejó sín chjasin Jerusalén la ko tí sín t'etōan ntiha mé kónoehya sín nkexro tí ch'ín Jesús la ko kuienxínhya sín tí nkehe tsíkjin tí sín k'uéchrónka itén Dios senó tió kjuínchekuáxin sín tí xroon tí nkaxenhen nínko jnkojnko tí yaon t'ok'éhe sín. Mé xíkaha jehe sín tió kjuínchekjasóte sín tí ch'ín Jesús la kjuínchexiteyá sín éxí nixja tí xroon a.

²⁸ Ntá k'uitjahya sín ninkehó jie kixin chrók'uen ch'án ntá kjónté kjuanchehe sín tí ch'ín Pilato kixin ts'etōan ch'án kixin its'en ch'án.

²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuinkajinxin

sín tí cuerpo kuènte ch'án tí ntacruz ntá kjuavá sín ch'án.

³⁰ A ntá Dios kjuínchexechón tí jehe ch'án inaá.

³¹ A ntá nchónhya yaon k'uíkon sín ch'ín Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjeónixja sín nkexrí kjuako ch'ín Jesús, tjakohe sín kaín chojni.

³² A ntá jie jeheni tjakoni tí tan jína, mé tí nkehe tsíkjanjon Dios tsík'áyéhe tí sín tsík'axrjeníxinni ósé.

³³ Mé xikaha xiteyá k'uáyéheni tí jeheni tsík'axrjeníxinni tí sín a. A ntá Dios kuènte tí sín a mé kjuínchexechón tí ch'ín Jesús éxí nixja tí xroon yóxin Salmo, ntáchro kixin: “Jaha mé xjanna. Janhan mé tjahá kjuachón jie.”†

³⁴ Ntá tsíntáchro Dios kixin sinchexechón ch'án tí ch'ín Jesús kixin tsoxíkahya cuérpoé ch'án. Mé xikaha chrónka tí xroon itén Dios. Ntáchro kixin: “Janhan mé sintaxiteyá tí nkehe chaxín tjanka ch'ín David.”‡

³⁵ La ko í jnko Salmo mé ntáchro xikihi: “Jaha tsjánjonhya kjuachaxin kixin tsoxíka tí cuérpoé tí nkexro tjóá kjuít'aha xra.”§

³⁶ A ntá ch'ín David kjuínchexiteyá ch'án éxí tsík'etöan Dios tí kjuák'e ch'án ntá kjónté chr'éxin ik'uén ch'án ntá xravá ch'án xikaha k'uéxravá tí sín tsík'axrjeníxinni la ntá kjónté la xíka ntöe ch'án.

³⁷ A ntá tí cuérpoé tí nkexro kjuínchexechón Dios la kótjehya.

³⁸ Méxra kichó ni t'ichjánxin tsonohará kixin nkexrí tsjin ijjará kixin Jesús mé k'uenyákonhánra.

† 13:33 Salmo 2.7 ‡ 13:34 Isaías 55.3 § 13:35 Salmo 16.10

39 **A** ntá kaín nkexro tinkáchónki Jesús mé ó kjuínchetjóá ch'án asén sín. **A** ntá tí ley k'uetóan ch'ín Moisés kjuachahya kótjuáxin ti jie.

40 Chrókoxakonhanrá kixin chrókuànyhará xikaha éxi tsíkjin tí sín ósé xikihi:

41 Tsjehérá jahara chojni titekakonhya. Ijie la tsochrakonrá kixin nkehe tsonhen kixin janhan Dios tsjákoxiān ijnko nkehe jie ijnko yaon

kjánchó tsítekákonhyará kjónté ókjé nkexro chróchrónka.*

42 **A** ntá ch'ín Pablo la ko tí nkexro k'uájiko ch'án k'uaxrjexín sín nkaxenhen tí nínko, a ntá chrónòa tí sín jehya sín judío tsíkokjéxín, kjuanchia sín kixin ijnko semana tí yaon t'ok'éhe sín la inaá tsochrónka ch'án éxi tí kjuako ch'án.

43 Ntá tí kjuixin xikaxin sín tí kójnkotsé sín tí nínko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxi tí sín judío la xraxinkaon sín Dios, la mé imá kóxrjínhin sín tí nkehe kjuako ch'ín Pablo la ko ch'ín Bernabé la ntá sákjuíchréhe sín. **A** ntá jehe sín mé k'uetóan sín kixin antsí jina chrókuinkáchónki sín tí Dios tjuèhe kaín chojni.

44 **A** ntá í jnko semana kjuèxin, tí yaon t'ok'éhe sín la kójnkotsé kaín tí sín síin tí chjasin ntiha kixin tjinkaon sín tsinhin sín itén Dios.

45 **A** ntá k'uíkon tí sín judío a kixin nchónhya chojni tsíkojnkotsé, ntá imá kóchjinoxínhin sín, ntá kjuankixin sín k'uántaxínhin sín tí ch'ín Pablo.

46 **A** ntá ch'ín Pablo la ko ch'ín Bernabé la íchá antsí má chrakonhya sín nixja sín ntáchro sín kixin:

* 13:41 Habacuc 1.5

—T'ichjánxìn senó jahará judíorá chrókuinhínrá itén Dios. Kjánchó tjinkákonhyará tsinhínrá tí nkehe jína tsjanjon kjuachón jnkochrín. A ntá ijie la tsitohará tí jahara judíorá la ntá jeheni la sátsjini tsjakoheni tí sín jehya judío

⁴⁷ xíkaha tsík'etoan Ìnchéni. Ntáchro ch'án kíxin: Janhan ichr'an tí jahará éxí xrohi ts'inkaséyanxín kaín nación kíxin sátsjikoará tí tan tsjanjon kjuachón tsaáxin chojni hasta tí antsí má kjín kjuèxin chjasin-tajni.†

Mé xíkaha k'uetóan Dios.

⁴⁸ A ntá kuínhin tí sín jehya sín judío tíha la kjuankíxin kóchéhe sín la ntáchro sín kíxin tí tan kuènte Ìnchéni la nkehe jína, ichro sín.

La ntá kjuankíxin kuinkáchónki kaín tí sín tsíkitoenxín sín kíxin tsochónta sín kjuachón jnkochrín.

⁴⁹ Ntá xíkaha xrankíxin xrako tí itén Ìnchéni nkuíxín tí chjasin ntiha.

⁵⁰ A ntá tí sín judío nixjehe sín iso chojni chjin jína tjetoan la ko tí chojni ntoa t'etoan tí chjasin ntiha la ntá kjuínchekónínkaon tí sín a la ntá kjuankíxin sín chrók'óyán sín tí ch'ín Pablo la ko tí ch'ín Bernabé ntá sákjuíxin sín chjasin ntiha.

⁵¹ A ntá jehe sín la kótsjénka sín tokaté sín kíxin tsoxénjin tí nche chóna toté sín. Tíha mé kjuakoxin sín kíxin ntoáhya kjuenkayáxin tí sín a. A ntá sákjuí tí jehe sín chjasin Iconio.

⁵² Ntá tí sín tinkáchónki Ìnchéni la imá chéhe sín kíxin antsí chóna sín Nchakuen Dios.

† 13:47 Isaías 42.6; 49.6

14

Ch'ín Pablo la ko ch'ín Bernabé tjejó chjasin Iconio

¹ Ntá kjuíji ch'ín Pablo la ko ch'ín Bernabé tí chjasin Iconio. Ntá k'uíxehen sín n̄inkoé tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín.

² A ntá iso tí sín judío kuítekakonhya la ntá kjuankíxin nchekónínkaon sín tí chojni jehya judío kíxin tsonínkakonhen sín tí sín tjako.

³ A ntá tí sín tjako la isé kuítóhe sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxin kóxrjính̄in ch'án tí nkehe nixja sín kíxin nkexrí tjuèheni Dios la kjuanjon ch'án kjuachaxin tsjasin sín kjuaxroan.

⁴ A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjeyá Ìnchéni.

⁵ A ntá tí sín judío la ko tí sín jehya judío mé kjuenkayáxinko sín tí sín t'et̄oan kíxin sinchechrakon sín tí sín tsíkjeyá Ìnchéni la ko tsochjéhe sín xro.

⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuíxín ntiha.

⁷ La kjaxin ntaha kjuako sín tí tan jína kuènte Ìnchéni.

Chjéhe sín xro ch'ín Pablo chjasin Listra

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kixin tsíkokjéxín ch'án xitjahya itji ch'án.

⁹ Méxra ó tjetjaxínkoá ch'án ntá kuínhin ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kixin tí ch'ín antsí tinkáchónki ch'án Inchéni kixin tsitohé ch'án jína.

¹⁰ Ntá jehe ch'án itsen ntáche ch'án tí ch'ín a kixin:
—T'inkatjen, ntoá tjak'exián totá —ichro ch'án.

Ntá tuénxín k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án.

¹¹ Ntá kaín tí sín chjasin ntiha k'uíkon sín nkehe kjuích'e ch'ín Pablo, ntá kaín sín k'uíyexin sín nkívee sín Licaonia ntáchro sín kixin:

—Dios tsík'óna chojni mé tsíkixín nkajní tjejókoni ntihi —ichro sín.

¹² La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kixin imá nixja ch'án.

¹³ Ntá tí ch'ín nchat'á kuènte tí dios Júpiter mé chóna ch'án nínko tí t'ixenxínni ikon chjasin ntá kjuikao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kixin tjinkaon sín chrókjuikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a.

¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín tíha ntá kjuankixin sín kótséchje sín iké sín la sákjuíkjiakjan sín tí chojni siín ntiha la t'óyako sín ntáchro sín kixin:

¹⁵ —¿Kuènté kixin tjejoch'erá xíkaha? Jeheni chojni éxí tí jahará. Tí xra ó kuini kixin tsochrónkani itén Dios kixin tsitohérá kaín tí nkehe ninkehó sínkíhya la ntá chrókjanrá

chrókuinkachónkirá Dios tjechón. Jehé ch'án mé kjuích'éna ch'án nkajní la ko chjasintajni la ko tí ntayaon la ko kaín tí nkehe síin.

¹⁶ Ntá ósé mé kuítóhe Dios chojni kíxin jehó ts'aji sín ntje sín.

¹⁷ Kjónté la Dios tjako_xin ch'án kíxin jehé ch'án t'et_oan ch'án kíxin kjuích'éna ch'án kaín nkehe. Jehé ch'án mé t'et_oan kíxin ts'aniá chrin ntá ts'enkani la jína ts'óneheni, la jehé ch'án tjanjon ch'án nkehe kíxin jnkochrírín ts'ixin nkehe sineni, la ko jehé ch'án mé nchechéheni ch'án — mé xikaha ichro ch'ín Pablo.

¹⁸ Kjónté xikaha ichro tí sín tjako la naxa tjinkaon tí chojni chrokjuikosáyehe sín chrók'óyán sín koxinta chrókjokehe sín tí sín tjako.

¹⁹ A ntá ikui iso tí sín judío kjuixin sín chjasin Antioquía la ko chjasin Iconio. Nixjehé sín tí sín ntiha kíxin tsítóhe sín tí nkehe jehya jína tjako tí sín a ntá kónínkaon sín ntá kjuankíxin chjéhe sín xro tí ch'ín Pablo. La ntá ách'e ó kjuixin tsík'en ch'án ntá kuinkánkákjen sín ch'án sákjuíko sín ch'án ikon chjasin.

²⁰ Ntá tí sín tinkáchónki Ìnchéni mé kójnkotsé sín k'u_uantatjen sín tí ch'ín Pablo ntá k'uàya ch'án xíkjan ch'án tí chjasin ntiha ínaá. Ntá tí yaon chr'éxin ntá sákjuíko ch'án tí ch'ín Bernabé chjasin Derbe.

²¹ A ntá ó kjuixin chrónka sín tí tan jína la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía.

²² Nkuíxín tí chjasin k'uátsínka sín mé kjuínchechéhe sín tí sín kuinkáchónki Ìnchéni.

K'ueṭoan sín ḱixin naxa j́ina chrókuinkáchónki sín Ìnchéni la ntáchro sín ḱixin tí ts'ixenhenni tí kjuachaxin kuènte Dios t'ichjánxin tsjasóteni.

²³ A ntá ntiha kjueyá sín chojni jnkojnko nínko ḱixin ts'etuēhen sín tí sín tinkáchónki Jesús ḱixin j́ina ts'ejó sín. Ntá nixjehe sín Dios tí naxa ḱjónehya sín la ntá ntáche sín Ìnchéni ḱixin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

²⁴ Ntá chr'éxin k'uátsínka sín estado Pisidia la ntá kjuíji sín estado Panfilia.

²⁵ Ntá chjasin Perge kjuako sín tí tan kuènte Ìnchéni la ntá kjuixin ntá sákjuí sín chjasin Atalia.

²⁶ Ntá ntiha k'uíxenxín sín ntabárcō ntá sákjuí sín chjasin Antioquía tí chjasin k'uénixjehe chojni Dios k'uékjanchia sín ḱixin Dios tsjinkitsa tí sín a sich'e sín tí xra. La ntá ó kjuixin xiteyá.

²⁷ Ntá tió kjuíji sín chjasin Antioquía ntá kójnkotsé kaín tí sín tinkáchónki Jesús. Ntá kjuanḱixin chrónka ch'ín Pablo nkexrí kjuínkitsa Dios tí jehe sín la ko nkexrí kjuanjon Dios kjuachaxin tsjakohē sín tí chojni jehya judío ḱixin kjaxin sín tsitekaon sín Ìnchéni.

²⁸ A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

¹ A ntá iso chojni tsíkixín sín estado Judea ntá kjuíji sín chjasin Antioquía. Ntá kjuanḱixin sín

kjuakohe sín tí sín kichó ni kixin xitjahya tsaáxin sín tí chóntahya sín tí xroye tsík'etoan ch'ín Moisés.

² Ntá tí ch'ín Pablo la ko tí ch'ín Bernabé la ko tí sín judío kjuankixin kjuanjonkoxín sín kichó sín. Ntá áxri ntá kónoxín kixin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha tsonixjehe sín tí sín apóstol la ko tí sín t'etoan nínko kixin nkexrí tsonhen tí xroye tsík'etoan ch'ín Moisés.

³ Tí sín tinkáchónki Ìnchéni chjasin Antioquia mé ichr'án sín tí sín a ntá k'uátsínka sín estado Fenicia la ko estado Samaria la tinkáchrónka sín kixin nkexrí tí sín ókjé jehya sín judío kjuitoxínhin tí k'uékjenkayáxin sín ntá kuákja sín ntje Dios. Ntá kaín tí sín kichó ni imá kóchéhe sín tí kuínhin sín xíkaha.

⁴ La ntá kjuíji ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'etoan kuente nínko mé kjuanjon sín kjuachaxin ts'ejó tí sín a. Ntá chrónka sín kixin Dios imá kjuínkítsa tí jehe sín.

⁵ Ntá iso tí sín fariseo ó tsíkitekaon Ìnchéni mé k'uínkatjen sín ntá ntáchro sín kixin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ítuenhen sín sinchexiteyéhe sín kaín tí ley —ichro sín.

⁶ Na ntá kaín tí sín apóstol la ko tí sín t'etoan nínko mé kójnkotsé sín kjuenkayáxin sín nkexrí tsonhen kixin xíkaha ichro tí sín judío.

⁷ Ntá imá nixjehe kichó sín ntá k'uínkatjen ch'ín Pedro ntáchro ch'án kixin:

—Jahará kichó ni ó nohará nkexrí kixin senó Dios tsíkjejá tí jeheni kixin tsjakoheni kaín tí sín

jehya judío kixin tsinhin sín tí tán jína kuènte Cristo kixin kjaxin jehe sín tsitekaon sín.

⁸ Dios mé ó nohe ch'án nkexéhe kaín asén chojni. Kjuakoxin ch'án kixin k'uáyéhe ch'án tí sín jehya judío kixin chjéhe ch'án sín Nchakuen ch'án éxí tí xikaha k'uáyéheni tí jeheni.

⁹ Dios la t'ikon kaín chojni jnkokón éxí tí jeheni. Ntá kjuínchetjóá ch'án asén sín kixin ó tinkáchónki sín Ìnchéni.

¹⁰ Méxra ¿nkekuènté títekákonhyará tí nkehe kjuích'e Dios la ntá tétuènhénrá chojni sinchexiteyá sín kaín tí nkehe ixra tsitekaon sín? Ni jeheni la ko ni tí sín tsík'axrjeníxinni kjuachahya sín kjuínchexiteyá sín tíha.

¹¹ Náhí. Ó noheni kixin kjuasáyé Ìnchéni Jesús mé kuaáxinni la ko kjaxin xikaha kuaáxin tí jehe sín kuítekaon —mé xikaha ichro ch'ín Pedro.

¹² Ntá kaín tí sín tsíkójnkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínkítsa sín kjuasin sín itsjé kjuaxroan k'uíkon tí sín jehya sín judío.

¹³ Kjuixin nixja ch'ín Pablo la ko ch'ín Bernabé ntá kjuankixin nixja ch'ín Jacobo, ntáchro ch'án kixin:

—Kíchóni, tinhínrá tí nkehe tsoxrjanka.

¹⁴ Ch'ín Simón Pedro chrónka nkexrí kjuakoxin Dios kixin tjuèhe ch'án tí chojni jehya judío la nkexrí kjueyá Dios iso tí sín kixin tsinkáchónki sín tí jehe ch'án.

¹⁵ Mé xikaha chaxín chrónka tí xroon tsíkjin tí sín k'uéchrónka itén Dios kixin:

¹⁶ Janhan mé tsokjan chr'éxin.

Tiós ts'inka ntá sít'ána nixin tí nchia tsík'oya kuènte David

la janhan la tsjínkĩtsa sín ts'etōan sín.

¹⁷ Kíxin kjaxin kaín xín chojni mé tsjeyá sín Ìnchéni la ko kjaxin kaín xín tí sín ókjé nación mé tí sín kótjuáxin nina mé tsinkáchónkina sín.

¹⁸ Ìnchéni mé kjuakoxin kaín tíha tí ósé la tsíkjanjon ch'án tí tan kuènte ch'án.*

Mé xikaha ichro itén Dios

¹⁹ 'Méxra ntáxrjan kíxin tí sín jehya judío la t'ichjánxinhya sinchexiteyá sín kuenté tí ley kíxin ó kuítóhe sín tí nkehe kuinkáchónki sín senó kíxin jina chrókjueyá sín Dios.

²⁰ Méxra tsochr'énhenni sín ijnko xroon la jehó ts'etueñhenni sín kíxin chrókjónehya sín tí nto tsíkjokehe chojni tí nkehe tsíkjanoya la ko chróchóntahya sín chojni chjin ókjé la ko chrókjónehya sín tí nto kuènte ko tsíchrínjinhya ikja va la ko chrókjónehya sín ijnié va.

²¹ A ntá jnkojnko chjasin siín nkexro chrónkaxín tí ley kuènte ch'ín Moisés nchekuáxin sín tí nkaxenhen ninko jnkojnko tí yaon t'ok'éhe sín —ichro ch'ín Jacobo.

²² Ntá kaín tí sín tsíkjeyá Ìnchéni la ko tí sín t'etōan kuènte ninko la ko kaín tí í so sín tinkáchónki Ìnchéni kjueyá sín iso chojni tsochr'án sín chjasin Antioquía, mé kjueyá sín ch'ín Judas, tikítexín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetōan ntiha.

* **15:18** 15.16–18 Amós 9.11–12

23 Ntá ichr'án sín tí xroon sákjuúko tí sín a ntáchro kixin:

“Jeheni chojni tsíkjeýá Ìnchéni la ko chojni t'etòan kuènte nínko ntihi la nixjaharáni tí jahará, kichó ni jehya judío, tjejorá chjasin Antioquía la ko estado Siria la ko estado Cilicia.

24 Ó noheni kixin iso chojni tsíkixin chjasénni kjónté k'uéchóntahya sín kjuachaxin la kjuínchexakonhanrá sín kixin ntáchro sín kixin t'ichjánxin itsará tí xroye tsík'etòan ch'ín Moisés.

25 Ntá jnkokoá kjuenkayáxinni tsjeýáni nkexro tjejó ntihi kixin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kixin imá tjuèheni sín.

26 Tí sín a mé ántosen sín kjónté chrók'uenxín sín kixin tí tinkáchónki sín Ìnchéni Jesucristo.

27 Méxra tsochr'ánni ch'ín Judas la ko ch'ín Silas tsjiji sín kixin jehe sín mé tsonixjahará sín tsochrónkaxín sín kaín tíha.

28 Jína kixin Nchakuen Dios mé kjuínkitsani kjuenkayáxinni kixin jehya chrók'uetuáhanrání ijnko nkehe imá xra. Náhí. Jehó tí nkehe kánhyó xra t'ichjánxin sinchexiteyará mé t'etòanni:

29 chrókjóntehyará tí iko tsíkjokehe chojni tí nkehe tsíkjanoya la ko kjaxin chrókjóntehyará ijnié tí ko a la ko chrókjóntehyará tí nto kuènte tí ko tsíchrínjinhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteyará kaín tí nkehe t'etòanni la jína ts'ejorá.” Mé xikaha nixja tí xroon.

30 Ntá kjuixin nixja sín ntá tí sín a sákjuí sín chjasin Antioquía. Ntá tió kjuíji sín ntiha ntá

kójnkotsé tí sín tinkáchónki Jesús ntá kjuanjon sín tí xroon a.

³¹ Ntá tió kjuínchekuáxin tí sín kíchó ni tí xroon a ntá imá kóchéhe sín kixin xikaha chrónka tí xroon a.

³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhe sín tí sín kíchó ni kixin tí nkehe nixja sín.

³³ Ntá ntahó k'uéjó sín iso yaon, ntá tió sátsji sín ntá kaín tí sín tinkáchónki Ìnchéni nixjehe sín jína ntá ó xíkjan sín inaá tí tsíkjin sín tí tjejó tí sín tsíchr'án sín.

³⁴ Kjánchó ch'ín Silas kjuenkayáxin ch'án kixin ntahó chrókuitohe ch'án.

³⁵ A ntá ch'ín Pablo la ko ch'ín Bernabé kuítóhe sín chjasin Antioquía. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankixin tí yóxin viaje

³⁶ A ntá chr'éxin ch'ín Pablo nixjehe ch'án ch'ín Bernabé. Ntáchro ch'án kixin:

—Sátsjitsjeheni tí sín kíchó ni kaín tí chjasin kjuakoxinni itén Ìnchéni ósé. Tsjitsjeheni nkexrí tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tikitexín sín ch'án Marcos.

³⁸ A ntá ch'ín Pablo kóxrjienhya sátsjiko sín tí ch'ín Marcos a kixin jehe ch'án kuítóhe ch'án sín estado Panfilia la kjuínkĩtsahya ch'án kixin naḡa tsõnhen tí xrḡ.†

† 15:38 Hechos 13.13

39 Méxra jnkokoáhya kjuenkayáxin sín la ntá xikayehe sín la ókjé sákjuí sín. Ch'ín Bernabé sákjuíko ch'án tí ch'ín Marcos la k'uíxenhén sín ijnko ntabárcō sákjuí sín nonte Chipre.

40 A ntá tí ch'ín Pablo la jehó ch'án mé kjueyá ch'án tí ch'ín Silas ntá chr'éxin sákjuí sín. Tí sín kíchó ni ntiha kjuanchehe sín Dios kixin jína ts'ayakonhen sín ch'án la ntá sákjuí sín.

41 Ntá k'uátsínka sín estado Siria la ko estado Cilicia la kjuínchechéhe sín asén tí sín tinkáchónki Ìnchéni nínko ntiha.

16

Ch'ín Timoteo sákjuíko ch'án ch'ín Pablo la ko ch'ín Silas

1 Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehé ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego.

2 Ntá tí sín kíchó ni tjejó chjasin Listra la ko chjasin Iconio mé nixja sín kixin jína tí ch'ín Timoteo.

3 A ntá ch'ín Pablo mé tjinkaon ch'án sáchrókjuíko ch'án tí ch'ín Timoteo. Ntá senó k'uetōan ch'án chrókua tí ch'ín Timoteo a tí xroye kixin tsonínkakhya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego.

4 Ntá sákjuí sín la kaín tí chjasin k'uátsínka sín la nixjehe sín tí sín kíchó ni la chrónkaxín sín tí nkehe tsík'etōan tí sín apóstol la ko tí sín t'etōan kuènte nínko chjasin Jerusalén.

⁵ Ntá tí chojni tinkáchónki Ìnchéni mé a_{nt}sí má ntoá k'uéj_o sín la ko jnkojnko yaon sítinkákótsjé sín.

Xríng_hya tità_ya k'uíkuèn ch'ín Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia.

⁷ Ntá tió kjuíji sín estado Misia ntá kjuenkayáxin sín sáchrókjui sín nó estado Bitinia. Ntá Nchakuen Jesús kjuanjonhya kjuachaxin kixin sátsji sín nó ntiha.

⁸ Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon.

⁹ Ntá ijnko tie xríng_hya tità_ya k'uíkuèn ch'ín Pablo ijnko ch'ín estado Macedonia kjuák'exín toté ch'án chrónòà ch'án kixin: “T'átsínka Macedonia tsjínkítsani,” ichro ch'án.

¹⁰ Méxra tíha tsík'íkon ch'ín Pablo la ntá tuénxín kóyaxínhinni kixin sátsjini estado Macedonia kixin kónoexínni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uéjókotoxínni kichó ni ntiha.]

Ch'ín Pablo la ko ch'ín Silas, k'uéj_o sín chjasin Filipos

¹¹ Ntá ntaha chjasin Troas k'uíxénxínni ijnko ntabárc_o ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'éxin kjuíjini chjasin Neápolis.

¹² Ntá ntiha sákjuíxinni la kjuíjini chjasin Filipos. Tí chjasin a mé k'uéchónta tí sín romano ósé ntá ijnko chjasin a_{nt}sí má tjetaon tí it'ò tí estado Macedonia. Ntaha mé k'uéjóni iso yaon.

13 Ntá tí yaon t'ok'éhe sín ntá k'uaxrjexínni tí chjasin Filipos ntá sákjuíni ijnko chrínta ntario mé ntiha kuènhen sín tsojnkotsé sín tsonixjehe sín Dios. Mé ntaha k'uéjótjaxínni la kjuankíxinni kjuakoheni iso chojni chjin tsíkójnkotsé ntiha.

14 Ntá ijnko tí jehe sín mé ijnko tjan it'in tjan Lidia la tsíkijxin tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Ìnchéni mé kjuínkítsa asén tjan kíxin tsinhin tjan jína tí nkehe kjuako ch'ín Pablo.

15 Ntá jehe tjan la ko kaín tí sín tjejó ntøe tjan mé kuíkite sín. Ntá chrónóehē tjan tí ch'ín Pablo ntáchro tjan kíxin:

—Tí chaxín tjátsoan kíxin chaxín tinkáchónkini Ìnchéni la jína chrókuitøha ntøeni ntihi —ichro tjan.

Ntá kjónté kuítóheni ntiha.

16 Ntá ijnko yaon sákjuíni tí nó kuènhen sín nixjeexín sín Dios ntá ó xétani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhya chichaon tjacha tí ìnché tjan kíxin xíkaha tónohe tjan.

17 A ntá tí tjan tjarisoá a kjuankíxin tjan tinkáchrēhe tjan tí ch'ín Pablo la ko tí jeheni ntá t'èya tjan ntáchro tjan kíxin:

—Tí sín i ch'ehe sín xra Dios nkaya nkajni la tjako sín ijnko ntja jína tsaáxin chojni.

18 Mé xíkaha kjuích'e tjan itsjé yaon. Ntá kóchjinhin ch'ín Pablo la nkátjía ch'án nixjehe ch'án tí nchakuen tí jínahya chóna tí jehe tjan, ntáchro ch'án kíxin:

—Kjuachaxién ihnié Jesucristo tétuānhán kixin ts'axrjéxian tí jehe tjan —ichro ch'án.

Ntá tuénxín ó k'uaxrjexín tí nchakuen tí jínahya tí jehe tjan.

¹⁹ Na ntá tí ìnché tí tjan a mé k'uúikon sín nkehe kónhen tjan la ó nohe sín kixin í tsjachahya sín chichaon kuènte tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuúko sín tí tjejó tí síxreé nta sin tjejoan.

²⁰ Ntá kjuúkaán sín ntaha ti tjejó tí sín juez la ntáchro sín kixin:

—Tí sín i mé sín judío la imá sítjité sín chjasénni.

²¹ Tjako sín tí nkehe kuènhyani tsonoheni la tóxrjienhyani sich'eni kixin jeheni mé chojni romanoni.

²² Kaín tí sín ntiha kónínkakonhen sín tí jehe sín. Ntá tí sín juez mé k'uetōan ts'axrjehe sín iké sín ntá ts'ekonxín sín nta sé.

²³ Ntá tió kjuixín k'uékon sín nchónhya ntá chr'áxenhén tí sín a ntōechiso ntá k'uetuēnhén sín tí ch'ín t'ayakonhen ntōechiso kixin jina chrók'uayakonhen sín tí sín a.

²⁴ Ntá tí ch'ín t'ayakonhen ntōechiso mé k'uáyéhe ch'án kjuachaxin ntá chr'áxenhén ch'án tí sín a ijnko cuarto chríka ntōechiso kixin ts'axrjehya sín. Ntá chr'áxenhén ch'án toté sín tí nta tjejóxrja la ko chica ye.

²⁵ A ntá tió k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuènte Dios. La tí sín í so tjejóchjina mé tjejótinhin sín kixin xikaha tjejóch'e sín tjejótse sín.

26 Ntá xrínaḥya tḡian kuínkí nonte la kjuínchekinkí kuenté tí xrankíxixín ntōechiso ntá tuénxín kaín tí ntója puerta mé xítjehē la ko k'uánótjen tí chica cadena tsíchróntetoxín kaín tí sín tjejóchjina.

27 Ntá tí ch'ín t'ayakonhen ntōechiso mé k'uàya ch'án. Ntá k'uikon ch'án kíxin síxítjehē tí ntója puerta ntōechiso a. Ntá kuakitsje ch'án chica espada ntá chrók'óyán ch'án asén ch'án kíxin kjuenkayáxin ch'án kíxin ó kjuixin tsíkinká kaín tí sín síchjina, ichro ch'án.

28 Ntá ch'ín Pablo k'uèya ch'án itsen ntáchro ch'án kíxin:

—Náhi kohya nkehe ch'ehé asán kíxin kaín ni naxa tjejóni ntihyó —ichro ch'án.

29 Ntá tí ch'ín t'ayakonhen ntōechiso kjuanchia kíxin ts'ákjen xrohi ntá k'uixenhen ch'án kuinká ch'án la síxrànkā ch'án chrakon ch'án ntá kjuítsínka ch'án toté tí ch'ín Pablo la ko tí ch'ín Silas.

30 Ntá tuénxín kuakitsjexín ch'án sín ntiha ntá kjuanchankíhi ch'án sín kíxin:

—¿Nkexrí chrókjuít'a kíxin chrókuaána? —ichro ch'án.

31 Ntá kjuátēhe sin ntáchro sín kíxin:

—Títekáván Ìnchéni Jesucristo la tsaá jaha la ko tí sín tjejó ntōa.

32 Ntá kjuakōhē sín tí jehe ch'án a la ko kaín tí sín tjejó ntōe ch'án ti tan kuènte Ìnchéni.

33 Na kjónté sítié la tí hora a sákjuíko ch'án sín kjuínchek'íjmá ch'án tí tsíchrít'ō sín. Ntá tuénxín jehe ch'án la ko kaín xín sín tjejó ntōe ch'án mé kuíkite sín.

34 Na ntá chr'èxìn tí jehe ch'án sákjuiko sín ntøe ch'án. Ntá ntiha kjuanjon ch'án nkehe sine sín. Imá chéhe ch'án la ko kaín tí sín ntøe ch'án kixin ó kuítekaon sín Dios.

35 Ntá kóyaon nchítjen ntá tí sín juez k'uetuēhen sín tí sín policía sátsjitsjehe sín tí ch'ín t'ayakonhen ntøechiso kixin chrókjuanjon ch'án kjuachaxin ts'axrje ch'ín Pablo la ko ch'ín Sílas.

36 Ntá tí ch'ín t'ayakonhen ntøechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'etøan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xíkaha ichro tí ch'ín a.

37 Ntá ch'ín Pablo ntáche ch'án tí sín policía kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jie chóntani. Náhí. Kjónté la chr'áxenhenni sín ntøechiso. A ntá ijie la ¿á imó chrókuakitsjeni sín ní? Náhí. Tsjjia ti jehe sín tsakitsjeni sín —ichro ch'án.

38 Ntá tí sín policía mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuínhin sín kixin tí sín a mé chojni romano.

39 A ntá sákjuí tí sín juez ntá chrónøehē sín tí ch'ín Pablo la ko ch'ín Silas kixin tsonínkakonhya sín kixin xíkaha kónhen sín ntá k'uaxrjexín sín ntiha ntá chrónòta tí sín a sátsjixin sín tí chjasin ntiha.

40 Ntá ch'ín Pablo la ko ch'ín Silas tió k'uaxrjexín sín tí ntøechiso ntá kjuíji sín ntøe tí tjan Lidia. Ntá tió kjuixin sákjuítsjehe sín tí sín kichó ni la kjuínchechéhe sín ntá sákjuíxin sín ntiha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Silas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío.

² A ntá ch'ín Pablo sákjuí ch'an nínko éxí kuènhen ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios.

³ Kjuako ch'án kixin tí nkexro Cristo mé t'ichjánxin its'en la ko chr'éxin tsoxechón ch'án inaá. Ntáchro ch'án kixin:

—Tí ch'ín Jesús a mé jeheni chrónkaxínni kixin tsinhínrá jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxin kuítekaon itsjé tí sín griego xraxinkaon Dios a la ko kjaxin nchónhya chojin chjin tjetooan kuítekaon.

⁵ A ntá iso tí sín judío tinkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntja. Ntá kaín sín k'uíxité sín la kjuínchexakonhen sín tí sín siín chjasén sín. Ntá itsjé sín k'uíxenhén sín ntøe ijnko ch'ín it'in Jasón kjuéyá sín ch'ín Pablo la ko ch'ín Silas kixin tjinkaon sín sáchrókjuíkohe sín tí sín a tí sín t'etooan.

⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuinkánkákjen sín sákjuíko sín tí siín tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín i mé kjuínchexakonhen chojni kuenté chjasintajni. La ntá ó kjui sín chjasénni ntihi kjaxin.

7 La ntá tí ch'ín Jasón a mé kjuanjon ch'án kjuachaxin kixin tí sín a mé ts'ejó sín ntøe ch'án. Kaín sín titekakonhya sín tí ley kuènte tí ch'ín romano t'etøan. Ntáchro sín kixin itjen í jnko nkexro antsí má t'etøan, ntá tíha mé Jesús —ichro sín.

8 Ntá tió kuínhin kaín tí sín tsíkójnkotsé la ko tí síxreé ntá k'uíxité sín kónínkaon sín.

9 Ntá ch'ín Jasón la ko tí sín tjejóko ch'án kjuenka sín ntá tí síxreé kuítóhe sákjuí sín.

Ch'ín Pablo la ko ch'ín Silas sákjuí sín chjasin Berea

10 Ntá tuénxín tí tie a tí sín kíchó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tió kjuíji sín ntaha k'uíxehen sín tí nínkoé tí sín judío.

11 A ntá tí sín judío ntiha la antsí má jína asén sín, ntá tí sín chjasin Tesalónica la náhi. Antsí má kóxrjínhin sín tsinhin sín tí itén Dios la jnkojnko yaon kjuínchekuáxin sín tí xroon chóna itén Dios kixin tsonohe sín á chaxín ntoá xíkaha tí ntáchro tí sín a.

12 Méxra nchónhya tí jehe sín kuítekaon sín la ko kjaxin nchónhya tí chojni chjin griego tjetøan mé kuítekaon la ko kjaxin tí chojni ntoa.

13 A ntá tí sín judío chjasin Tesalónica kónohe sín kixin ch'ín Pablo mé kjuakoxin itén Dios chjasin Berea inaá. Ntá sákjuí sín ntiha a ntá kjuínchekóninkaon tí sín a.

14 A ntá tí sín kíchó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítóhe sín tí chjasin Berea.

15 Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uetoan ch'ín Pablo kixin tsochrónka sín kixin tjoka chrókóxakonhen tí ch'ín Silas la ko tí ch'ín Timoteo tsjiji sín ntiha tsoxéta sín ch'án.

Ch'ín Pablo itjen chjasin Atenas

16 Ntá nachrohe kjuák'echónhen ch'ín Pablo kixin itsji tí ch'ín Silas la ko tí ch'ín Timoteo chjasin Atenas ntá imá k'uává asén ch'án kixin k'uíkon ch'án kixin tí chjasin ntiha siín nchónhya tí nkehe tsíkjanoya.

17 Ntá tí n̄nko ntiha kjuakohe ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakoexín ch'án tí chojni siín ntiha.

18 La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankixin nixjehe sín tí ch'ín Pablo. Iso sín ntáchro sín kixin:

—¿Nkekuèté kixin ánta tjenixja tí nkexro a?

La í so sín ntáchro sín kixin:

—Méxra tjenixja ch'án kuènte í jnko dios.

Mé xikaha ichro sín kixin kjuako ch'ín Pablo tí tán jina kuènte Jesús la ko kjuako ch'án kixin Jesús kjónté k'uén ntá xechón.

19 Ntá sákjuíko sín ch'ín Pablo ijnko tjo it'in Areópago. Ntiha mé kuènhen sín tójnkotsé sín kixin tjenkayáxixín sín. Ntá nixjehe sín tí ch'ín Pablo, ntáchro sín kixin:

—Tjinkaonni tsochrónka tí nkehe n̄xin kjuíkoa.

20 Itsjé tí nkehe ókjé tjetjàkua la tjinkaonni tsonoheni nkehe t'axrjexín kaín tíha —ichro sín.

21 Ntá kaín tí sín chjasin Atenas la ko tí sín tsíkjixín ókjé tjejó ntiha mé tóxrjienhya sín í jnko xra, jehí tóxrjínhin sín chrókuinhin sín la ko chrónixja sín ijnko nkehe nixin.

22 Ntá ch'ín Pablo k'uínkatjen ch'án kjuák'exín toté ch'án tí siín tí jehe sín chrítaón tí Tjo Areópago. Ntá ntáchro ch'án kixin:

—Jahará tjejorá chjasin Atenas tinhínrá. Janhan ó k'uíkuan kixin jahará la itsjé dios tinkachónkirá.

23 Ntá tí kjuak'é ntiha k'uájia la k'uíkuan itsjé tí nketí tjásixínrá culto ntá k'uitja ijnko altar ts'ínixín kixin: “Ntihi xraxinkakonxínni ijnko Dios naxa chónhyani”. Méxra tí Dios xráxinkáonrá kjónté naxa chonhyará mé tí Dios a mé tjákoHará.

24 Tí Dios mé kjuích'éna ch'án chjasintajni la ko kaín nkehe siín chjasintajni. Jehe ch'án mé inché nkajní la ko chjasintajni. La tjexenhya ch'án ijnko njnko tsíkjich'éanaxín chojni tja.

25 La t'ichjánxienhya ch'án kixin chojni chrókjuinkitsa tí jehe ch'án kixin jehe ch'án mé chjéhe kjuachón kaín chojni la ko tjanjon ch'án xrjnto la ko kaín nkehe siín.

26 'Kaín tí nación k'uaxrjeníxin jnkokoá chojni kixin chrók'uejó sín nkuíxín chjasintajni. Kjaxin chrónka Dios nkesá la ko nketí ts'ejó chojni.

27 Méxra jeheni t'ichjánxin tsjeyáni Dios kixin ntá tsienxínni nkexrí ts'itjani ch'án. Jehya imá ikjín itjen ch'án, chjino tí tjejóni itjen ch'án.

28 Jehe ch'án tjejóchónxinni ch'án la ko nchekinkíni ch'án la jehe ch'án t'ayakonhenni ch'án. Mé xikaha tsíntáchro jnko ch'ín chjasánrá ósé kixin: “Jeheni mé naxa kjéhya Dios.”

29 Jeheni mé naxa kjéhyani Dios méxra xitjahya tsjenkayáxinni kixin sich'énani Dios chica oro o chica plata o xro kixin éxi tsíkjenkayáxin chojni kixin sich'éna sín dios kuènte sín.

30 Senó Dios kóninkakonhya ch'án kixin ó nohe ch'án kixin naxa chónhya sín ch'án. Ntá ijie t'etuñhen Dios kaín xín chojni síin chjasintajni tsokjan sín la tsinkáchónki sín tí jehe ch'án.

31 Dios tsíkjeyá ijnko yaon sinchekitoexín ijie chojni chjasintajni. Tsíkjeyá ch'án ijnko chojni la kjuakoxin kaín kjuachaxin kixin tí nkexro kjónté tsík'en la xechón inaá —ichro ch'ín Pablo.

32 Na ntá tió kuínhin sín kixin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín kixin:

—Chr'éxin tsinhinni inaá tí nkehe ntáchrúa —ichro sín.

33 Ntá ch'ín Pablo kuítóhe ch'án tí jehe sín.

34 Na ntá iso sín kjuíchréhe sín ch'ín Pablo la kjuankixin tinkáchónki sín Ìnchéni. Ijnko tí sín tinkáchónki a mé it'in ch'án Dionisio mé ijnko tí síxreé kjuínchekitoexín ijie chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankixin sín tinkáchónki sín Ìnchéni.

18

Sákjuí ch'ín Pablo chjasin Corinto

1 Ntá kjuixin tíha ntá ch'ín Pablo sákjuíxin ch'án chjasin Atenas la sákjuí ch'án chjasin Corinto.

2 Ntiha mé xéta ch'án ijnko ch'ín judío it'in Aquila. Jehe ch'án mé tsíkjixin ch'án estado Ponto la séhya jehe ch'án la ko ichjién ch'án Priscila

mé kjuixín sín nación Italia kíxin t'ichjánxin ts'axrjexín sín ntiha kíxin tí ch'ín t'etoan mé it'in Claudio k'uetōan ch'án kíxin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín.

³ Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntahó kuítóeko kichó sín kíxin jnkokoá sich'e sín tí xra a.

⁴ Ntá jnkojnko tí yaon t'ok'éhe sín sákjuí ch'ín Pablo tí nínko nixjehe ch'án tí sín judío la ko tí sín jehya judío kíxin tjinkaon ch'án kíxin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuixín sín estado Macedonia ntá ch'ín Pablo kjuák'e xra ó kjuako ch'án itén Dios kíxin tsonohe tí sín judío kíxin Jesús mé tí nkexro Cristo.

⁶ Ntá tí sín judío mé kjuankíxin kónínkakohen sín tí ch'ín Pablo la imá k'uántaxínhín sín ch'án. Ntá jehe ch'án k'ótsjènka ch'án iké ch'án kíxin kjuakoxín ch'án kíxin xíkaha tsjasóte sín. Ntá ntáchro ch'án kíxin:

—A ntá ijie la jahará kjuéyará tí jie ts'itjáyanxínrá. A ntá janhan la í chontahya jie kíxin ó kjuakohará tí tán jína, a ntá kuítékákonhyará. A ntá ijie la íchá jína sátsjia tsjakoḥa tí sín jehya judío —ichro ch'án.

⁷ Ntá k'uaxrjexín ch'án nínko ntá sákjuí ch'án ntōe ijnko chojni mé it'in Justo mé jehe ch'án xraxinkaon ch'án Dios. Ntōe ch'án mé chjinaxón nínko.

⁸ Ntá ch'ín Crispo, ijnko nkexro t'etoan kuènte nínko, la ko kaín tí sín tjejó ntōe ch'án, mé kjuankíxin sín kuítekaon sín Ìnchéni. Kjaxin itsjé tí

sín tjejó chjasin Corinto mé kuínhin sín tí tan la ntá kjuankíxin sín kuítekaon sín Ìnchéni la kuíkite sín.

⁹ Ntá ijnko tie titàya k'uíkuèn ch'ín Pablo Ìnchéni nixjehe ch'án ntáchro kíxin:

—Chrakonhya tjákua itan kuèntana. Tìtoéhya tsochronka

¹⁰ kíxin janhan tjejóko kíchó ni kíxin ninkexró kohya nkehe sit'aha. Kíxin janhan la chonta itsjé chojni tí chjasin ntihi tinkáchónki tí janhan.

¹¹ Méxra ch'ín Pablo mé kuítóhe ch'án ijnko nánó ko t'ò ntiha chjasin Corinto, kjuakohé ch'án sín itén Dios.

¹² A ntá tí yaon k'ueṭoan ch'ín Galión estado Acaya, ntá itsjé tí sín judío kónínkakonhen sín tí ch'ín Pablo. Ntá itsé sín ch'án sákjuiko sín ch'án tí tjejó tí sín t'ṭoan.

¹³ A ntá ntáche sín tí ch'ín t'ṭoan kíxin:

—A ntá tí nkexro i ixri ch'án tjachroe ch'án chojni kíxin ókjé nkexrí chrókuinkáchónki sín Dios la ko tsitekakonhya sín tí nkehe t'ṭoan tí ley.

¹⁴ Na ntá tjinkaon ch'ín Pablo chrónixja, ntá ch'ín Galión ntáche ch'án tí sín judío kíxin:

—Tí chaxín ijnko jie jíe kjuasin tí ch'ín i ntá kjónté chrókuinhan tí nkehe ntáchrórá jahará judíorá.

¹⁵ A ntá jehí tjanjonxinrá tí nkehe nixjará la ko ihnié chojni la ko tí ley tinkachónkirá. Méxra jahórá chrókuinchekitoxínrá tíha kíxin janhan tjínkakonhya ts'óna juez sintakitoxian kuènte tí nkehe a —ichro ch'án.

¹⁶ Ntá k'ueṭoan ch'án kíxin sátsjixín sín ntiha.

¹⁷ Ntá tí sín griego la kónínkaon sín la itsé sín tí ch'ín Sóstenes tí ch'ín t'ṭoan kuènte tí nínko judío,

la ntahó kjuatexín sín ch'án. Jehe ch'ín Galión a la mé kjónté k'uíkon ch'án la ántosén ch'án.

Ch'ín Pablo xíkjan ch'án chjasin Antioquía ntá sákjuí ch'án níxin viaje

¹⁸ A ntá ch'ín Pablo kuítóhe ch'án chjasin Corinto itsjé yaon ntá nixjehe ch'án tí sín kíchó ni ntiha ntá k'uixenhen ch'án ntabárcō sákjuí ch'án nó estado Siria a sákjuíko ch'án tjan Priscila la ko ch'ín Aquila. Ntá kjuíji sín chjasin Cencrea la ntá naxa k'uixenhya ch'án ntabárcō inaá la ikjín ch'án mōloé kixin xíkaha kjuakoxin ch'án kixin kjuínchexiteyá ch'án tí nkehe chrónka ch'án.

¹⁹ Ntá tió kjuíji sín tí chjasin Éfeso ntá kuítóhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko nínko la ikjo ch'án tí sín judío tsíkójnkotsé ntiha.

²⁰ Ntá jehe sín chrónòda sín kixin chrókuitohe ch'án isé ntiha, kjánchó jehe ch'án la chrohya ch'án.

²¹ Ntá tuénxín nixjehe ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjahá tí jahará tí naxa tjinkaon Dios —ichro ch'án.

Ntá kuítóhe ch'án sín ntá k'uixenhen ch'án ntabárcō sákjuíxin ch'án chjasin Éfeso.

²² Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehe ch'án tí sín tinkáchónki Inchéni ntiha. Ntá tuénxín xíkjan ch'án chjasin Antioquía.

²³ Ntá kuítóhe ch'án ntiha itsjé yaon ntá xíkji ch'án inaá ntá xík'atsínka ch'án itsjé chjasin estado

Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

²⁴ Ntá tí yaon a mé ijnko ch'ín judío it'in Apolos ikui chjasin Éfeso mé tsíkijxin ch'án chjasin Alejandría. Jehe ch'án mé ijnko nkexro antsí nohe chrónka kixin chóxin ch'án xroon itén Dios.

²⁵ Jehe ch'án ó xrakohé ch'án ntie Ìnchéni ntá imá tóxrjínhin ch'án nixja ch'án la ko tsjako jína kuènte ch'ín Jesús. Kjánchó jehó nohe ch'án nkexrí kuikite chojni ch'ín Juan.

²⁶ A ntá ch'ín Apolos kjuák'e ch'án kjuako ch'án tí nínko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohé sín ch'án tí nkehe naxa noehya ch'án kuènte ntie Dios.

²⁷ Ntá tjinkaon ch'ín Apolos sátsji ch'án estado Acaya. Ntá tí sín kichó ni kjuínkítsa sín ch'án la ikjin sín ijnko xroon chr'énhen sín tí sín tinkáchónki Ìnchéni tjejó ntiha kixin jína tsjanjon sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakohé ch'án tí sín tsíkjin kítsa Dios tsíkitekaon sín ch'án.

²⁸ Ntá kjuakoxin ch'án kaín chojni kixin ntoáhya ch'e tí sín judío, la xitjahya tsontáchro sín náhí. Kjuakohé ch'án sín kixin tí xroon itén Dios chrónka kixin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naxa itjen ch'ín Apolos tí chjasin Corinto ntá ch'ín Pablo k'uatsínka ch'án nchónhya chjasin

chrík'á jna la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios.

² Ntá kjuanchankíhi ch'án sín kixin:

—¿Á k'uayéherá Nchakuen Dios tió kuinkachónkirá Ìnchéni? —ichro ch'án.

Ntá kjuátehe sín kixin:

—Náhi, kienhyani á tjen Nchakuen Dios —ichro sín.

³ Ntá kjuanchankí ch'ín Pablo kixin:

—¿Nkexro kjuachaxiэн kuíkítará? —ichro ch'án.

Ntá kjuátehe sín kixin:

—Éxi kjuako ch'ín Juan kuíkiteni —ichro sín.

⁴ Ntá ntáchro ch'ín Pablo kixin:

—Ch'ín Juan mé kuíkíte ch'án chojni kixin chrókjan sín chrókuinkáchónki sín Dios la ko kjuako ch'án kixin chrókuitekaon sín tí nkexro itsi chr'éxin. Tíha mé Jesús, tí Cristo —ichro ch'án.

⁵ Ntá kuínhin sín xikaha ntá kuíkíte sín kjuachaxiэн ihnié Ìnchéni Jesús.

⁶ A ntá ch'ín Pablo kjuák'etja itja ch'án chrítaón ikja sín ntá ikui Nchakuen Dios k'uáyéhe sín ntá kjuankixin sín nixja sín itsjé nkiva ókjé la ko kjuankixin sín kjuako sín tí nkehe kjuanjon Dios.

⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án ninko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuènte Dios.

⁹ A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'ántaxínhin sín tí tan jina kuènte Ìnchéni nkayakon chojni. Ntá tí ch'ín Pablo k'uaxrjentako ch'án tí sín

tinkáchónki Ìnchéni ntá ijnko escuela it'in Tiranno ntaha kjuakoxin ch'án kaín yaon.

¹⁰ Mé xikaha kjuák'e ch'án kjuako ch'án iyó nánó, ntá kaín tí sín k'uéjójó ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío.

¹¹ Ntá Dios antsí má kjuakoxin kjuaxroan jié kixin tí nixja ch'ín Pablo.

¹² Ntá itsjé chojni kjuikao sín pañitoé sín la ko iké sín kuákóxin ch'ín Pablo ntá sákjuíko sín kjuínchekakóxin sín tí sín níhi ntá kuítóhe sín jína la ko kjaxin nchakuen tí jínahya k'uaxrjexín tí jehe sín.

¹³ A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehé sín chojni mé tjinkaon sín tí kjuachaxién ihnié Jesús. La ntá ntáche sín tí nchakuen tí jínahya kixin:

—Kjuachaxién ihnié tí Jesús tjako tí ch'ín Pablo t'etoanxínni kixin jaha nchakuen jínahya sátjixian ntihi —ichro sín.

¹⁴ Mé xikaha k'uékjich'e tí yato xjeen ijnko ch'ín judío it'in Esceva mé ijnko nchát'á t'etoan.

¹⁵ Ntá ijnko yaon nixjehé sín nchakuen tí jínahya. Ntá tí nchakuen tí jínahya kjuátehe ntáchro kixin:

—Chóxinni nkexro ch'ín Jesús la ko ó noheni nkexro ch'ín Pablo. A ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'ín chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án kjuíncheníhi ch'án kaín sín la imá kjoté sín. Ntá k'uaxrjexín sín ntoe sín tjóhín sín la ko síchrít'ò cuérpóé sín.

17 Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsíkónhen la imá chrakon sín. Imá jié tí kjuachaxin ihñié Ìnchéni Jesús, ichro sín.

18 Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya.

19 Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exín sín xra ntá kjuaka sín tí libro a la k'uikon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín.

20 Ntá tí itén Ìnchéni sítinkák'ánkí la tjakoxin kixin chaxin chóna kjuachaxin.

21 Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá ntaha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma.

22 Ntá ichr'án ch'án iyó tí sín tjinkitsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxa kuítóhe ch'án estado Asia iso yaon.

Kónínkaon k'uíxité chojni chjasin Éfeso

23 Ntá itsjé chojni chjasin Éfeso kónínkaon sín la k'uíxité sín kixin kóxrjénhya sín tí itén Ìnchéni.

24 Kixin ntiha mé itjen ijnko ch'ín it'in ch'án Demetrio. Kjuích'éna ch'án nkehe chica plata tsjehe éxí ninko kuènte tí dios Diana la nchónhya

chichaon kjuacha ch'án la ko tí sín kjuích'eko ch'án xra.

²⁵ Ntá kójnkotséko sín í so sín jnkokón tí xra ch'e sín. Ntá ntáchro ch'án kixin:

—Jahará nohará kixin tí xra ch'eni la tjachani jína la náxrjón tjejóni.

²⁶ Kjánchó ó k'uíkonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsíkjanoya mé jehya Dios. Kjánchó jehya chjasin Éfeso ó. Náhí, nkuíxín estado Asia kuítekaon chojni.

²⁷ Imá tóxakonhenni kixin tí xra ch'eni ts'itjáyan la kjaxin tóxakonhenni tsontáchro sín kixin chónkó tí nínkøe tí dios Diana imá jié la ko ts'itjáyan tí kjuachaxin kuènte tjan. Ntá í tsitekakonhya sín tí kjuachaxin kuènte tjan nkuíxín estado Asia la ko kuenté chjasintajni —ichro ch'ín Demetrio.

²⁸ Ntá tí kuínhin sín xikaha la imá kónínkaon sín ntá k'uèya sín ntáchro sín kixin:

—Ts'itjáyanhya tí dios Diana kuènte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakonhen sín tí ch'ín Gayo la ko tí ch'ín Aristarco mé iyó sín tsíkjiixin sín Macedonia. Ntá kuinkánkákjen sín kuíkao sín tí nchia jié tójnkotséxin sín xráxin.

³⁰ Ntá ch'ín Pablo tjinkaon ch'án chrók'uixenhen ch'án tí nchia kixin tsonixjehe ch'án sín, a ntá tí sín tinkáchónki Ìnchéni mé chrohya sín kixin ts'ixenhen ch'án tí nchia a.

³¹ Kjaxin iso tí síxreé kuènte tí estado Asia mé chóxin sín ch'ín Pablo, ntá k'uetoan sín kixin tsochénka chojni tí ch'ín Pablo kixin chrókjuiatéhya ch'án tí siín sín ntiha.

³² **A** ntá iso tí sín tsíkójnkotsé ntáchro sín ijnko nkehe, la í so sín ntáchro sín ókjé nkehe kixin nínkaon sín. La itsjé sín la í noehya sín nkehe xra tsíkójnkotséxin sín kixin nínkaon sín.

³³ La iso sín judío chénka sín ijnko ch'ín it'in Alejandro nkerí xra kjuixín sín kixin tsonixja ch'án. Ntá kjuák'e ch'án jnkosiné ntá kjuakoxín ch'án itja ch'án kixin tsotání sín ntá tsonixjaxín ch'án tí sín judío tsinhin kaín chojni.

³⁴ Ntá tió kjuátsoan tí sín tsíkójnkotsé kixin kjaxin tí ch'ín a mé judío ch'án ntá kaín sín k'óyako sín chjina iyó hora ntáchro sín kixin:

—Ts'itjáyanhya tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uetsoan ch'án tsotání sín. Ntá ntáchro ch'án kixin:

—Chojni chjasén Éfeso tinhínrá. Kuenté chjasintajni nohe sín kixin tí sín chjasin ntihi mé t'ayakonhen sín tí nínko kuènte tí dios Diana. Tí retrato kuènte tjan mé tsíkixín nkaya nkajní.

³⁶ Kohya nkexro tsontáchro kixin chaxínhya tíha. Méxra tánírá. Tjenkayáxinrá jína nkehe chrókjuch'erá.

³⁷ Jahará kjuíkoará tí sín a ntihi la kjánchó k'uántaxíenhya sín tí nínkoeni la ko k'uántaxíenhya sín tí tjan santo kuènténi.

³⁸ Méxra ch'ín Demetrio la ko tí sín ch'eko ch'án xra la tí tjanchia sín jie jnkojín nkexro la siín juez sinchekitoexín. Méxra tsochrónka sín tí tjen tí ch'ín juez kixin jnkojnko sín la chrókuitoexín tí jie chóna sín.

39 Ntá tí siín ijnko nkehe tsjanchiará ntá t'ichjánxín tsojnkotsérá la ntoá chrókuitoexín.

40 Tóxakönhenni kixin kjá tí sín t'etqan ts'ekani sín jie kixin jehya jína k'uíxiténi kónínkaonni. Noehyani nkehe tsjateheni kixin tí tsjanchankí sín nkekuènte k'uíxiténi, tsixro sín.

41 La ntá k'uetqan ch'án kixin sátsji sín kixin ó kjuixin tí kójnkotsé sín.

20

Sátsji ch'ín Pablo estado Macedonia la ko estado Grecia

1 Ntá ti kjuixin k'uíxité sín, a ntá ch'ín Pablo k'uíyehé kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jína, ntá nixjehé kichó sín ntá sáxíkji ch'án nó estado Macedonia.

2 Ntá nkuíxín k'uatsínka ch'án la kjuínchechéhe ch'án tí sín tinkáchónki Ìnchéni kixin tí nkehe nixja ch'án. Ntá chr'éxín kjuíji ch'án estado Grecia.

3 Ntiha kuítóhe ch'án iní nitjó ntá chrók'uixenhen ch'án ijnko ntabárcq ntá sáchrókjui ch'án estado Siria. Ntá kónohe ch'án kixin iso sín judío nínkakohen sín tí jehe ch'án a ntá kjuenkayáxin ch'án tsokjanxín ch'án toté ch'án inaá ts'atsínka ch'án Macedonia.

4 Ntá tí sín sákjuíko ch'ín Pablo mé tí ch'ín Sópater mé jehe ch'án tsíkji xín ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkji xín sín chjasin Tesalónica, la ko ch'ín Gayo tsíkji xín ch'án chjasin Derbe, la ko kjaxin sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkji xín sín estado Asia.

5 Ntá tí sín kichó ni a mé kuítónxin sín ntia ntá tjejóchónhen sín tí jeheni chjasin Troas.

6 Kjuixin k'uátsínka tí kia tió kjóne sín niotja chóntahya tí xroan t'ánkíxin niotja, ntá k'uixenhenni ijnko ntabarco k'uaxrjexínni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuítónxin sín ntia. A ntá ntiha kuítóheni yato yaon.

Ch'ín Pablo sákjuí chjasin Troas

7 Ntá tí yaon xrankíxixín semana ntá kójnkotséni kíxin tsochrít'o niotja tsoxraxinkakonxínni Ìnchéni. Ntá ch'ín Pablo nixjehe ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxin, ntá antsí má sé tí nkehe chrónka ch'án la naxa tjenixja ch'án k'áxrótjen.

8 Tí tsíkójnkotsé sín a mé ijnko piso noi la ntiha mé síche nchónhya xrohi.

9 Ntá ntiha itjen ijnko ch'ín ntasoá it'in ch'án Eutico mé tjetjaxin ch'án chrítaón ventana. Ntá tí ch'ín Pablo imá sé nixja ch'án ntá tí ch'ín ntasoá mé tsíkíhi ch'án kotáchrin. A ntá xrínahya tsík'ajua ch'án ntá tsík'anótjexin ch'án tí ventana tí níxin piso ntiha ntá sákjuíkajatsen sín ch'án la ó tsíkjixin tsík'en ch'án.

10 Ntá ch'ín Pablo k'uínkajin ch'án ntá kjuítsínkaták'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín kichó ni kíxin:

—Chrakonhyará tsík'enhya ch'án, tjechón ch'án —ichro ch'an.

11 Ntá ch'ín Pablo k'ujit'ótjen ch'án inaá tí k'uínkajinxin ch'án kíxin ntiha ts'óxikayehe ch'án niotja sine sín tsoxraxinkakonxín sín Ìnchéni. Ntá

naxa tjenixja ch'án hasta k'uínkaséyan a ntá sákjuí ch'án.

¹² Ntá tí ch'ín ntasoá tsík'anótjen sákjuiko sín la tjechón ch'án kohya nkehe xéhe ch'án ntá kaín sín imá kóchéhe sín.

Sákjuixin ch'ín Pablo chjasin Troas kjuíji ch'án chjasin Mileto

¹³ Jeheni mé kuítónxinni ntia saoxín la k'uixenhenni ijnko ntabárcɔ sákjuíni nó chjasin Asón kixin ntiha tsoxetani ch'ín Pablo éxí tsintáchro ch'án kixin tjinkaon ch'án sátsjixín ch'án toté ch'án ntiha.

¹⁴ Ntá ó xetani tí jehe ch'án chjasin Asón ntá k'uixenhen ch'án tí ntabárcɔ kjaxin ch'án ntá sákjuíkoni ch'án nó chjasin Mitilene.

¹⁵ Ntá tí sákjuixinni ntiha ntá tí yaon chr'éxin ntá k'uátsínkani estado Quío ntá tí yaon chr'éxin kjuíjini chjasin Samos. Ntá inaá k'uixenhenni tí ntabárcɔ ntá sákjuíni chjasin Trogilio ntá ntiha k'ok'éheni. Ntá xík'ixenhenni ntabárcɔ inaá ntá tí yaon chr'éxin kjuíjini chjasin Mileto.

¹⁶ Mé xíkaha kjuích'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuíji ch'án chjasin Jerusalén kixin ntiha chrókjuak'e ch'án tí yaon Pentecostés, ichro ch'án.

Nixjehe ch'ín Pablo tí sín t'etuenhen ninko chjasin Éfeso

¹⁷ Tí itjen ch'ín Pablo tí chjasin Mileto k'uíyehé ch'án tí sín t'etuenhen tí ninko chjasin Éfeso.

¹⁸ Ntá tió kui sín ntá ntáchro ch'án kixin:

—Tí jahará la ó nohará nkexrí kjuak'é la ko kjuàkua desde tí yaon xrankíxixín k'uinka estado Asia.

¹⁹ Ó nohará kixin kaín tí yaon k'uejóni la kaín asenná kjuít'aha xra Ìnchéni la kjuíntahnkehya. Imá tsjanka kixin nchónhya kjuasótena kixin tjinkaon tí sín judío chrók'óyáanna sín.

²⁰ Janhan la kujtoahya kjuàkua kaín tí nkehe jína t'ichjánxin tsonohará. Mé xikaha kjuàkua tíó kójnkotsérá la ko xikaha kjuíkjàkuaxian jnkojnko ntoará.

²¹ Kjuákoha kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Ìnchéni Jesucristo.

²² Ntá ijie sátsjiyá chjasin Jerusalén kixin Nchakuen Dios k'ueṭuanna la í nonahya nkehe tsonna ntiha.

²³ Ntá jehó nòna kixin kaín chjasin ts'atsínka la chrónka Nchakuen Dios kixin tsjak'echjinana la ko tsjasótena.

²⁴ Kaín tíha la tóxakonahya. Kjónté chrókjuasótexián la ninkehó sínkíhyana la janhan la chàna kixin tí xra chonta la chrókjuíntaxín la chrókjuíntaxiteyá tí xra chjina Ìnchéni Jesús kixin tsjàkua tí tan jína nkexrí tjuèhe Dios chojni.

²⁵ 'Ntá jie ó nòna kixin tí jahará kjuákoahará kjuachaxin kuènte Dios la nijnkorá ts'ikonhyará tí janhan ínaá.

²⁶ Méxra tinhínrá ijie kixin í jehya jiena kixin jnkojínrá chrók'uitjáyánrá.

²⁷ Kixin ó kjuàkua kaín tí nkehe tjinkaon Dios kixin tsonohará la í t'itjáyanhya ninkehó.

28 Méxra xráxinkáonrá ts'ejorá jnkojína la ts'ayakonhénrá kaín tí sín tinkáchónki Ìnchéni kíxin Nchakuen Dios mé tjáhará tí xra pastor kíxin ts'ayakonhénrá tí sín kuènte tí nínkoe ch'án k'uenaxín ch'án tí ijnié ch'án.

29 Ó nòna tió sátsjia ntá itsji í so chojni éxí kolóbo jiehe tsotjinkaon sinchek'itjáyan tí sín tinkáchónki Ìnchéni.

30 La ntá kjónté jahará la isorá tjejorá ntihi tsjankíxinrá tsjakorá kjuach'ia chrínkí chrókjuákohérá kíchuára tí nkehe chaxín. A ntá tí sín tinkáchónki tsjichréhe sín tí nkehe ntoáhya.

31 Méxra chróxráxinkáonrá kíxin chjina iní nánó kjuak'é kjuákohará nchakotjin la ko tie la kujtoahya kjuintaxraxinkávan hasta kjuíncheníhi asenná nixjahará jnkojnko tí jahará.

32 'A nta jie la jahará kíchó ni tjetjáncháha Dios kíxin t'ayakuanxínrá ch'án tí itén ch'án kíxin tjua-hará ch'án. Jehe ch'án imá chóna kjuachaxin tsjinkĩtsará ntá ts'ayéherá kaín tí nkehe tjinkaon ch'án tsochjéhe ch'án kaín tí chojni tsíkótjóá.

33 Janhan mé kjuakéhya asenná chichakoen chojni o iké jnkojín chojni.

34 Náhí. Jahará ó nohará jína kíxin janhan na mé tjaná kjuít'axián xra kjuácha k'uenaxín tí nkehe t'ichjánxinna la ko kjaxin tí nkehe t'ichjánxinhin tí chojni k'uejókian.

35 Méxra kjuàkuaxínrá xikaha sich'erá xra kíxin jína tsjínkĩtsará tí chojni chóntahya. Xráxinkáonrá kíxin tsíntáchro Ìnchéni Jesús kíxin: “Antsí tsochéheni kíxin tí nkehe chrókjuanjonni, a ntá kánhyó tsochéheni kíxin tí nkehe chrók'uáyéheni.”

³⁶ Ntá kjuixin ntáchro ch'ín Pablo xikaha ntá jehe ch'an la ko kaín sin k'uéjóxin toch'in sín ntá nixjehe sín Dios.

³⁷ Ntá kaín sín tsjánka sín la ko kjóa sín ch'án la ko tséhe sín tja ch'an.

³⁸ Imá k'uává sín kixin chrónka ch'án kixin í ts'ikonhya sín ch'án inaá. Ntá sákjuíkotoxin sín ch'án nó tí tjen tí ntabárcɔ sátsjiko ch'án.

21

Sákjuí tí ch'ín Pablo nó chjasin Jerusalén

¹ A ntá tió kuítóheni tí sín kichó ni ntá k'uixenhenni ntabárcɔ la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara.

² Tí chjasin Pátara la mé ntiha k'uitjani ijnko ntabárcɔ sátsji nó estado Fenicia. Ntá k'uixenhenni tí ntabárcɔ a ntá sákjuíni.

³ Ntá tió k'uátsínkani la k'uíkonní tí nonte Chipre itjani ikjon kuítóhe ntá k'uatsínkani estado Siria. Ntá tí ntabárcɔ la ts'atsínka tsítóhe tí nkehe tjinká tí puerto chjasin Tiro, la jeheni la nachrohe sákjuíni tí chjasin a.

⁴ Ntá ntiha k'uitjani tí sín tinkáchónki Ìnchéni a ntá ntiha kuítóhekoni sín yato yaon. A ntá jehe sín mé kjuínchenohe sín Nchakuen Dios chénka sín tí ch'ín Pablo kixin sáchrókjuihya ch'án chjasin Jerusalén.

⁵ Ntá kjuixin k'uátsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuíkotoxinni

tí k'uaxrjentani ikon chjasin ntá sákjuíni chrínta ntayaon. K'uéjóxinni toch'inni nixjeheni Dios

⁶ ntá tuénxín nixjeheni sín jnkojína ntá tséhe tja kíchó ni. Ntá k'uíxenhenni tí ntabárc̄o, a ntá jehe sín ikjan sín nt̄oe sín.

⁷ Ntahó chjasin Tiro kjuixixín tí k'uíxenhenni tí ntabárc̄o ntá kjuíjini chjasin Tolemaida. Ntiha kjuínixjeheni tí sín kíchó ni tinkáchónki Ìnchéni. Ntá ntiha k'uéjókoni sín ijnko yaon.

⁸ Ntá tí yaon chr'éxín sákjuíxinni ntiha ntá kjuíjini chjasin Cesarea. Ntá ntiha sákjuíni nt̄oe ch'ín Felipe, ijnko ch'ín kjaxin tjako itén Ìnchéni. Jehe ch'án mé ijnko tí sín yat̄oxín tjinkĩtsa tí sín kjueyá Ìnchéni. A ntá jeheni mé kuít̄oheni ntiha.

⁹ Tí ch'ín Felipe a mé chón̄ta ch'án noó xj̄een ch'án chjin nax̄a tóteehya sín. Tí xj̄een ch'án a mé chrónkaxín sín tí itén Dios.

¹⁰ Ntá ntaha k'uéjókoni sín itsjé yaon ntá ikjui ijnko ch'ín nixja itén Dios it'in Agabo, tsík̄jixín ch'án estado Judea.

¹¹ Ikjui ch'án kjuinixjeh̄e ch'án tí jeheni la ntá kuákja ch'án tí tjōa t'ínkat'óxin ch'ín Pablo na ntá kjuínchentetoxín toté ch'án la ko itja ch'án ntá ntáchro ch'án kixin:

—Tí Nch̄akuen Dios mé ntáchro kixin mé xikaha chjasin Jerusalén tí sín judío sinchenteto sín ìnché tí tjōa sinchek'áyéh̄e sín ch'án tí sín jehya judío —ichro ch'án.

¹² Ntá kjuixin kuínhinni tíha ntá jeheni la ko tí sín chjasin Cesarea chrónóeheni tí ch'ín Pablo kixin sáchrókjuihya ch'án tí chjasin Jerusalén.

¹³ Ntá kjuát̄eh̄e ch'ín Pablo kixin:

—¿Nkekuènté tsjankará la ko nkekuènté nchek'ávárání? Janhan na chrakonhya kjónté jehya tí sinchentetona sín ó. Náhí. Kjónté kjaxin chrók'uénxiān chjasin Jerusalén tí tinkachónkia Ìnchéni —ichro ch'án.

¹⁴ Ntá kjuachahyani nixjehēni ch'án ntá kuítóheni ch'án. Ntáchroni kixin:

—Tí nkehe tjinkaon Ìnchéni mé tsonhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén.

¹⁶ Ntá sákjuíkoni iso tí sín tinkáchónki Ìnchéni tsíkjiixin chjasin Cesarea. Sákjuíkoni sín ntōe ijnko ch'ín tsíkjiixin Chipre it'in ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketí kuítóheni.

Ch'ín Pablo sákjuítsjehe tí ch'ín Jacobo

¹⁷ Tió kjuíjini chjasin Jerusalén ntá tí sín kichó ni tinkáchónki Ìnchéni mé kjuanjon sín kjuachaxin k'uéjóni la chéhe sín.

¹⁸ Ntá tí yaon chr'éxīn ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etōan kuènte nīnko.

¹⁹ Ntá ch'ín Pablo kjuixin nixjehē ch'án sín ntá tuénxín chrónka ch'án kaín tí xrā kjuích'e Dios tió kjuakohe ch'án tí sín jehya sín judío.

²⁰ Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kíchóni, jaha k'uíkuañ kixin siín itsjé mil sín judío ó kuinkáchónki sín Jesús kjánchó kaín sín ntáchro sín kixin t'ichjánxīn tsítóehyani tí ley.

21 Ntá tsíkinhin sín kixin jaha mé tsíkjákohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'uetōan ch'ín Moisés. La kjaxin kuínhin sín kixin jaha tsíkjákohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxí k'uékinkáchónkini ósé.

22 ¿Ntá nkehe chrókjuich'eni? Kixin tió tsinhin sín kixin kjuihá la tsojnkotsé nchónhya sín.

23 Méxra íchá jína jaha sinchexiteyá tíhi. Ntihi tjejó noó sín t'ichjánxin sinchexiteyá sín tí nkehe chénka sín Dios.

24 Jaha sáchrókjuíkoa sín la chrókótjóá jaha la ko jehe sín. La ko kjaxin chrókjuènka tsokjín sín ntá tsonoexín tí sín judío kixin chaxínhya tí nkehe tsíkinhin sín la ko tsonoexín sín kixin kjaxian jaha nchexiteyéhé tí ley.

25 A ntá tí sín jehya judío tsíkitekaon Ìnchéni la ikjinni ijnko xroon ó chr'énhenni sín. K'uetuēnhenni sín kixin sinehya sín tí nto tsíkjokehe chojni tí nkehe tsíkjanoya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín í jnko chojni chjin ókjé —íchro sín.

Tséxin sín tí ch'ín Pablo tí ninko

26 Ntá ch'ín Pablo sákjuíko ch'án tí noó sín la ntá tí yaon chr'éxin kjuínchetjóá asén sín. Ntá kjuixin ntá k'uixenhen ch'án tí ninko kixin tsochrónka ch'án kixin ó kjuixin kjuínchexiteyá ch'an tí nkehe k'uítuenhen ch'án. Tíhi mé t'axrjexín kixin jnkojnko sín tsjikao sín nkehe tsjanjon sín.

27 Ó chjina chróxétja tí yato yaon ntá iso tí sín judío tsíkjixín estado Asia mé tsík'ikon sín ch'ín Pablo nkaxenhen tí n̄nko. Ntá kjuínchekónínkaon sín kaín chojni chjasín ntiha ntá itsé sín tí ch'ín Pablo.

28 Ntá k'uèya sín ntáchro sín kixin:

—Kaínrá chojni chjasín Israel tsjínkitsaráni kixin tsotséni tí ch'ín i. Jehe ch'án mé ixri nkuíxín xritjakohē ch'án chojni nkehe jehya jína kuènte chjasénni, la ko titekakonhya ch'án tí ley kuènte Moisés, la ko titekakonhya ch'án n̄nkoeni. A ntá ijie la tsík'ixenko ch'án iso sín griego la kjuínchekjita sín nkaxenhen tí n̄nko tjóá —ichro sín.

29 Mé xikaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkjixín chjasín Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen n̄nko.

30 Ntá kuenté tí chjasín a kónínkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkákjenxín sín ch'án nkaxenhen n̄nko la kuakitsje sín ch'án ntója ntá tuénxín k'uíkjehe sín tí puerta n̄nko.

31 Ntá tjinkaon sín chrók'óyán sín ch'án ntá ijnko ch'ín comandante k'uētuenhen itsjé tí sín soldado romano kuínhin ch'án kixin kuenté tí chjasín Jerusalén k'uixité nínkaon sín.

32 Ntá tí ch'ín comandante sákjuíko ch'án iso sín soldado la ko tí sín k'uētuenhen tí soldado a la kuinká sín sákjuí sín tí siín tí chojni. Ntá tió k'uíkon tí sín a kixin ó kjuíji tí ch'ín comandante la ko tí

sín soldado a ntá kuítóhe sín, í kjuatehya sín ch'ín Pablo.

³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'ueṭoan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxín kjuanchankíhi ch'án sín kixin nkexro tí jehe ch'ín Pablo la ko nkehe tí kjuích'e ch'án.

³⁴ A ntá tí chojni tsíkójnkotsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuènte xikaha kjuích'e sín kixin k'uíxité sín. Ntá k'ueṭoan ch'án kixin tí sín soldado sátsjiko sín tí ch'ín Pablo tí cuartel síin tí sín soldado.

³⁵ La ntá tió kjuíjiko sín ch'án tí t'it'ótjenxin sín tí nchia a ntá t'ichjánxin kuámá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín.

³⁶ Kaín tí chojni chréhe nóton t'èya sín ntáchro sín kixin:

—Chrók'uen ch'án —ichro sín.

Ch'ín Pablo chrónka nkayakon chojni kixin chóntahya ch'án jie

³⁷ Ntá tió sáchrókjuíko sín ch'ín Pablo tí nkaxenhen tí cuartel kuènte tí sín soldado a ntá kjuanchankíhi ch'ín Pablo tí ch'ín comandante ntáchro ch'án kixin:

—¿Á jína tsonixjahani jaha intsí? —ichro ch'án.

Ntá kjuátehe tí ch'ín comandante ntáchro ch'án kixin:

—¿Jaha la á noha nixja griego?

³⁸ Méxra ¿á jehya jaha tí chojni tsíkjin Egipto kjuínchenínkaon chojni la ko sákjuíko nteje tí noó mil chojni tsíkjàya? —ichro ch'án.

39 Ntá kjuátēhe ch'ín Pablo ntáchro ch'án kixin:

—Náhí, janhan mé ijnko chojni judío. Tsíkokjínaxián chjasin Tarso, estado Cilicia. Janhan me ijnko chojni tsíkjixin ijnko chjasin imá tjetooan. A ntá ijie xrjannóaha kixin tsjánjuan kjuachaxin tsonixjahā tí chojni —ichro ch'án.

40 Ntá tí ch'ín comandante kjuanjon kjuachaxin ntá ch'ín Pablo kjuák'exín toté ch'án tí tjen escalera ntá tja ch'án ó kjuakoxin ch'án kixin tsotání sín. Ntá tání sín ntá kjuankixin nixjaxin ch'án nkiva hebreo. Ntáchro ch'án kixin:

22

1 —Jahará kichó ni la ko chojni it'é xjan tinhínrá nkehe tí tsōxrjanka kixin chontahya jie —ichro ch'án.

2 Ntá kuínhin sín kixin nixjaxin ch'án nkiva hebreo ntá antsí má tání sín. Ntá ntáchro ch'ín Pablo inaá kixin:

3 —Janhan mé ijnko chojni judío tsíkokjínaxián chjasin Tarso estado Cilicia. K'uankixian ntihi chjasin Jerusalén la kjuintakuáxian tí nkehe kjuako tí ch'ín Gamaliel la titekavan tí ley tsíkincháxónkí tí sín tsík'axrjenixinni ósé. Tjínkavan chrókjuít'aha Dios xrā kaín asenná éxí tjinkáonrá jahará ch'erá tí yaon ijie.

4 Ti senó k'uénínkakonhan chrók'oyán tí sín tinkáchónki Inchéni kjuintanteto chojni ntoa la ko chojni chjin kixin chrók'uejóchjina sín.

5 A ntá tí sín nchat'á t'etoan la ko kaín tí sín táda t'ayakonhen njnko la mé nohe sín kaín tíha kixin jehe sín mé kjuanjon sín xroon ts'áyéhe tí sín kichó ni judío tjejó chjasin Damasco. Ntá sákjuia nó

ntiha kixin chrókjuíkjéyá tí sín tinkáchónki Ìnchéni kixin chrótse sín ntá chrókjuíkian sín ntihi Jerusalén chrokjuasóte sín.

Ch'ín Pablo chrónka nkexrí kjuankíxin tinkáchónkí ch'án Ìnchéni (Hch. 9.1—9; 26.12—18)

⁶ 'A ntá tió kjuasán chjina chjasin Damasco chjina chonkixin ntá xrínahya k'uinkáséyan jnkontatjén tí tjén ijnko xrohi imá t'inkaséyan kuixin nkajní.

⁷ Ntá kjuachr'ítsinka nonte ntá tuénxín kuinhan itén ijnko nkexro nixjana ntáchro kixin: “Saulo, Saulo, ¿nkekuènté ninkákonna xritjéyá tí janhan?”

⁸ Ntá kjuánchánkiá kixin: “¿Xá nkexro jaha?” Ntá kjuátehe ch'án ntáchro ch'án kixin: “Janhan mé tí nkexro Jesús tsíkjiixin chjasin Nazaret, mé tí nkexro xritjéyá.”

⁹ La ntá tí sín k'uájikian mé k'uíkon sín tí xrohi la chrakon sín kjánchó kuíenhya sín itén tí nkexro nixjana.

¹⁰ Ntá kjuánchánkiá kixin: “¿Xá nkehe tsonhen tjinkávan sít'aha jaha?” Ntá kjuátehe ch'án ntáchro kixin: “T'àyá sátjia t'ixenhén chjasin Damasco ntá ntiha tsochrónka sín kaín nkehe sich'e.”

¹¹ Ntá tí xrohi a mé k'uíxenka ikuan ntá í xitjahya t'íkuan. Ntá tí sín chríkjan mé kuinkátséna sín sákjuíkian sín chjasin Damasco.

¹² 'Ntá ntaha kjuák'e ijnko ch'ín it'in Ananías ijnko chojni jína kjuínchexiteyéhe ch'án tí ley kuènte ch'ín Moisés. Kaín tí sín judío siín chjasin Damasco tjikosáyehe sín tí jehe ch'án.

13 Ntá ch'ín Ananías mé kuitsjehe ch'án tí janhan ntá tió kui ch'án ntáchro ch'án kixin: “Kíchóni Saulo, ijie la ts'ayéhé kjuachaxin ts'ikuan inaá.” Ntá ó jína t'ikuan.

14 Ntá tuénxín ntáchro ch'án inaá kixin: “Tí Dios kuinkáchónki tí sín tsík'axrjeníxinni la ó tsíkjejá ch'án tí jaha kixin tsonoha nkehe tjinkaon ch'án la ko kixin ts'ikuan tí nkexro jína la ko tsinhín tan k'uaxrjexín ir'va ch'án.

15 Jaha mé tsochronka tí nkehe k'uíkuan la ko tí nkehe kuínhín tsinhín kaín tí chojni chjasintajni.

16 A ntá jie la í choénhya má. T'àya la tsikitiaxián ihnié Ìnchéni kixin mé ts'ímáxin ijjá,” ichro ch'ín Ananías.

Pablo chrónka kixin Dios ichr'án ch'án tsjakohe tí sín jehya sín judío

17 'Na ntá tió xíkjan chjasin Jerusalén ntá sákjuia n̄nko tsonixjah̄a Dios ntá titàya k'uíkuen

18 Ìnchéni ntáchro ch'án kixin: “Tjoka ts'axrjéxian chjasin Jerusalén kixin tsitekakuenhya sín tí nkehe tjàkua mé tí tan kuèntana.”

19 Ntá janhan ntátjan ch'án kixin: “Ìnchéni, jehe sín ó nohe sín kixin senó k'uék'atsínka kaín tí n̄nko la k'uétse tí sín tinkáchónki tí jaha la sákjuíkian sín ntqechiso k'uékon sín.

20 Tió k'óyán sín tí ch'ín Esteban tí nkexro k'uékjit'aha x̄ra, k'uénixja ti tan kuènta ntá janhan k̄axin tjéntaxián ntiha la janhan ntáxrjan kixin ó nchoxon its'en ch'án la k'uáyakonhan tí iké tí sín kjuàya.”

21 Ntá Ìnchéni xínixja ínaá, ntáchro ch'án kixin: “Tétuanhan jaha kixin sátsjia chjasin kjín kixin tsjákohé tí chojni jehya judío.”

Ntá tí ch'ín comandante k'uáyéhe tí ch'ín Pablo kixin tsjasóte ch'án

22 Ntá tí sín tsíkójnkotsé mé kuínhin sín kaín tíha ntá kjuankixin k'uèya sín ntáchro sín kixin:

—Its'en ch'án, í tsjak'echónhya ch'án —ichro sín.

23 Naxa t'ixratáhya sín t'óyako sín ntá tótsjénka sín iké sín la ko kuákja sín nche it'e sín.

24 Ntá tí ch'ín comandante mé k'uetuēhen ch'án tí sín soldado a kixin sátsjiko sín ch'ín Pablo nkaxenhen tí cuartel kuēnte sín. Ntá ntiha k'uetōan ch'án kixin tsjatexín sín ch'án chikoté ntá tsonoxín tí ch'ín comandante nkekuēnte imá t'óyako sín nínkakohenhén sín tí jehe ch'án.

25 Ntá kjuixin kjuínchenteto sín ch'án kixin tsjate sín ch'án ntá nixjehē ch'ín Pablo ijnko ch'ín capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxa kjuéyáhyará nkerí jje chonta? —ichro ch'án.

26 Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án kixin:

—¿Nkehe s̄ich'e jaha kixin tí nkexro i mé ijnko chojni romano?

27 Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án. Ntá kjuátēhe ch'ín Pablo kixin chaxín jehe ch'án.

28 Ntá ntáchro tí ch'ín comandante kixin:

—¿A ntá nkexrí kixin janhan nchónhya chichaon kjuènkà kixin ts'ónana chojni romano?

A ntá ntáchro ch'ín Pablo kixin:

—Janhan na chojni ntiha tsíkokjínaxián.

²⁹ Na ntá tí sín soldado chrókjuate ch'ín Pablo mé kuínhin sín kixin ch'ín Pablo ijnko chojni romano ntá kuítóhe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsíkjinchenteto ch'án.

Ch'ín Pablo nixjehe ch'án tí sín t'etoan kuènte tí sín judío

³⁰ A ntá tí kóyaon ntá tí ch'ín comandante a mé tjinkaon ch'án tsonohe ch'án nkehe tí jie chrók'ueka tí sín judío tí ch'ín Pablo. Ntá kjuas-intankà ch'án chica cadena tsíchróntetoxín tja tí ch'ín Pablo ntá k'uetōan ch'án kixin tsojnkotsé kaín tí nchat'á t'etoan la ko tí sín t'etoan kuènte sín judío, a ntá kuakitsje ch'án tí ch'ín Pablo la kjuak'e ch'án jnkōsiné tí siín tí jehe sín.

23

¹ Ntá ch'ín Pablo komá tí sín t'etoan kuènte sín judío ntá ntáchro ch'án kixin:

—Kíchóni, tí k'uékjak'é hasta ijie la Dios tjetsjehe kixin ijnko kjuaxrexinkaon jína chonta —ichro ch'án.

² Ntá tí ch'ín Ananías tí ch'ín nchat'á t'etoan mé k'uetuēhen ch'án tí sín chjino tjejó tí tjen ch'ín Pablo tsochjéhe sín ir'va ch'án.

³ Ntá kjuátehe ch'ín Pablo kixin:

—Dios mé sinchekjasóte ti jaha kixin ntoáhya kjuich'e. Tjetjāxian méhe kixin tsjéyá nkehe tí

jię chonta éxí nixja tí ley. A ntá ¿nkekuènte kuítekákonhya tí ley, la kuétōan kixin ts'ékonna? —ichro ch'án.

⁴ A ntá tí sín siín ntiha ntáchro sín kixin:

—¿Á xikaha ts'antaxínhín tí nchat'á t'etōan kuènte Dios?

⁵ Ntá kjuátehe ch'ín Pablo ntáchro ch'án kixin:

—Kíchóni, kjuatsoanhya janhan kixin jehe ch'án mé tí nchat'á t'etōan. Ntáchro tí xroon itén Dios kixin: “Chrók'uantaxíenhya tí chojni t'etuenhen chjasán”^{*} —ichro ch'án.

⁶ Ntá ch'ín Pablo mé kónohe ch'án kixin iso chojni siín ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'uèya ch'ín Pablo, ntáchro ch'án kixin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jię chonta kixin janhan mé tinkachónkia kixin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankixin sín ikjo kichó sín ntá xikaha jnkokónhya kjuenkayáxin tí sín tsíkójnkotsé ntiha.

⁸ Kixin tí sín saduceo a mé ntáchro sín kixin tsoxechónhya chojni tsík'en la ko kjaxin kohya sín ángel la ko kohya nchakuen. A ntá tí sín fariseo la titekaon sín kaín tí nkehe a.

⁹ Ntá kaín sín k'uèya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kixin:

^{*} 23:5 Éxodo 22.28

—Tí ch'ín i, kohya ninkehó nkehe jínahya kjuích'e ch'án. Ách'e ijnko nchakuen chojni o ijnko ángel mé nixjehe ch'án —ichro tí sín fariseo.

¹⁰ Ntá imá sítjité sín nínkaon sín. Ntá tí ch'ín comandante a mé tóxakonhen ch'án kixin chrókjuinchekuen sín tí ch'ín Pablo ntá k'uetuēhen ch'án tí sín soldado a kixin sátsjikakjín sín ch'án la tsíkao sín ch'án inaá tí cuartel kuente tí sín soldado.

¹¹ A ntá tí tie a na ntá xrínahya titàya k'uúkuèn ch'ín Pablo Ìnchéni nixja ch'án, ntáchro kixin:

—Chrakonhya Pablo kixin éxí chronka tanná chjasin Jerusalén la mé xíkaha tsochronka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxín a ntá iso tí sín judío a mé kjuenkayáxin sín kixin ts'óyán sín tí ch'ín Pablo. Ntá k'uákjenxin sín ihnié Dios chaxín tsoxiteyá la sinehya sín la ko ts'ihya sín ninkehó tí naxa ts'óyánhya sín ch'án.

¹³ Chjina cuarenta sín kjuenkayáxin sín kixin xíkaha sich'e sín.

¹⁴ Ntá sákjuíchenka sín tí sín nchat'á t'etōan la ko tí sín t'etuēhen kuente tí sín judío la ntáche sín kixin:

—K'uákjenxinni ihnié Dios kixin chaxín tsoxiteyá kixin í sinehyani ninkehó tí naxa ts'óyánhyani tí ch'ín Pablo.

¹⁵ Méxra ntá jahará la ko í so ti sín t'etuēhen tí sín judío tsontácherá tí ch'ín comandante a kixin tsíkao sín tí ch'ín Pablo ntihi tí tjejorá ntóye nchítjen kixin antsí má tsjanchankíhírá ch'án nkehe siná á chaxín tí jie t'íká ch'án. A ntá jeheni

senó ts'ejóchónhenni tí tsjixin ch'án ntá ts'óyánni ch'án kixin í tsjihya ch'án ntihi —ichro sín.

16 Ntá tí xjeen tí kǵave tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uíxehen ch'án cuartel kuènte tí sín soldado kixin tsochrónka ch'án nkehe tí tjo sín kuínhin ch'án.

17 La ntá ch'ín Pablo mé k'uíyehē ch'án ijnko tí sín capitán la ntáchro ch'án kixin:

—Sátsjiko a tí ch'ín ntasoá ti tjen tí ch'ín comandante kixin tjinkaon ch'án tsochrónka ch'án nkehe —ichro ch'án.

18 Ntá tí ch'ín capitán a mé sákjuíko ch'án ti tjen tí ch'ín comandante ntá ntáchro tí ch'ín capitán a kixin:

—A ntá tí ch'ín Pablo tjechjina mé k'uíyehēni ch'án kixin tsjikaoni tí ch'ín ntasoá ntihi kixin tjinkaon ch'án tsonixjaha jaha —ichro ch'án.

19 Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kixin:

—¿Nkehe tí tjinkávan tsochrónka? —ichro ch'án.

20 Ntá ntáchro tí ch'ín ntasoá a kixin:

—Iso ti sín judío mé kjuenkayáxin sín kixin tsjan-chaha sín kixin ntóye nchítjen sátsjiko a ch'ín Pablo tí tsojnkotsé tí sín judío t'etǵan. Sit'ayaha sín tsontáchro sín kixin tjinkaon sín tsjanchankíhi sín ch'ín Pablo tí nkehe antsí má xra.

21 A ntá jaha la chrókuítekákonyha kixin chjina cuarenta chojni tjejóchónhen sín imó la k'uákjenxin sín ihnié Dios kixin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsonohe sín nkehe tsixrua jaha —ichro ch'án.

22 **A** ntá tí ch'ín comandante a mé nixjehe ch'án tí tí ch'ín ntasoá la k'uetoan ch'án kixin:

—Tsochenkahya ninkexró kixin xikaha kjuíchronka —ichro ch'án.

Ich'án sín tí ch'ín Pablo tí itjen tí ch'ín gobernador Félix

23 Ntá tí ch'ín comandante a mé k'uíyehē ch'án yaá tí sín capitán a ntá k'uetoan ch'án kixin tsoyaxínhin sín sátsjiko sín iyó ciento sín soldado sátsjixín toté la ko setenta tí sín tsjiták'á kokate la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án.

24 La ko k'uítuenhen sín sinchekamá sín kokate tsjiták'á ch'ín Pablo la ts'ayakonhen sín ch'án jína kixin kohya nkehe tsonhen kixin tsjiji ch'án tí tjen ch'ín Félix, tí ch'ín gobernador.

25 Ntá tí ch'ín comandante ikjin ch'án ijnko xroon a, ntáchro kixin:

26 “Janhan mé tí ch'ín Claudio Lisias chr'anhan ijnko xroon kixin jaha ch'ín Félix ijnko gobernador jína, nixjaha.

27 Tí sín judío a mé itsé sín tí ch'ín i kixin chrók'óyán sín ch'án. Ntá tió kónòna kixin ijnko chojni romano tí jehe ch'án la ntá sákjuíkian sín soldado kjuíntakaá ch'án.

28 Tjínkavan tsonòna nkekuente kixin nínkakonhen sín ch'án. Ntá sákjuíkian ch'án tí tsíkójnkotsé tí sín judío.

29 Ntá kónoxín kixin nínkakuenxín sín ch'án kixin tí ley kuente sín kjuínchexiteyáhya ch'án, ichro sín. Jehya jie jie tsíkjasin ch'án kixin chrók'óyán sín ch'án o chrókjuak'echjina sín ch'án.

30 Ntá ó kuınhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuánchaha tí sín a kixin chrókjuııi sín tí tjen jaha chrókjuá sín kixin nkekuènte nínkakonhen sín ch'án. Kjuasáyá. Ó tjen.”

31 Ntá tí sín soldado a mé kjuínchexiteyá sín éxı k'uıtuenhen sín a ntá sákjuıko sín tí ch'ın Pablo tí tie a chjasin Antıpatris.

32 Ntá tí yaon chr'éxın tí sín soldado xrixın toté ó a mé xıkjan sín tí cuartel kuènte sín. Ntá tí sín k'uéjókjen kokate a mé naxa sákjuıko sín tí ch'ın Pablo.

33 Ntá tió kjuııi sín tí chjasin Cesarea ntá tí sín soldado a mé kjuanjon sín tí xroon a chjéhe sín tí ch'ın gobernador la ko kjaxin kjuínchek'áyéhe sín ch'án tí ch'ın Pablo.

34 Ntá kjuıxin kjuínchekuáxin tí ch'ın gobernador a tí xroon ntá kjuanchankı ch'án nketı chjasén ch'ın Pablo. La ntá kónohe ch'án kixin estado Cilicia tsıkjıxin tí ch'ın a.

35 Ntá ntáchro ch'án kixin:

—Ntá tsınhan nkehe tsixro tí sín itsji ts'eka jie.

Ntá k'uétuēnhen ch'án tí sín soldado a kixin ts'áyakonhen sín tí ch'ın Pablo tí nchia kuènte ch'ın Herodes.

24

Ch'ın Pablo nixjehē ch'án ch'ın Félix chrónka ch'án kixin kjuasinhya ch'án jie

1 Ntá k'uátsínka in'ó yaon, ntá ch'ın Ananías, tí nchat'á imá t'etoan, kjuııi ch'án chjasin Cesarea. Kjaxin kuıkao ch'án iso tí sín t'etoan kuènte nınko

a la ko ijnko ch'ín abogado it'in Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuènte ch'ín Pablo.

² Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankixin ch'án nixjehe ch'án tí ch'ín Félix ntáchro ch'án kixin:

—Kjuasáyá jaha gobernador kixin imá kjuínkítsa kixin kjuaxróxin tjejóni la kjuasáyá kixin imá noha kjuincheyóxian tí nación kuènteni.

³ Kjuasáyá jaha Félix. Imá jína jaha kixin k'uáyeheni kaín tíha.

⁴ Tjínkakhonhya sintak'itjáyanhan nchónhya tiempo la xrjanóaha kixin chrókjuak'é chrókuinhín intsikoá tí nkehe tsöxrjanka.

⁵ A ntá ijie ó k'uitjani kixin tí ch'ín i mé éxí ijnko chin t'óxíka kuenté chjasintajni kixin ch'iehe ch'án tí sín judío ntá xíka sín. Jehe ch'án mé t'etöan ch'án tí sín tinkáchónki tí ch'ín tsíkjiixin chjasin Nazaret.

⁶ Jehe ch'án mé kjaxin chrókjuinckejitá ch'án tí njnko. A ntá itséni ch'án ntá chrókjuinckekitöexínni tí ijie ch'án éxí t'etöan tí ley kuènteni.

⁷ A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakitse sín tí ch'ín Pablo.

⁸ Ntá k'uetöan ch'án kixin tí sín tjanchia jie chrókuitsjehe sín tí jaha kixin jaha chrókjuanchankíhí ch'án kixin chrókónoha jína nkexéhe tí jie chrókjuinckekjasótexín sín ch'án —ichro tí ch'ín Tértulo.

⁹ Ntá ntáchro kaín tí sín judío siín ntiha kixin:

—Kaín tíha la chaxín —ichro sín.

10 Ntá tí ch'ín gobernador a mé kjuakoxin tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéheni kixin tsonixjahani tsochrónkani kixin kohya jië kjuasinni kixin ó noheni kixin jaha la juez kuènte tí nación ntihi la nchónhya nánó tétōan.

11 Jaha la kjaxin ó chrókónoha kixin na ntá teyó yaon kjuíjini chjasin Jerusalén kixin ntaha tsoxráinkakonxínni Dios.

12 Kónoxínhya kixin nijnko nkexro chrókjuachaxinni, la ko kjuínchexakuenhyani ninkexró n̄nko la ko ni tí n̄nko ntsí la ko ninketó chjasin.

13 Tí sín i la xitjahya tsontáchro sín kixin xikaha tí jië kjuasinni.

14 Janhan chaxín xrjanka kixin t'ahā xrā tí Dios k'uékinkáchónki tí sín tsík'axrjeníxinni mé yóhe tí ntia n̄ixin. A ntá jehe sín ntáchro sín kixin ókjé nkehe tinkáchónkini. Kjánchó janhan mé tinkáchónkia kaín tí nkehe tsíkjin sín tí xroon kuènte ley la ko tinkáchónkia kaín tí nkehe k'uénixja tí sín k'uéchrónka itén Dios.

15 Kjaxín tinkáchónkia tí Dios tinkáchónki tí jehe sín kixin tjéchōnhan kixin Dios sinchexechón kaín chojni jína la ko kaín chojni jínahya kjaxin.

16 Méxrā tóxakonna kixin tjóá chrókjuak'é kixin chrókjuanchahya Dios jië la ko kjaxin chojni chrókjuanchahya jië.

17 Nta kjuixin k'uatsínka iso nánó ixrini ókjé ntá kjuíjini chjasénni kixin tsjanjonni chichaon la ko kjaxin tsochjéheni Dios nkehe.

18 Méxrā mé xikaha tjenni nkaxenhen n̄nko nta iso sín judío tsíkjiixin estado Asia ó xetani ntiha.

Ntá kjuínchetjóáni asénni la tsjéhya chojni k'uíkon la kohya chojni kjuánjonkoni.

¹⁹ A ntá tí sín a mé t'ichjánxín chrókui sín ntihi kixin chrókjuanchia sín jie tí nínkakonna sín.

²⁰ A ntá tí náhí la tí sín tjejó ntihi chróchrónka sín kixin nkehe tí jie k'uitjaxín sín tió kjuák'eni tí tjejó tí sín t'etōan kuente tí sín judío.

²¹ Kjá tí tsontácho sín kixin náxrxónhya ijnko nkehe itsen k'uèya ntáxrxan kixin: “Ijie sinchekitoexinrá jiēna kixin sinchekjasótenará kixin janhan tinkachónkia kixin tsoxechón chojni tsik'en” —ichro ch'án.

²² Ntá kjuixin kuínhin tí ch'ín Félix, la jehe ch'án jína kónohe ch'án kixin nkexrí tí ntia nixin. Ntá kjuínchekitoexínhya ch'án ijie ch'ín Pablo. Ntácho ch'án kixin:

—Tsijia tí ch'ín comandante Lisias ntá tsochrónka ch'án nkekuente tí jie tjanchiará ntá tsonona —ichro ch'án.

²³ Ntá k'uetuenhen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsí la ko tsítóhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxín ntá kjuíjiko ch'ín Félix tjan Drusila ichjién ch'án, mé ijnko tjan judía. Ntá k'uetōan ch'án kixin tsjik'íyehē sín tí ch'ín Pablo kixin tsochrónka ch'án nkexrí tinkáchónki chojni Jesucristo.

²⁵ A ntá ch'ín Pablo mé kjuako ch'án kixin nkexrí ts'ejó chojni jína la ko nkexrí ts'etuenhen chojni asén sín kixin ch'ehya sín tí jínahya la ko nkexrí Dios sinchekitoexín ijie chojni tí tsjixixín. Ntá ch'ín Félix

kuínhin ch'án xikaha ntá chrakon ch'án, ntáchro ch'án kixin:

—A ntá jie la sátjia. Ntá ts'iyaha tió chonta tiempo —ichro ch'án.

²⁶ A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehē ch'án tí ch'ín Pablo kixin tsonixjehē ch'án.

²⁷ Ntá xikahó kónhen hasta k'uátsínka iyó nánó ntá tí ch'ín Félix kuítóhe ch'án tí xra gobernador la ntá í jnko ch'ín it'in Porcio Festo mé k'uixenhen ch'án tí xra a ínaá. A ntá ch'ín Félix mé kuítóhe ch'án tí ch'ín Pablo tjechjina ch'án kixin tjinkaon ch'án chrókjuinchexiteyá ch'án tí nkehe tjinkaon tí sín judío.

25

Ch'ín Pablo nkayakon tí ch'ín Festo

¹ Ntá tí ch'ín Festo kjuíji ch'án ntiha kixin ts'ixenhen ch'án tí xra gobernador. Ntá iní yaon chr'éxin ntá sákjuixin ch'án chjasin Cesarea la kjuíji ch'án chjasin Jerusalén.

² Ntiha tí sín nchat'á t'etoan la ko tí sín judío imá tjetean mé kjuanchia sín kixin tsjasóte ch'ín Pablo.

³ Kjuanchia sín kixin xra ó chrók'uetoan ch'án kixin chrókjui ch'ín Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntia ts'óyan sín tí ch'ín Pablo.

⁴ Kjánchó ch'ín Festo kjuátehe ch'an ntáchro ch'án kixin ó tsíkjenkayáxin ch'án kixin í séhya tsjak'e ch'án ntiha. Méxra tí ch'ín Pablo la tjechjina

ch'án chjasin Cesarea la xitjahya ts'etoan ch'án kixin tsjixrakoa.

⁵ Ntá ntáchro ch'án kixin:

—Tí chojni tjetoan kuéntará sáchrókjuikian ntiha chjasin Cesarea. A ntá tí chaxín tsíkjasin ch'án jiē ntá ntiha la jína tsjanchia sín jiē —ichro tí ch'ín Festo.

⁶ Ntá ch'ín Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea ínaa. Ntá tí yaon chr'éxin a kjuák'etjaxin ch'án tí tjet'etoanxín ch'án ntá k'uetōan ch'án kixin tsjikakjín sín tí ch'ín Pablo.

⁷ Ntá tió k'uixenhen ch'ín Pablo ntiha ntá tí sín judío kuixin Jerusalén kóchjinehe sín ch'án ntá kjuanchia sín nchónhya jiē imá hyé. Kjánchó ijnko nkehe chaxínhya t'eka sín ch'án jiē.

⁸ A ntá tí ch'ín Pablo a chrónka ch'án kixin kjuasinhya ch'án jiē. Ntáchro ch'án kixin:

—Ninkehó jiē kjuasinhyani mé ninkexró kjuánjonkohyani la ko kjaxin jehya chrókuitekakonhyani tí ley kuente tí sín judío la ko jehya chrókuitekakonhyani tí nínko la ko jehya chrókuitekakonhyani tí ch'ín gobernador romano.

⁹ A ntá ch'ín Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'ín Pablo ntáchro ch'án kixin:

—¿Á tjinkávan sátsjia chjasin Jerusalén kixin ntaha janhan chrókjuintakitoaxián nkehe tí jiē chonta jaha? —ichro ch'án.

¹⁰ Ntá kjuátēhe ch'ín Pablo kixin:

—Náhí, jeheni ó ntihi tjenni tí t'etoanxín tí sín gobierno romano la jína chrókjuinchekitoexián

ijjéni kixin jaha la ó noha kixin ninkehó ijje kjuích'ehyani tí sín judío.

¹¹ Kja tí chaxín kjuásian ichrén jie jie chrók'uénxian la chrakonhyana kjónté chrók'uén. A ntá ti chaxínhya xikaha t'ekana sín jie la ninkexró chóntahya kjuachaxin chrók'uetoan sáchrókjuikoni tí jehe sín. A ntá tjánchíá kixin jehe tí ch'ín imá t'etoan mé sinchekitoexín tí jie —ichro ch'án.

¹² Ntá ch'ín Festo mé kjuanchankíhi ch'án iso tí sín tjinkitsa ch'án ntá ntáchro ch'án kixin:

—Jaha mé tjanchia kixin tí ch'ín imá t'etoan sinchekitoexín ch'án ijjá. Méxra tétuanhan sátsjia tí tjen tí ch'ín a —ichro ch'án.

Ch'ín Pablo nkayakon tí ch'ín rey Agripa

¹³ Ntá k'uátsínka iso yaon ntá tí ch'ín rey Agripa la ko tjan Berenice kjuíji sín chjasin Cesarea kixin tsonixjehe sín tí ch'ín Festo.

¹⁴ Ntá ntiha mé kuítóhe sín itsjé yaon ntá ch'ín Festo a mé chénka ch'án tí ch'ín rey nkehe kuente tí ch'ín Pablo. Ntáchro ch'án kixin:

—Ntihi itjen ijnko ch'ín tjechjina tsíkítóhe ch'ín Félix.

¹⁵ A ntá tió kjuak'é chjasin Jerusalén ntá tí sín nchat'á t'etoan la ko tí sín t'etuénhen tí sín judío a mé kjuíjitsjehe sín tí janhan ntá kjuanchia sín jie kuente ch'ín Pablo. Kjuanchia sín kixin chrók'óyánni tí jehe ch'án.

¹⁶ Ntá janhan kjuátaha kixin: Jeheni chojni t'etoan kuente sín romano mé kuénhyani ts'etoanni its'en ninkexró tí naxa tsochjinahya tí ch'ín kjuasin jie kixin tsontáchro ch'án á chaxín tí jie tjanchia sín o náhi.

17 Ntá ti sín judío kui ntihi ntá chuanyha má. Kjónté tí yaon chr'éxin kjuak'étjaxian tí ntakitōexián ijié chojni la kuétoan kíxin síxrakoa tí ch'ín Pablo.

18 A ntá tí sín kóchjina kohya ninkehó ichro sín kuènte ti jehe ch'án éxí kjuenkayáxian janhan chróntáchro sín.

19 Jehó nínkakuenxín sín ch'án kíxin tí nkehe tǐnkáchónki ch'án la ko nínkakuenxín sín ch'án kíxin tí nkexro it'in Jesús mé ik'uén ch'án ntá jie ntáchro ch'ín Pablo kíxin tjechón ch'án ínaá.

20 Janhan la nonahya nkexrí tsitōexín tí ijié ch'án ntá kjuánchánkíhā tí ch'ín Pablo á tjinkaon ch'án sátsji ch'án chjasin Jerusalén kíxin ntaha tsitōexin tí jíé ch'án.

21 A ntá jehe ch'án tsíkjanchia ch'án kíxin tí ch'ín imá t'etōan mé chrókjuinchekitōexín ch'án ijié ch'án. Ntá kuétoan janhan kíxin naxa nti-hyó tsjak'echjina ch'án tsononajia janhan nkesá tsétuanyhan ch'án sátsji ch'án ntiha —ichro ch'án.

22 A ntá ch'ín Agripa ntáche ch'an tí ch'ín Festo kíxin:

—Kjāxian janhan tjínkavan tsínhan tí nkehe tsochrónka tí ch'ín a.

Ntá kjuátēhe ch'ín Festo ntáchro ch'án kíxin:

—Ntóye tsinhín nkehe tsochrónka ch'án.

23 Ntá tí yaon chr'éxin tí ch'ín Agripa la ko tí tjan Berenice kjuíji sín la k'uíxenhen sín la ko tí sín soldado t'etōan tsíkjikāo sín, la ko k'uíxenko sín iso chojni tjetoan kuènte chjasin ntiha. Ntá k'uetōan ch'ín Festo kíxin tsjixrakoa tí ch'ín Pablo.

24 Ntá ntáchro ch'ín Festo kíxin:

—Jaha ch'ín rey Agripa tinhín la ko tinhínrá kaín rá tsíkójnkotsérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuítóehya sín, tjanchana sín kixin chrók'uen ch'án.

²⁵ **A** ntá tónhenni kixin kohya jie jié kjuasin ch'án kixin chrók'uen ch'án. Kjánchó jehe ch'án mé tsíkjanchia ch'án kixin tí ch'ín imá t'etōan chrókjuinchekitōexín ijíé ch'án. Ntá kjuenkayáxian kixin tsétuānhān ch'án sátsji ch'án ntiha.

²⁶ Nonahya nkehe chaxín tsokjian ts'áyéhe tí ch'ín t'etōan. Ntá jie kuétōan kjuíkakjín sín ch'án kjuíkāo sín ch'án tí tjejóni ntihi kixin tjetōan kixin jaha ch'ín Agripa la ko kaín rá tjejorá ntihi tsjan-chankíhírā ch'án kixin mé tsonōna janhan nkehe tsokjian.

²⁷ Méxra náxrjónhya chróchr'an ijnko tí chojni tjechjina naxa nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

¹ Ntá tí ch'ín rey Agripa a mé ntáche ch'án tí ch'ín Pablo kixin:

—Ó nchoxon jahvá tsochronka —ichro ch'án.

Ntá tí ch'ín Pablo mé kjuaya tja ch'án ntá kjuankixin nixja ch'án, ntáchro ch'án xikihi:

² —Chàna kixin tsonixja nkayakuan tí jaha rey Agripa tsoxrjanka kaín tí jie t'ekana tí sín judío.

³ Ó noheni kixin jaha la ó noha jina kuènte tí ley la ko tí nkehe tinkáchónki tí sín judío, la ko

jaha noha nkehe tí kjuachaxin sín kíchó sín. Méxra xrxjannóaha kixin tjak'etinhín jína.

Chrónka ch'ín Pablo nkexrí kjuák'e ch'án tí ósé

⁴ Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána.

⁵ Kjaxin jehe sín la ó nohe sín la kjá jína chróchrónka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuente tí nkehe tinkáchónkini.

⁶ Ntá ijie sinchekitoexián jiena kixin nínkaon tí sín judío a kixin tjéchonhan kixin Dios mé sinchexechón chojni inaá xikaha tsíchénka ch'án tí sín tsík'axrjeníxinni.

⁷ Tí teyó tribu tsík'axrjeníxin ch'ín Israel mé tjejóchónhen sín kixin ts'ikon sín tsoxiteyá tí nkehe tsíchronka Dios. Méxra xraxinkaon sín Dios nchakotjin la ko tie. Méxra mé xikaha tjéchonhan, jaha rey Agripa, la mé xikaha nínkakonna tí sín judío ijie.

⁸ ¿Á títekákonhyará jahará kixin Dios sinchexechón chojni tsík'en?

Ch'ín Pablo k'uénínkakonhen ch'án tí chojni tinkáchónki Inchéni

⁹ Janhan mé kjaxin k'uékjenkayáxian nchónhya nkehe k'uénínkakonhan tí sín tinkáchónki Jesús tí nkexro tsíkjixin chjasin Nazaret.

¹⁰ Mé xikaha kjaxin k'uékjit'a chjasin Jerusalén. Tí sín nchat'á t'etoan mé kjuanjon sín kjuachaxin kixin janhan tsochr'áxanhan ntoechiso nchónhya tí

sín tinkáchónki Ìnchéni. Ntá tíó k'óyán sín tí sín a mé janhan la ntáxrjan kixin ó nchoxon xikaha kónhen.

11 Nchónhya veces kjuintakjasóte tí sín tinkáchónki Ìnchéni kixin chrókuítóhe sín tí nkehe tinkáchónki sín. Mé xikaha k'uékjít'a kaín xín nínko kixin imá k'uénínkakonhan tí jehe sín la xikaha k'uájichráha sín kjónté sátsíkji sín chjasin ókjé.

Chrónka ch'ín Pablo nkexrí kuinkáchónki ch'án Ìnchéni
(Hch. 9.1—19; 22.6—16)

12 'Méxra xra ó sákjuia janhan chjasin Damasco. Tí sín nchát'á t'etoan mé ó kjuanjón sín kjuachaxin kixin xikaha t'ahá sín xra.

13 A ntá tí ntía a jaha rey chrókónoha kixin chonkixin k'uíkuan éxí ijnko xrohi t'inkaséyan kuixin nkaya nkajní antsí má fuerte la kánhyó fuerte tí xrohi kuènte yaon la tí t'inkaséyan mé k'uantatjen tí janhan la ko tí sín xríkian.

14 Ntá kaín ni kjuítsínkani nonte ntá xrínahya kuinhan nixja ijnko nkexro mé nkiva hebreo nixjaxin ch'án. Ntáchro tí nkexro a kixin: “Saulo, Saulo, ¿nkekuènte nínkakònna xríjéyá tí janhan? Jahvá nchekjasóte asán kixin tjanjónkoa tí janhan. Éxí yóhe ijnko koxinta kónínkaon va tí chriáte sín va chica yo mé xikaha jaha.”

15 Ntá kjuánchánkiá kixin: “¿Xá nkexro jaha?” Ntá tí nkexro me kjuátehe kixin: “Janhan mé Jesús mé tí nkexro chréhé jaha.”

16 Ijie t'áya jaha, tjak'exián totá. Janhan kjuánjuan kjuachaxin kixin k'uíkuan tí janhan ijie kixin jaha sich'ena xra. Janhan kjuéyá tí jaha

kíxin tsochénka chojni kíxin k'uíkuan tí janhan la ko tsochronka tí nkehe tsjákohá ínaá tí xik'ikuan tí janhan ínaá.

¹⁷ Janhan ts'ayakonhan kíxin kohya nkehe sit'aha tí sín judío la ko tí sín jehya judío. A ntá jie tétóan satsjia.

¹⁸ Méxra tétóan sátsjia tí tjejó tí jehe sín kíxin takítjenkia ikon sín kíxin í ts'ajihya sín ntja sítié la ts'aji sín ntja t'inkaséyan la ko tsochóntahya tí jínahya kjuachaxién ts'etuenhen tí jehe sín. Jehe sín mé tsinkáchónki sín tí janhan. Ntá janhan ts'áyáha sín la tsjìn ijíé sín la ko tsítónhen sín tí nkehe ts'áyéhe kaín tí sín tsíkjinchetjóá Dios," ichro Ìnchéni.

Ch'ín Pablo kuítekaon ch'án tí nkehe tsík'ikon ch'án

¹⁹ Mé xikaha jaha rey Agripa kjuíntaxiteyáha tí nkehe k'uíkuan kujxin nkaya nkajni.

²⁰ Saoxín kjuákoḥa tí sín siín chjasin Damasco, la ntá chr'éxin chjasin Jerusalén, la ko kuenté tí estado Judea ntá kjaxin kjuákoḥa tí sín jehya judío. Kjuákoḥa sín kíxin chrókuítóhe sín ijíé sín, la chrókjan sín chrókuinkáchónki sín Dios, la ko chrókjuákoxin sín xra jína kíxin chaxín ó kjuitóxinhin sín tí nkehe tinkáchónki sín.

²¹ Mé xikaha tí xra tséxinna tí sín judío a nkaxenhen nínko la tjinkaon sín chrók'óyánna sín.

²² Ntá kjuasáyé Dios kjuínkítsana la ntoá itjén ijie tjákoḥa kaín chojni ntsíntsí la ko chojni ihyé la ninkehó k'uantaxíanhya kuente tí nkehe tsíchrónka tí sín tsíchrónka itén Dios la ko tí nkehe tsíchrónka ch'ín Moisés tsonhen,

²³ kixin t'ichjánx̄in its'en Cristo la ko tsox-echón ch'án inaá. Tí itén ch'án éxí ijnko xrohi ts'inkaséyanx̄ín tí s̄ín sīn ntihi la ko tí s̄ín sīn í so nació̄n kixin tsaáxin s̄ín.

Ch'ín Pablo nixjehe ch'án ch'ín Agripa kixin chrókuinkáchónki ch'án Ìnchéni

²⁴ Mé x̄ikaha ichro ch'ín Pablo kixin kohya j̄ie kjuasin ch'án ntá tí ch'ín Festo mé itsen k'uèya ch'án kixin:

—Pablo jaha la kjá tsík'ixikján. Imá tsíkjinchekuáxian mé x̄ikaha tsíkólókoxián —ichro ch'án.

²⁵ Ntá kjuátehe ch'ín Pablo kixin:

—Jehya tsík'ixikjánna. Jaha Festo imá tjuaha. A ntá tí nkehe ntáxrjan la ijnko nkehe jina la ijnko nkehe chaxín.

²⁶ Ntihi itjen tí ch'ín rey Agripa. Jehhe ch'án mé jina nohe ch'án kaín tí nkehe a. Méxra tjenixjaha ch'án jnkojina kixin ó nòna kixin jehhe ch'án ó nohe ch'an kaín nkehe kónhen kixin jehya ijnko nkehe imó kónhen tíha.

²⁷ Jaha, rey Agripa, ¿á titekávan tí nkehe tsíkjako tí s̄ín tsíchronka itén Dios ósé? Janhan la ó nòna kixin titekávan jaha.

²⁸ Ntá kjuátehe ch'ín Agripa ntáchro ch'án kixin:

—Ó antsíkoá chrokjuacha chrókuachròena kixin chrók'ónana cristiano —ichro ch'án.

²⁹ Ntá ntáchro ch'ín Pablo kixin:

—Ntáxrjan kixin á isé tsoxrjanka o á séhya la Dios mé tjinkaon kixin jehya jahvá chrókuinkachónkia ch'an. Náhi. Kjaxin tjinkaon ch'án kixin kaín nkexro tjejótinhin chrók'óna s̄ín éxí tí janhan kjánchó x̄ikahya chróchónta s̄ín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótxajin ntiha.

³¹ Ntá kaín sín k'uaxrjenta sín la ikjo sín kíchó sín. Ntáchro sín kíxin;

—Kohya jie tsíkjasin tí ch'ín a kíxin chrók'uenxín ch'án la ko chrókjuak'echjinaxín ch'án ntøechiso.

³² Ntá tí ch'ín Agripa ntáche ch'án tí ch'ín Festo kíxin;

—Ó nchoxon chrókjuánjuan kjuachaxin sáchrókjui tí ch'ín a tí jehe ch'án chrókjuanchahya ch'án kíxin tí ch'ín imá t'etøan sinchekitoexín ijíé ch'án —mé xíkaha ichro tí ch'ín Agripa.

27

Ch'ín Pablo sákjuí ch'án chjasin Roma

¹ Ntá k'uetøan sín sátsjini nación Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'in Julio. Jehe ch'án me ijnko policía kuente tí ch'ín t'etøan Augusto César.

² Ntá k'uíxenhenni ijnko ntabarco tsíkjixín nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjixín chjasin Tesalónica nó estado Macedonia.

³ A ntá tí yaon chr'éxin mé kjuíjini ti puerto chjasin Sidón. Ntá ch'ín Julio mé ikjo jnkojína ch'ín Pablo ntá chjéhe ch'án kjuachaxin kíxin sátsjitsjehe ch'án tí chojni chóxin ch'án ntiha kíxin tsjinkítsa sín ch'án.

⁴ Ntá chr'éxin sákjuíxinni chjasin Sidón. Ntá kjuíjini ijnko isla it'in Chipre la nó tja kjonni kuítóhe tíha la imá chjéhe xríntø.

⁵ Ntá k'uatòyeni tí ntayaon chjinaxón chjasin Cilicia la ko Panfilia la ntá kjuíjini chjasin Mira estado Licia.

⁶ A ntá ntiha tí ch'ín capitán, tí ch'ín k'uetuēhen tí sín soldado a, mé k'uitja ch'án í jnko ntabárcō tsíkijixin nó chjasin Alejandría sátsji nó nación Italia. Ntá ntáchro ch'án kixin tíha sátsjikoni kixin tsijijini ntiha.

⁷ Nchónhya yaon kjuíjixinni kixin imá iyó la imá xrā kjuíjini chjino chjasin Gnido. Ntá naxā chjéhe xrintō tsankā ntá k'uátsínkani chjinaxón Salmón ntá kuinkátjíaixinni chjino tí isla Creta.

⁸ Ntá xikahó imá xrā k'uátsínkani chjinó chrínta ntá kjuíjini ijnko chjasin it'in Puertos Jína chjino chjasin Lasea.

⁹ Ntá k'uitjáyankí nchónhya yaon, ntá ó kjuixraká tí yaon xitjahya sátsjiko sín ntabárcō chrítaón ntayaon kixin ó kóchjina tí nchakuen kin. Méxrā ch'ín Pablo nixjēhē tí sín a.

¹⁰ Ntáchro ch'án kixin:

—Tinhínrá tí nkehe tsoxrjanka. T'íkuan kixin nchónhya kjuachrakon tsonhen. Sinchek'itjáyanni tí ntabárcō a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuēnte tí sín soldado a mé antsí má tjinkaon ch'án chrókuinhin tí nkehe chrónka tí ch'ín tjiko ntabárcō la ko tí nkehe chrónka tí inché tí ntabárcō ā ntá tí nkehe ntáchro ch'ín Pablo la náhí.

¹² Jehya jína kixin tí puerto ntahó chrók'uejóni ntá chrók'uatsínkajia tí nchakuen kin, ichro sín. Kaín sín kjuenkayáxin sín kixin íchá jína sátsjixínni ntiha kixin ákué xitjahya chrókjuijini chjasin

Fenice, ijnko puerto estado Creta nó chók'lá noroeste la ko suroeste, la ntaha chrók'uejóni ntá chrók'uatsínkajia tí nchakuen kin.

Tí xr̄into chjéhe chr̄itaón ntayaon

¹³ Ntá kjuankíxin chjehe xr̄into kjuix̄in nó sur kjánchó kánhyó fuerte ntá kjuenkayáxin sín kixin kjá jína sátsjini.

Ntá sákjuix̄inni ntiha kjánchó kjónté nax̄a sákjuíni chjinaxón tí chr̄inta ti isla Creta a.

¹⁴ A ntá chr̄'éxin ikjui ijnko xr̄into kjuix̄in noroeste k'uíntaté tí ntabárc̄o.

¹⁵ La kjuankíxin xr̄into sákjuíko tí ntabárc̄o kixin tsjachahyani sátsjini tí sítjix̄in tí xr̄into a. Ntá t'ichjánxin kuítóheni sákjuíko xr̄into tí ntabárc̄o tjejóxenhenni.

¹⁶ Ntá k'uátsínkani chjino ijnko isla ntsí it'in Clauda kixin ntiha mé kánhyó tjian chjéhe xr̄into. Ntá imá xr̄a k'uítjiani tí ntabárc̄o ntsí t'etenix̄in nóton ntabárc̄o jié.

¹⁷ Ntá kjuix̄in kjuínchek'it'ótjen sín tí ntabárc̄o ntsí ntá imá chrakon sín ntá kjuínchenteto sín tí ntabárc̄o jié kixin kohya nkehe tsonhen. Kjaxin tóxakonhen sín chrakon sín tsíkjine nchesen tí ntabárc̄o tí tsiji sín tí it'in Sirte. Ntá kuakjinjin sín tí ka chóna ntabárc̄o ntá kuítóhe sín sátsjiko xr̄into.

¹⁸ Ntá tí yaon chr̄'éxin ntá nax̄a imá tjian chjéhe xr̄into. Ntá ik'ue sín tí nkehe sítjinká tí ntabárc̄o a chr̄inta ntayaon kixin kánhyó tsoye.

¹⁹ A ntá tí yaon nixin a mé itjani ó kuakitsjex̄inni tí nkehe kuènte tí ntabárc̄o.

²⁰ Isé k'uíkonhyani yaon la k'uíkonhyani konotsé kixin imá tjian chjéhe xr̄into la ko kjaxin ó

k'uitjáyenhenni kaín tí tjenkayáxinni ḱixin naxa chrókuaáni.

²¹ Ntá ó k'uatsínka itsjé yaon kjónehyani ntá k'uínkatjen ch'ín Pablo nixjehe ch'án kaín tí sín tjejóxehen ntabárc̣o a ntáchro ch'án ḱixin:

—Chrókuítekáonrá tí nkehe xrx̣anka ḱixin chrókuitq̣heni tí estado Creta ntá chrók'uitjáyenhyani tí nkehe tjinká tí ntabárc̣o a.

²² A ntá ijie la tóxakuanhyará ḱixin kohya nijnko tí jahará its'enrá ḱixin kjónté tí ntabárc̣o la ts'itjáyan.

²³ Ntá tí tie a mé k'uíqụan ijnko ángel tsíchr'án Dios tinkachónkia la ko t'aḥa x̣ra.

²⁴ A ntá tí ángel mé chrónka ḱixin: “Chrakonhya jaha Pablo. T'ichjánx̣in tsjasán tí tjen tí ch'ín César t'eṭoan la kjaxin Dios la tsjinḳitsa jaha la ko tí sín tjejókoa ḱixin ts'enhya sín.”

²⁵ Méxra chróchrakonhyará jahará ḱixin tí Dios tinkachónkia la chaxín nchexiteyá tíha, éxí tsíntáchro tí ángel.

²⁶ Kjónté ó jehí t'ichjánx̣in sátsjikoni x̣rinṭo ijnko nonte jnḳosiné ntayaon —ichro ch'án.

²⁷ Kjuixin k'uátsínka iyó semana ntá ijnko tie ntá kjujini ijnko ntayaon it'in Adria ntá sákjuíko tí ntabárc̣o ijnko lado la í jnko lado ti x̣rinṭo. Ntá chjino k'áxrótjen ntá tí sín tjiko ntabárc̣o mé ó kónohe sín ḱixin ó chjina kjuixraká sin ijnko nonte xámá.

²⁸ Ntá kjuáchṛoa sín tí nkekjaín ṇinkaxín tí ntá mé chóna treinta y seis metro ṇinkaxín. Ntá sákjuíni ḱjinhya la ó xíkjachṛoa sín la veintisiete metro ó ṇinkaxín.

29 Imá chrakon sín kixin ts'itjat̄on tí ntabárc̄o itj̄o ntá kjuinkajin sín noó chica gancho tí nóton tí ntabárc̄o a kixin nta^{hó} tsochónhen tí ntabárc̄o hasta chrók'uinkaséyan.

30 Ntá tí sín tjiko ntabárc̄o kjuenkayáxin sín sáchrókjui sín ntá kjuankíxin kjuinkajin sín tí ntabárc̄o ntsí chrítaón nta^h éxí tjinkaon sín chrókjuinkajin sín tí gancho chón^{ta} tí kja ntabárc̄o.

31 A^h ntá ch'ín Pablo ntáche tí ch'ín capitán la ko kaín tí sín soldado kixin:

—A^h ntá tí tsit̄oehya tí sín i ntihi nkaxenhen ntabárc̄o ntá xitjahya tsaára —ichro ch'án.

32 Ntá tí sín soldado a mé kóchrínjint'̄o sín tí hno^h kuènte ntabárc̄o ntsí tsit̄ohe sín tsjiankí nta^h.

33 Ntá chjina t'inkaséyan a ntá ch'ín Pablo nixjeh̄e ch'án kaín tí sín siín ntiha ntáchro ch'an kixin chrókjón̄e sín ichrén nkehe. Ntáchro ch'án kixin:

—Ó k'uátsínka iyó semana k'uejóchrinhyará la ko kjóntehyará.

34 Tinhínrá t'ichjánxin chrókjón^{terá} ichrén nkehe tí tjinkáonrá tsaára kixin ntihi la kohya nkexro ts'itjáy^{an} la nijnko tí kax̄ihi chón^{ta} kjará ts'itjáy^{an}.

35 Ntá xikaha ichro ch'ín Pablo ntá kuákja ch'án ijnko niotj̄a a la ntiha tí tjejó kaín sín ntá kjuanchia ch'án kjuasáyé Dios ntá kóchrít'̄o ch'án ntá kjuankíxin kjón̄e ch'án.

36 Ntá kóchéh̄e sín kaín sín kjuankíxin kjón̄e sín kjaxin.

37 Kaínni tsík'ixenhenni ntabárc̄o mé iyó ciento setenta y seis chojni.

38 Ntá kjuixin kjóne sín la kókjehe sín ntá ik'ue sín tí noa trigo a tjinká tí ntabárc̄o a chrínkí tí ntayaon a kixin kánhyó tsoye tí ntabárc̄o a.

Tí ntabárc̄o kjuixin k'uániánkí nt̄a

39 A ntá ó k'uínkaséyan, a ntá tí sín tjiko ntabárc̄o la kjuátsoanhya sín tí nonte ntá k'uíkon sín ijnko chrínta nt̄a. Ntáchro sín kixin ákué tsjachahya sín sátsjiko sín tí ntabárc̄o ntiha.

40 Ntá kóchrínjint'ò sín tí hno síchroéxin tí gancho kixin ntahó tsitōhe chrínkí ntayaon. Ntá kjuínchentá sín tí nkehe tjikoxín sín tí ntabárc̄o a. Ntá kjuínchek'it'ótjen sín tí ka tjiko nkayakon tí ntabárc̄o. A ntá tí ntabárc̄o kjuankíxin sákjuí chrínta nt̄a.

41 Xrínahya kjuíji ntabárc̄o tí iyó kójnkojiéxin ntayaon ntá ntiha kjuíkjiat'ó tí kja tí ntabárc̄o tí nchesen siín ntiha. Ntá í xitjahya nchekinkí ninkehó, a ntá nóton tí ntabárc̄o kjuankíxin síxíka kixin imá sítji chjéhe nt̄a a.

42 Ntá tí sín soldado a mé tjinkaon sín chrók'óyán sín tí sín tjejóchjina kixin tjinkakonhya sín kixin ninkexró sáchrókjuí ókjé.

43 A ntá tí ch'ín t'etuenhen tí sín soldado a mé tjinkakonhya ch'án kixin its'en ch'ín Pablo ntá kjuanjonhya ch'án kjuachaxin. Íchá k'uetōan ch'án kixin tí sín jína tjitaón nt̄a la senó sátsji sín kixin tsjiji nonte xámá

44 la ko tí sín noehya tsjitaón nt̄a a mé sátsjiko sín ti ntatabla o it'ò tí ntabárc̄o. Ntá xíkaha kaín ni kjuíjini tí nonte xámá la ó kuaáni.

28

Itjen ch'ín Pablo tí isla Malta

¹ Ntá tió tjejóni kaín ni kuaáni ntá kónoheni kíxin tí isla la mé nchek'in sín Malta.

² A ntá tí sín chjasin ntiha mé imá jína kjuínkítsa sín kaín ni la kjuaka sín ijnko xrohi jié kíxin imá kin kíxin sít'aniá chrin. Ntá k'uèya sín kíxin tsochjinani kaín ni tsochjírōheni.

³ A ntá ch'ín Pablo mé sákjuíkakja ch'án í so njo tsíxámá ntá kjuasinkáte ch'án tí xrohi a. Ntá xrínahya k'uaxrjenkíxin ijnko konche tí xrohi a kíxin imá sóa ntá xrínahya k'uísímá itja ch'ín Pablo.

⁴ Ntá tí sín chjasin ntiha mé k'uíkon sín tí konche kjtjankítjen itja ch'án ntá ikjo sín kíchó sín. Ntáchro sín kíxin:

—Kjá tí ch'ín a la ijnko chojni tsíkjàya a kíxin kjónté kuaá ch'án k'uénxinhya ch'án ntayaon la Dios la í tjinkakonhya kíxin naxax tsjak'echón ch'án.

⁵ A ntá jehe ch'án kótsjénka ch'án itja ch'án chrítaón tí xrohi kíxin ntiha ts'anótjen tí konche, ntá jehe ch'an la kohya nkehe kónhen ch'án.

⁶ Ntá kaín sín tjejóchónhen sín kíxin ách'e ts'atjoyé itja ch'án o ách'e its'en ch'án. Ntá kjuixin k'uéjóchónhen sín isé la k'uíkon sín kíxin kohya nkehe kónhen ch'án ntá kjuitóxin sín tí nkehe kjuenkayáxin sín la ntáchro sín kíxin jehe ch'án mé ijnko dios tíha, ichro sín.

⁷ Ntá chjino tí k'uéjóni a mé itjen nontēe ijnko ch'ín t'etōan kuente isla me it'in Publio. Mé jína kjuanjon ch'án kjuachaxin k'uejóni ntōe ch'án la kjuanjon ch'an nkehe kjóneni iní yaon.

⁸ Ntá it'é tí ch'ín Publio a mé tjetsínka ch'án kixin níhi ch'án chóna ch'án sóa la ko chinjñi. Ntá ch'ín Pablo sákjuítsehe ch'án la kjuixin nixjehe ch'án Dios, ntá kjuák'etja itja ch'án tí ch'ín a ntá kuítóhe ch'án jína.

⁹ Mé xikaha kjaxin kóchjina í so tí sín níhi siín tí isla ntá kaín sín kuítóhe sín jína.

¹⁰ Na ntá imá kjuikosáyehe sín ch'án. A ntá chr'éxin tió kjuixin k'uixenhenni ntabárcø ínaá ntá kjuanjon sín kaín nkehe t'ichjánxinhinni sátsjikoni.

Kjuíji ch'ín Pablo chjasin Roma

¹¹ Ntá k'uátsínka iní nitjó tjejóni tí isla ntá k'uixenhenni ijnko ntabárcø mé ntahó tsíkitóhe k'uátsinkajia tí nchakuen kin. Tí ntabárcø a mé tsíkjixin chjasin Alejandría la ko mé chóna nkehe tsíkjanoya chóna ihnié dios Cástor la ko Pólux.

¹² Ntá sákjuíni ntá kjuíjini puerto chjasin Siracusa la ntaha kuítóheni iní yaon.

¹³ Ntá xík'ixenhenni tí ntabárcø la k'uatsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankíxin chjehe xrinto kjuixin nó sur, ntá yaon yóxin ntá kjuíjini chjasin Puteoli.

¹⁴ Ntá ntiha xetani iso kíchó ni, a ntá tjinkaon sín ts'ejókoni sín ntiha. Ntá k'uéjókoni sín ijnko semana ntá chr'éxin sákjuíni chjasin Roma.

¹⁵ Ntá tí sín kíchó ni chjasin Roma la ó nohe sín kixin tsijjini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án.

16 Ntá tió kjuíji sín chjasin Roma ntá tí ch'ín capitán kjuikénhen tí sín tjejóchjina, k'uáyéhe tí ch'ín jefe ts'ayakonhen ch'án. A ntá ch'ín Pablo la kuítóhe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

17 Ntá k'uátsínka iní yaon ntá tí ch'ín Pablo a mé k'uíyehé ch'án kaín tí sín judío tjetean kuènte chjasin Roma. Ntá tió kjuixin kójnkotsé kaín sín ntá ntáchro ch'án kixin:

—Kíchóni, kohya ninkehó jie kjuásian kixin chrókónínkakonna tí sín judío la jehya kixin ninkakonxian tí nkehe k'uékinkáchónki tí sín tsík'axrjeníxinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a.

18 Ntá k'uitjahya sín ninkehó jie chonta. Ntá tjinkaon sín chrók'uatjántana sín kixin k'uitjahya sín ninkehó jie chrók'uénxian.

19 A ntá tí sín judío a mé imá kónínkaon sín tjanchia sín jie. Ntá t'ichjánxin tsjanchiani kixin tí ch'ín César mé chrókjuinchekitoxín ch'án nkehe tí jie chóntani, kjónté chóntahyani ninkehó jie ts'eka tí sín tí nación kuénténi.

20 Méxra k'uíyáhará kixin tjinkaonni ts'íkuan tí jahará la ko tsonixjहारáni kixin tinkáchónkini tí nkexro tjejóchónhen kaín tí sín israelita mé xikaha t'ikonrá kixin tjechronetoxínni cadena ntihi.

21 Ntá ntáchro sín kixin:

—K'uáyéhyani ninkehó xroon chrókjuixin Judea kuènte tí jaha la ko kuihya nijnko tí sín kichó ni judío chróntáchro sín ichrén nkehe jínahya tsíkjich'e.

²² Tjinkaonni chrókuinhinni nkexrí tjenkayáxian kixin ó noheni kixin itsjé chjasin t'ántaxínhin sín tí nkehe nixin tjákua —mé xíkaha ichro sín.

²³ Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuènte Dios. Nixjehe ch'án sín kixin chrókuitekaon sín tí nkehe kjuako ch'ín Jesús, la chrónkaxín ch'án kixin nkexrí nixja tí ley kuènte ch'ín Moisés la ko tí tsíkjin tí sín profeta ósé.

²⁴ Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuítekakonhya sín.

²⁵ Ntá jnkokoáhya kjuenkayáxin tí jehe sín la iso sín tjinkaon sín kixin sáchrókjui sín, ntá ch'ín Pablo mé ntáchro ch'án kixin:

—Ntoá nixja tí nkehe chénka Nchakuen Dios tí sín tsik'axrjeníxinni ósé chrónkaxín ch'ín profeta Isaías ntáchro kixin:

²⁶ Sátjia nixjehé tí chojni a

kixin jehe sín kjónté tjejótinhin sín la tienxínhya sín, la kjónté tjejótsjehe sín la t'ikonhya sín.

²⁷ A ntá asén tí chojni tí chjasin i la tsík'óna imá cha la ntatsjon sín la tsík'ikjehe

la ikon sín la tsíchr'áto

kixin t'ikonxínhya sín

kixin tinhín sín la tjinkakonhya sín chrókuienxín sín,

la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kixin ntá janhan chrókjuıntakitohá sín jína.*

* 28:27 28.26–27 Isaias 6.9-10

Mé xikaha tsíkjin ch'ín Isaías.

²⁸ Méxra chrókónohará jahará kixin ijie tí sín jehya judío me ts'áyéhe sín tí nkehe tsjanjon Dios tsaáxin sín kixin jehe sín mé tsinhin sín.

²⁹ Ntá xikaha ichro ch'ín Pablo ntá tí sín judío sákjuí sín la tinkákjo sín kichó sín.

³⁰ A ntá ch'ín Pablo kuítóhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjó tí sín kjuíjitsjehe ch'án.

³¹ La kjuako ch'án tí kjuachaxin kuènte Dios la ko kjuako ch'án kuènte Ìnchéni Jesucristo. La kohya ninkexró k'uínkákonhen tió kjuako ch'án. Ó tjen.

**Tí Nuevo Testamento cuènte Inchéni
Jesucristo C'óna Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b9b09122-b3f6-59f0-9594-749907b32b5b